

**NATIONAL ASSEMBLY OF
SEYCHELLES**

*Wednesday 17th December
2025*

The Assembly met at 9am

National Anthem

Moment of Reflection

Madam Speaker in the Chair

MADAM SPEAKER

Bon, mon ava dir bonzour tou bann Manm, tou dimoun ki pe ekout nou e tou dimoun ki pe swiv nou *live*.

Nou ava al direk lo sa ki lo nou azanda pour bomaten. Nou annan Mosyon pour apwentman Anbasader. Onorab Lemiel.

HON SYLVANNE LEMIEL

Mersi Madanm Speaker. Bonzour Madanm Speaker. Bonzour tou mon bann koleg Manm Onorab e tou dimoun ki a lekout. Madanm Speaker, Mosyon ki devan nou i lir konm swivan;

In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr. Patrick Andrea VICTOR as Ambassador Extraordinary and Plenipotentiary of the

Republic of Seychelles. Thank you.

MADAM SPEAKER

Onorab Audrey Vidot.

HON AUDREY VIDOT

Morning Madanm Speaker, tou Manm Onorab. Motion seconded.

MADAM SPEAKER

Mersi. Nou ava prezan resevwar Mr Patrick Victor. Nou ava al dan *Committee Stage*.

MADAM CHAIR

Bonzour Mr Patrick Victor. Mon ava demann ou pou fer en prezantasyon silvouple, pour nou bann Manm.

MR PATRICK VICTOR

Madanm Speaker, *Leader Zafer* Gouvernman dan Lasanble, *Leader* Lopozisyon, e tou Manm Onorab, e dimoun ki pe ekoute, bonzour.

Mon apel Patrice Andrea Victor osi *connu* konman Patrick Victor. Mon lanfans in La Pointe Larue, pli prezizeman, Anse Francois e osi Anse Boileau.

La Pointe Larue ti plito dan sa bann ler koumsa dan vakans, pous kannot Pa Joe dan delo al laba deor lev kazye, swazir nou bann pwason ki nou pou anmenn lo lans pour nou griye. Ler lanmer i mont,

nou mont dan pye bwadoz pou manze.

Anse Boileau soley tonbe ti melodi lakordeon mon granpapa Ton Nan. E sa i pou ale ziska ler tann-marie pou fer son bann tripo met nou dormi.

Pli tar mon ti ganny met lekol anvil. Pou konmanse, St Elizabeth apre St John Bosco. E finalman, Dominique Savio. E la nou ti a pe reste Lari Angar.

Lari Angar ti spesyal akoz tou long semen dan tou pti kwen, tou sa bann pti *lane*. *Button Lane*, *Moosa Lane* ti annan bann marmay pe zwe lanmizik, pe zwe gitar. I annan byensir ti napa gitar. Ti napa tanbour. Me zot ti a pe bat zot bwat kartron ou bwat dile.

Lari Angar i osi spesyal akoz se la kot premye Lekol Lanmizik ti konmanse avek Pierre Dastros-Géze. E bokou nou bann profeser lanmizik ki nou annan ozordi ti konmans la.

Alor bokou nou osi, bann zenes sa letan nou ti pe frekant sa landrwa. E mon rapel toultan mon ti pe demann avek Mr Dastros-Géze, akoz bann lanmizik ki zot ti a pe zwe ti napa naryen pou fer avek nou. Ti plito bann gran *chefs-d'oeuvre* *Beethoven*, *Bach*, *Handel*, eksetera.

E mon dir li ti a bon annan nou bann lanmizik Seselwa osi. Sirtou nou bann lanmizik tradisyonnèl. E sirtou mwan ki'n ganny berse avek lakordeon mon granpapa e romans Tann Marie.

I dir mwan wi, en bon nide. I ti a kontan si ou annan nide ki mannyer pou promot sa. E vwala kot nou pou fer premye Lafet Lanmizik dan lakour Regina Mundi sa letan. Konmela, Minister Ledikasyon.

E tou Minister Ledikasyon nou ti annan diferan group. Kanmtole, tinge, moutya, romans ; sorti en pti pe Praslin, La Digue osi. Akoz Mr Dastros-Géze ti a pe ankouraz mwan pou rod *sponsor*. Fer dimoun kontribye.

E bann dimoun Praslin mon ti a kontan dir ti kontribye zenerezman, avek kondisyon ki nou re vin fer enn kot zot. E nou ti fer. Tou dimoun ti pey R2 pou antre. En Sanmdi ek en Dimans.

Me sa ki gou se ki ou sorti, ler ou antre ou pey ankor ou R2. Alor nou ti kapab ganny en pti larzan Dimans apre midi ler ti fini pour nou pey bann pti det ki nou ti annan.

Praslin ti spesyal, akoz nou ti form en komite pou donn nou lasistans lo Praslin. Bann *businessmen* - bann

dimoun prominan sa letan. E ti mars byen.

Zot ti deside pour ki Baie Ste Anne a fer en, parey nou dir, en tonbola son Dimans. Son Sanmdi swar nou a fer sa ki nou ti pe apel *La Nuit* de Moutia Grand Anse kot lekòl – kot Lekòl Grand Anse St Joseph pli preziman. Pou konmans 7er pou fini 7er bomaten.

Me dernyen moman, ler nou deside kot mannyer pou fer louvertir ofisyel, dimoun Baie Ste Anne i dir, definitivman ou bezwen fer kot nou. Dimoun Grand Anse i dir non, non, non, non. Pou fer Grand Anse. Akòz premye sware pe fer St Joseph.

E la nou ti deside fer li dan en landrwa ki ase *naître*. E sa landrwa ki nou ti swazi sete *Vallée de Mai*. Met en moniman. Ziska ozordi, si zot pase zot war en moniman ki apel *Pierre de l'Unité*, se pour sa lokasyon ki nou ti fer sa.

Pou swazir sa ros osi ti annan en pti pe tansyon, akòz pou rode kote pou swazir sa ros. E me selman finalman, nou'n met en keksoz ki'n debout ziska ozordi. Nou'n fer nou *La Nuit Moutia*. Nou'n fer nou Lafet Lanmizik Praslin.

E sete avek sa nide ki pli tar, Pierre ti dir mon'n toultan tann ou pe koz lo teat. Nou pe al konmans bann kour teat. Mon espere ou a form parti. E

fodre dir a sa nivo ki mon'n toultan pli kontan lasenn ki lanmizik.

E la mon ti emerveye pou aprann postir, diksyon, artikilasyon, respirasyon, enterpretasyon, eksetera. Sa ti ale pandan 6mwan avek en profeser Franse, Jean-Jaques Bellu.

E pli tar ler li i ti ale ti vin en Italyen, Fabio Pachioni, ki li i ti annan son lot stil. Li apard travay lasenn i ti ankouraz nou ki fodre nou al dan bann distrik. Fodre nou al enkilke dan nou travay bann keksoz ki annan lorizin dan nou distrik.

Bann manni, bann mers, bann zistwar, bann fason fer. E ki fer ki tou le semenn, 2 fwa par semenn nou ti al dan en distrik. Mardi nou ti al tou nor. Merkrede nou ti al tou sid.

E i ti telman en sikse ki an '86 nou ti fer en gran manifestasyon lo Stad Popiler. E se la kot nou'n konmans war tou sa bann group ki ti annan dan bann distrik.

E bann distrik ti telman for, ti telman kontan sa program ki i ti fer – nou ti form nou latroup kiltirel nasyonal apartir sa letan. E ti fasil pou zis plonz ladan pou ganny bann nouvo manm, nouvo nide, nouvo disan a sak fwa.

E sa group ler ti'n ariv 82, apartir 82 nou ti a pe, pa zis al dan bann distrik, me

nou ti pe annan en lot program pou deservi tourizm osi.

Akoz en keksoz ki mon'n rate dir se avan formasyon sa group, mon ti a pe travay en letan kot Departman Touris. E mon louvraz sete zisteman pou asiste – ti annan en program ki ti apel servi kiltir pou promot nou tourizm. Nou Lendistri Touris.

Alor i ti enportan ki mon kontinyen deservi bezwen touris. E an menm tan, kontinyen lantrennman bann group. Sa group nasyonal, kiltirel ki nou ti'n formen ki ti kontinyen al dan bann distrik en pe partou.

Mon ti reste ek sa group ziskan *2000 – ziska '88, kot apre mon ti santi ti'n ler pour mwan bouz lo en lot keksoz. E lanmenm ler mon ti al form mon prop group “Bwa Gayak”. E nou ti ganny en Kontra 2an an Frans avek konpani ki apel “*Album Diffusion*”, kot nou ti fer en premye CD.

E apre 2an mon ti ankor annan sa lanvi kontinyen anmenn bann artis, sirtou dan bann gran festival ki annan atraver Lerop, sirtou pandan *l'été*, e nou ti al avek lankourazman Quincy Jones ki nou ti'n fer zanmi.

Fodre dir pandan sa 2an nou ti pe frekant en pe sa bann dimoun parey *Kassav*, *Kaoma*. *Kaoma* ti fek sorti avek

zot *Lambada*, *Zouk Machine*, *Compagnie Créole*.

E Quincy Jones ti dir ti a bon, aköz i ti'n vin Sesel en kantite fwa. Mon pa ti okouran. Ziska ler i dir mwan, wi. Kantmenm mon dir li nou pa zwe *jazz*, i dir non, pa fer naryen, lenportans se ki Sesel a ganny son sans prezant son bann lanmizik.

E nou ti fer en lot group. E nou ti al avek bann pwa lour. Ler mon dir nou ti al avek bann pwa lour, parey Joe Samy, Jenny De Letourdie, Emmanuel Marie, eksetera.

E apre sa, sa albonm ki mon ti'n fer ti a pe mars tre byen dan Losean Endyen. I ti annan nesesite ki mon donn lanmen son promosyon.

E la kot mon ti al – apartir sa moman la mon ti frekant plis losean Endyen. Aköz tou sa bann group dan Losean Endyen ti deza pe zwe mon bann travay; Moris, *Reunion*, *Madagascar*, *Comoros*. Menm *Mayotte*, *Rodrigues* sirtou. E sete la kot mon ganny en nide ti a bon Sesel osi nou annan nou rasanbleman bann artis, bann *heavyweight* ki vin rasanble isi. E donk mon ti kree sa ki nou apel lakadans.

Pandan 7an tou le-z-an nou ti annan en edisyon lakadans kot bann group, pa zis Losean Endyen ti vini. Sorti

dan Karaib. E parfwa menm Lafrik ti vini.

E pou al en pe pli devan, 2014, COI ti nonm mwan konman enn bann dimoun ki pou al fer *l'hymne de L'océan Indien* ansanm avek bann lezot artis Losean Endyen. Ti annan 4 lezot.

E mon kontan sa lannen bann zanfan Plaisance ti ganny sans travay avek Minister Zafer Etranzer pour pandan lokazyon bann rankont Minis Zafer Etranze COI. E bann zanfan Plaisance ti ganny sans sant sa lim.

E mon ti a kontan fini avek sa nide met bann artis Losean Endyen travay ansanm. I en keksoz fasinan. Akoz lannen pase an Mars nou ti fer preski menm zafer. Ankor ti en proze COI ki ti apel Kreasyon Mizikal ki nou ti fer dan teat nasyonal.

Sel domaz se ki i pa ti en zafer piblik. I ti pou'n enportan en keksoz koumsa ti'n fer pour piblik ganny sans vwar nou artis pe epanouir akote bann lezot artis.

Mon ava aret la, akoz sansan mon pou kontinyen - sansan mon pou kontinyen akont zistwar. E mon a dir zot mersi sa lokazyon mon'n ganny sans partaz sa pti bout mon bann parkour tre boner avek zot.

MADAM CHAIR

Mersi. Nou ava konmans pran bann kestyon. Onorab Conrad Gabriel.

HON CONRAD GABRIEL

Mersi Madanm Speaker. Mon a dir bonzour tou dimoun a lekout. Bonzour espesyalman bann zabitan Pointe Larue.

Mr Victor, felisitasyon pour ou nominasyon koman Anbasader. E avek ou lentrodiksyon mon panse ki ou a donn mwan koudmen pou elev en pe nivo kiltir dan mon distrik Pointe Larue, vi ki ou'n konmans en pe bor laba.

Mr Victor, ki mon ti a kontan konnen petet. Eski ou pare pou kontiny sa bann demars pou asiste bann *Chagossien* dan zot bann revandikasyon pou vwar en solisyon ki akseptab pour tou dimoun? Mersi.

MR PATRICK VICTOR

Mersi pou ou kestyon Onorab. I permet mwan partaz avek Lasanble en pti bout nou listwar. Ti annan en lepok kot bokou sa bann zil Losean Endyen dan bann lepok Kolonyal, ti administre ansanm, *Diego, Agalega*, eksetera.

E i annan bokou menm nou bann artis in sorti – pa dir zot in sorti. Mon krwar zot in veki laba. Zot in travay laba. E zot in form parti sa kiltir zil ki nou partaze an komen.

E mon panse ki nou annan en santiman pros, sansib, fraternel avek zot. Si ou permet mwan mon ava akont zot en pti *anecdote*. 2018 mon ti ganny demande pou partisip dan festival 6/8. 6/8 Moris *Mahébourg*.

Ler nou dir 6/8 nou pe dir tou bann lanmizik parey sega, maloya, moutya, sega tanbour, sega tranble. Prezan mon ti dir ek sa bann organizater, be mon pa'n neserman pratik sa mwan. Me parkont Sesel nou annan en kantite dimoun ki pratik lanmizik 6/8.

Alor mon ti rod bann dimoun parey Jean-Marc Volcy, Brian Matombe. Mr Norville - Defen Norville. E Channel, en zenn garson ki zwe tanbour lo lans Beau Vallon.

E en lot madanm ki reste Port Glaud, Jeanette – Jeannette Zialor. Mon dir ti a bon anmenn sa bann dimoun koumsa. E zot ti zwe fantastik. Me ti annan en moman ti annan en pti lapli, nou ti reste dan nou latant aköz tou dimoun ti reste dan en pti latant deor konman nou *changing room*. Nou tann en son.

Prezan apre en serten letan mon realize poudir Jean-Marc in ferm lizye i pe ekout sa i osi. Mon santi mon lanfans. Mon santi en keksoz rezonnen

dan mon lekor. Dan mon nanm. E mon dir; Jean-Marc, ou tann sa? I dir mwan, wi. Brian ki ti'n ferm lizye i dir; wi, mon osi mon pe ekout sa. Prezan ler lapli in kalme nou al deor, nou war en bann dimoun lo lasenn tout an blan, foular blan. En mervéy pou ekspéryanse.

Ler zot sorti nou al koz ek zot nou demann zot, konman i apele sa lanmizik zot ti a pe zwe? Prezan zot reazir en pe etonnen e dir; be ekout en kou. Bannla pa i dir zot Seselwa zot. Nou dir, wi. I dir “be zot lanmizik sa.” I dir, “moutya sa.” Mon dir, “ah bon ? Mon dir, “*Diego* osi zot fer moutya?” I dir, “wi, nou fer sa nou.”

E vwala kot pou reponn ou kestyon, nou annan en sansibilite komen ansanm. Donk, mon espere, mon priye, mon krwar nou tou dan Losean Endyen konman bann frer, ser ki annan bann lyen istorik, fraternel ek kanmarad, mon espere i annan en solisyon akseptab finalman en zour pour tou sa bann dimoun, ki fotespere nou a ganny en solisyon ki satisfè zot e ki a kapab fer zot ere.

Akoz mwan mon rapel mon bann lepok boner kot mon ti pe konman frekant Moris, mon ti annan en kantite zanmi *Chagossien*.

Me ler zot ti anmenn mwan kot zot ti reste, i pa ti fer plezir pou konnen poudir isi osi nou annan en bann dimoun ki'n vini kontrè en. Me nou nou'n entegre zot. Nou nou'n entegre zot dan nou sosyete. E i annan ou kapab – si ou pa konnen – Seselwa normal.

E donk mon krwar – pour lefe ki nou annan sa lyen istorik, mon priye ki nou annan en solisyon akseptab pour tou finalman.

MADAM CHAIR

Onorab Claudette Louise.

HON CLAUDETTE LOUISE

Mersi Madanm Speaker. Bonzour Madanm Speaker, tou bann Manm Onorab, bann dimoun a lekout. Bonzour Mr Victor. Felisitasyon pour re nominasyon konman en Anbasader. Mon konnen sa pozisyon i pa nouvo pour ou.

Petèt ki bann defi ki ou'n pas atraver e ki nouvo lapros, sirtou lo kote kolaborasyon avek petèt Biro Mer Lavil, Minister Kiltir, bann kominote Seselwa aletranze? Kwa nouvo ou ekspekte pe vin avek? Mersi.

MR PATRICK VICTOR

Mersi Onorab pour ou keston. Mon espere al devan. I ava annan kolaborasyon pli amikal, pli pozitif, pli

prodiktif. Me selman in en leksperyans. In en leksperyans imen, artistik. E i annan en kantite proze.

Mon ti a pe koz lo moutya taler. Konman mon ti ganny sa nominasyon premye fwa an 2019 mon ti al kot *UNESCO* pou al fer – mon ti anvi demann 2 keston mwan. Akoz tou sa letan moutya ti a pe ganny sa bann difikilte? E mon ti ganny fer konnen akoz pe ganny sa bann difikilte.

E akoz mon ti – Mr Radegonde. Sylvestre Radegonde ki ti Anbasader *Paris* sa letan. I ti fer en louvraz fantastik pou fer sir ralye sa bann dimoun. Ralye sa bann dimoun ki lo sa komite pour nou partaz, pour nou fer en pti tour lorizon, pour nou ganny sa ledikasyon.

E pour ki sirtou pour ki si demen nou annan nide fer bann nominasyon ankor, ki mannyer nou mye prepar nou. E mon ti ganny eksplike akoz i pa ti'n pase bann fwa avan. *Ok.*

Donk, enn bann plan ki mon ti fer e renesans moutya. I ti pou en plan ki i ava pran detrw mwan pour nou al fer resers avek bann dimoun ki par lao 80an, 85an an montan. Akoz mon ti a pe ekspekte sa bann dimoun petèt i ankor annan en nosyon *or* en nide ki mannyer moutya

ti ete avan i ganny enterdi an 1935.

E mon ti ganny en kantite lenformasyon. E fodre dir fransman. Fransman, si nou pou al devan pozitivman dan sa zafer moutya, i pou enportan konnen poudir i annan demars ki nou bezwen fer.

I annan resers ki nou bezwen fer pou rode, eski vre i ti zis en ladans, ouswa i ti en seremoni? Eski i ti en rityel? Akoz diferan dimoun ki nou'n koz avek in donn nou en bann ledikasyon tre enportan pour nou konnen ki mannyer sa zafer i devret ete.

E mwan konman en artis ki'n toultan reve nou bann lanmizik i fer sa ki nou dir an Angle, en *hit* mondyal. Mon krwar lasours se dan sa bann kalite zanr lanmizik koumsa. E i domaz ki zis sa plan in reste la. E mon espere nou kapab relev li. I toultan kapab annan posibilite relev li.

Me mon espere ki parey sa keston Onorab in demande, i annan en kantite dimoun osi deor la ki swete sa bann plan i ganny releve e nou mye kapab promot nou lanmizik, nou lar, nou kiltir pli devan.

I annan bann plan. I pa zis sa plan moutya renesans. Me i annan bann lezot plan ki la ki mon krwar i pou fer Sesel briye e nou kominote artis,

sirtou dan distrik dan sa bann vilaz vin pli vibran.

MADAM CHAIR

Mersi. Onorab Lephy.

HON NELSIA LEPATHY

Mersi Madanm Speaker. Bonzour tou dimoun a lekout. Bonzour bann Manm Onorab. Bonzour Mr Patrick Victor. Felisitasyon dan ou nominasyon e mersi pour ou bann konpozisyon ki toultan adousi leker e osi fer nou reviv nou kiltir Seselwa.

Ozordi mon asire osi ki bann lezot konpoziter e mizisyen Seselwa zot fyer pou war enn zot koleg, en vedet dan lanmizik ganny nominen koman en Anbasader.

E mon mazin Mr Victor, ou koman sa Anbasader ou pou asire ki nou kiltir Seselwa pa perdi dan lemonn.

E mon keston pour ou i ki mannyer ou krwar avek ou vas leksperyans ki ou annan dan lanmizik e lezot form lar osi, ki mannyer ou pou asire ki nou kiltir Seselwa, byensir atraver ban diferan form lar, pa zis lanmizik, i ganny partaze dan lemonn antye pour ki nou pa vwar li perdi? Mersi.

MR PATRICK VICTOR

Mersi Onorab pour en keston fantastik. Mon dir fantastik

akoz i annan en plan – i annan en plan ki mon ti'n fer ki apel *SeyMofa*.

Mon bann kanmarad artis deor la ki pe ekoute i pou konn tre byen sa plan. *Seychelles Music Fair* pou ganny fer an 3 zour. En zour ki dedye pou nou lanmizik organik tradisyannel. En zour ki dedye pour bann ki pratik sa ki nou apel *world music*. Pou annan en kantite.

Sesel i telman milti talan kot i konsern lar, lanmizik ki nou annan dimoun i *practice* diferan keksoz. Ou annan menm bann lanmizik ki bann zenn i pratike. Zot la zot. Zot egziste. Zot pratik sa kalite form lanmizik.

Se pour sa nou'n fer en soz – 3 zour. En program 3 zour ki menm bann prodikter, tou sa bann diferan festival ki mon ti a pe dir boner i annan, i egziste.

Ki nou annandler nou bezwen rod fon pou ale la. Bezwen rod tiket avyon. Landrwa reste, lotel, eksepera. Nou kapab envit sa bann prodikter vin vwar nou isi dan nou leta natirel pe pratik sa ki nou annan pou ofer lemonn.

E bann *scout* – bann *scout* lanmizik i annan en kantite. E sanmenm sa zot louvraz, se zis al rode dan lemonn kote ki annan.

Alor avek en *fair* i permet zot met lo zot kalandriye bann

diferan festival ki zot pou ale, enkli sa enn. Pa bliye poudir Moris ek Larenyon i annan sa ki pour zot.

Moris i annan *Yoma*. E ou pou war tou sa bann dimoun ki vin *Yoma* i al tou sa bann lezot festival ki annan dan lemonn. Zis lakot Lafrik apartir Sid Afrik, *Tanzanie* an montan ziska pli lwen, zot osi zot annan bann festival. E bokou sa bann dimoun se zot biznes sa. Rode ki annan pou propoz avek bann gran *Maison de Disques*.

E nou annan – permet mwan pou azout en lot keksoz. Nou annan – mwan mon krwar nou annan 3 trezor – apel li trezor nasyonal. Trezor natirel, nou pwason, nou lanvironnman. Touris i vin isi. Viziter i vin isi pou vin vwar, sirtou nou lanvironnman.

E tousala i annan bann lazans ouswa bann lorganizasyon ki nou'n mete pou zere. Nou bezwen fer enn parey pour nou lar. Pa konnen ki mannyer pou apel li. Bezwen annan enn parey pour nou lar ki pou donn li promosyon, ki pou sonny li. Ki pou sonny sa lendistri kreatif avek tou son potansyel ki i annan pour Sesel tir benefis ladan. Si non, nou pe zis gaspiy resours, talan ki annan dan sa pti pei. Mersi.

MADAM CHAIR

Onorab Grandcourt.

HON ALVIN GRANDCOURT

Bonzour Madanm Speaker. Bonzour tou bann Manm Onorab. Bonzour Mr Victor e tou dimoun ki a lekout.

Koman en zabitan Praslin, mon krwar mon devret premyerman eksprim nou rekonesans anver ou pour premyerman sa sanson, “Retourn Praslin” ki rezonnen *toujour* ziska ozordi. E i vreman pour nou, zabitan Praslin, in toultan tous nou ler nou tann sa melodi.

Mon kestyon i baze lo sa menm laliny Praslin. Ou en endividi ki'n fer bokou letan Praslin e i toutafe normal pour mwan poz sa kestyon *maintenant*.

Ki - dan en pozisyon etandonnen konman en Anbasader Lar, ki ou mazine ou kapab ranport pour nou kominote, nou zil? E pa zis Praslin, met osi La Digue e bann Zil Pros? Mersi.

MR PATRICK VICTOR

Onorab, mersi pour ou kestyon. I en bon kestyon. I en kestyon mon osi ki pas dan mon latet annandler, aköz mon annan en kantite zanmi mizisyen Praslin ki nou'n fer en kantite travay formidab ansanm. E mon asire bann ki pe ekoute pou konnen lekel zot.

I enportan pour nou met en program Praslin osi, en. Pour nou – pa en program. Petet plizyer program. Dan lepase in annan bann kozri koumsa.

Ennler en kantite dimoun i dir ou konnen Praslin zot kontan esper dimoun vin fer keksoz pour zot. Mon pa tro krwar i zis sa mwan.

Akoz boner sa lannen mon ti ganny envite par en group, en bann *teachers* pou vin travay avek bann marmay dan vakans. E ankor en fwa mon ti dekouver – mon ti al pour en semenn pou reste laba ek zot.

Mon ti dekouver en bann zenes formidab, talante. Zot annan bann rev zot osi. E i pou enportan zot pa zis fini, al tap, tap tanbour, al tap, tap *djembe* dan lotel.

Mwan i kas mon leker annandler ou'n tann dir bann marmay pe al zwe moutya, selman zot pe servi *djembe* ki pa pour nou. I pa akseptab. Nou bezwen relev sa ki pour nou.

E mon annan bann dalon ki frekant kot mwan, nou koz lo sa toultan. Mon pe dir ou sirtou bann dimoun ki sorti Praslin, ki zwe lanmizik Praslin. E zot, zot largiman zot dir mwan, non ton Pat, sanpyon se moutya lezann i Praslin.

Toultan i pe dir ek mwan – aköz annandler mon dir ti a bon rode. Aköz mon ti'n fer en program mon dir en zour ti a bon *SBC* i fer en program bann non lezander dan lanmizik tradisyannel. Annou dekouver zot. Annou konn zot. I ti dir ek mwan, fodre ou al kot sa dimoun. I nonm mon tou sa bann dimoun ki annan lo La Digue osi.

Mwan mon pare aköz mon pa kapab tou le-z-an mon pe get – mon tann dimoun sorti Mahe i vin fer tel, tel program. Mon pa pou nonm non. Sorti Mahe vin fer tel, tel program. Mon dir, be toultan mon pe dir zot. Mon dir be zot pa kapab fer sa zot?

Petet i annan bann pti lasistans. Parey sa bann mis lekol sa lannen ki ti envit mwan pou vin travay ek sa bann marmay.

Natirelman premye zour zot soke mon kalite dyalog ki mon pe koze pou ankouraz zot pran keksoz dan zot lanmen. E ler mon pran sa lot semen ki nou pa abitye pase pour nou koz lo nou kiltir, lo nou tradisyon.

E Praslin i annan. Ti annan en msye ti zwe vyolon. Mmm. Mon sir Onorab ou konn li. En zour mon ti *paradise*, mon tann sa – mon ti ekspekte i zwe kanmtole lo la. I pe zwe bann – bann *Che Dèw* enternasyonal.

I pe zwe Michael Bolton. I pe zwe Celine Dion. I pe zwe *Aznavour* lo sa vyolon. Natirelman, i ti emervey tou dimoun. Sa letan i ti'n kabannen menm, aköz pli laz in monte, in kontinyen desann en pti pe. Mon krwar ou konnen sa dimoun mon pe dir. Mersi.

MADAM CHAIR

Onorab Monthy.

HON PHILIP MONTHY

Mersi Madanm Chair. Bonzour Mr Victor. Tou dabor, mon zis oule dir ou poudir mon osi mon en gran *fan* ou lanmizik. E mon annan 2 pti kestyon pour ou ozordi selman.

I annan Komite *National Awards* ki rekonnet bann vedet. Bann dimoun ki'n fer bann keksoz eksepsyonnel pour pei. I annan plizyer bann dimoun ki'n ganny rekonnet dan lepase.

Ki ou pwennvi lo sa bann *award* pou rekonnet sa bann vedet pour kontribisyon ki zot in fer pour pei oubyen pour kiltir? Eski ou ankouraze ki sa i kontinyen e menm amelyore al lo en nivo petet pour ki nou bann vedet, nou bann dimoun i ganny sa rekonesans ki zot merite? Ki ou pwennvi lo la?

Mon pa rapel ou'n ganny rekonnet *so far*. Petet wi, kekfw in sap mwan. Si ou ti

kapab klarifye sa avek mwan osi.

E apre en lot kestyon. Vi ki ou pou al vin en Anbasader. En Anbasader i reprezant en pei pe enport lopinyon politik bann zabitan.

Ki ou pwennvi lo afilyasyon politik en Anbasader ki sipoze pe reprezant nasyon Seselwa an antye? Mersi.

MR PATRICK VICTOR

Mersi Onorab pour ou 2 zoli kestyon. Selman zis en pti klarifikasyon Onorab, ler ou pe dir – ou pe dir *Arts Award*? Ler ou'n dir sa *award*, ki ou'n dir, ou pe dir *Arts Award*?

National Award. Ok. Ok. Pa neseserman *Arts Award*. Dakor. Mon krwar i en bon zafer annan *award*. Me selman i enportan pour nou rekonnet nou dimoun korekteman, zis ler nou pe donn en dimoun en *award* lo nivo nasyonal.

Arts Award mon'n deza gannyen en fwa. Dan lepase nou annan bann lezot *award*. *National Award* ki mon krwar ou pe koz lo la, mon'n deza ganny propoze. Me mwan ki pa ti aksepte.

Mon pa ti aksepte par senserite. Par mon dinyite lonnekte personnel pour mwan. Akoz mon ti santi poudir i annan en kantite lezot keksoz. Kantite lezot keksoz ki

mon ti a pe sey fer. Mon ti a pe ganny peze si ou le met li koumsa, akoz mon ti ganny dir sa mo “peze”.

E i pa'n al lwen. Ki mon ti santi poudir ti pou pli benefisye pei sa ki mon ti a pe sey fer dan sa bann lokazyon. E donk, zis pour mwan ganny en *National Award* par merit, petet pour bann tan letan ki mon'n devoue, mon pa ti santi in ariv ler. Mon'n santi pa ankor ler. Ok.

Mon'n santi pa ankor ler. Petet pli tar. Donk, mon ti dir sa voyaz. Sa voyaz mon a sote. Mon a sot sa enn. Ok. Ou lot kestyon. Mon'n espere ki mon'n reponn ou, ou kestyon Onorab.

MADAM CHAIR

En pti klarifikasyon Onorab?

HON PHILIP MONTHY

Zis en pti klarifikasyon oubyen en pti siplemanter. Vi ki ou'n refiz sa *award*, la ou pe al vin en Anbasader, eski i annan okenn keksoz, okenn sizesyon petet ou kapab prezant avek sa komite, pour ki la prosenn fwa ler sa i ganny fer napa okenn lezot artis ki war pa ankor ler pour zot refize, ki sa i vin a en bon moman?

Okenn rekomandasyon ki ou ti a sizere avek sa komite, pour ki en tel sityasyon pa ariv ankor? Mersi.

MR PATRICK VICTOR

Wi, ou annan rezon. Mon krwar ou sizesyon i tre bon. E sa i ava amenn mwan lo ou dezyenm kestyon an menm tan.

Ou konnen annandler nou artis nou fer en sanson pour nou pei. Nou fer en sanson pou koz lo petet linite nasyonal par egzanp. Nou koz lo donn sipor nou bann dimoun dan domenn tradisyonnel. Parfwa sa bann kalite travay i ganny pran konman politik. Si zot permet mwan partaz ek zot san lentansyon kree kontrovers.

Mon annan sanson radyo pa zwe ki mwan mon konsider nasyonal – sanson nasyonal. Zot pa zwe aköz zot dir sa i annan konotasyon politik. Petet pour zot reste *nâitre* i *ok*. Mon *ok* ek sa mwan.

Be selman, artis – artis i ganny zize annandler dan son sans patriyotizm, ki petet pa tou nou tou ki ziz patriyotizm dan menm fason. Me nou seye.

Par egzanp, i annan sanson vilger ki zwe lo radyo ki mwan mon konsider vilger. Ki i annan sanson ki pour mwan mon konsider malelve. E plizyer fwa, pa zis mwan. Mon annan lezot koleg ki nou'n al ansanm kot direksyon radyo, televizyon pour nou dir, be sa pa devret pe pase aköz ou

annan zanfan osi ki pe ekoute. Zanfan lekol osi ki pe ekoute.

Konmela marmay i ganny akse avek rezo sosyal lo telefonn. Petet i pe krwar i *ok*. I normal. E li osi i repran sa bann parol, sa bann terminoloji. E vwala kot nou'n al war Lotorite Radyo detrwa fwa lo sa. E zot, zot dir non, dimoun i kontan. *Ok*. Dimoun i kontan.

Pa tro lontan menm sa semenn mon ti a pe koz - nou ti a pe koz sa konversasyon avek serten kanmarad artis ki dir mwan, be i domaz. Aköz si dimoun i kontan, be dan sa ka sa bann ki pa pe zwe ki zot konsider politik osi, petet i annan dimoun osi ki ti pou kontan.

Pourtan ladan pa nonm okenn kouler. Okenn – napa okenn afilyasyon. I zis nou pe enterpret nou patriyotizm dan en fason ki petet pour lemoman – petet pour lemoman popilasyon an zeneral pa ankor pare mon mazine, pou aksepte.

MADAM CHAIR

Onorab Herminie.

HON WILBERT HERMINIE

Mersi Madanm Speaker. Bonzour Madanm Speaker. Bonzour tou koleg Manm Onorab. Bonzour Mr Patrick Victor. *Welcome back* ankor.

Second bite at the cherry. Mon asire sa voyaz ou pou pase.

Mr Patrick Victor, mon konnen ou'n travay lo en bon pe proze. Tel ki drwa loter koleksyon *royalties*. Rekognisyon nou moutya par UNESCO.

Me konman en Anbasader pour Kiltir, ki pou ou premye misyon pou kapab pous nou kiltir pli devan? Ki ou premye proze ki ou pe panse ki i pou ou *next challenge* pou anmenn kiltir lo sa lot nivo? Mersi.

MR PATRICK VICTOR

Mersi Onorab pour ou kestyon. Mwan mon ti a dir annou remarke poudir in ler pour nou re mazin kiltir ler nou koz lo sa zafer kiltir. Revwar li.

Ou konnen, i menm zafer ki mon kontan Onorab Monthly in demann mwan sa ban kestyon. I permet mwan vin dan sa laliny panse, ki mwan mon dir annandler nou sosyete petet pa ankore tro, tro konpran kwa ki nou pou dir patriyotizm, kwa ki nou pou dir politik.

Alor, mwan mon dir annou revwar, annou re panser nou dir kiltir. Nou bezwen war poudir i en fe ki dan nou lekol pa montre ase nou listwar. I en fe.

Alor, si mon dir i en fe ki dan nou lekol pa montre ase

listwar, mon pa pe kritik person. Mon pe zis fer konman en sitwayen konsernen avek sa laspe, mon vwar li koumsa.

E mon dir poudir nou napa ase konsiltasyon avek nou artis. Napa ase konsiltasyon ek nou artis. Malgre nou bann artis deor laba nou'n war en kantite fwa Lotorite Kiltir, Lar e Kiltir i vin isi dan Lasanble i vote pour diferan sonm ki nou, nou krwar – mon dir arh, mon proze pou pase prezan. Setaki pe krwar son proze pou pase.

Ler mon dir setaki, akow ou annan debitan. I annan nide li osi kantmenm i pe debite. Ou annan bann ki'n etabli. Li i annan en lot kalite proze dan son lespri, dan son plan ki mannyer pou anmenn nou lar, nou kiltir pli lwen.

Apre ou annan bann ki nou apel li bann *maestro*. Bann *grand masters*, ki lontan in etabli la li. Li petet i pe mazin ki mannyer li osi i pou aport son kontribisyon an zeneral dan en lot nivo.

Alor i pe mazin sa ki kiltir pe gannnen la petet son plan ki'n deza propoze i a *ok*. I annan ki pe fer en proze pour son vilaz. I annan ki pou fer proze lo nivo nasyonal. I annan ki anvi fer proze pour pli lwen. Pour lemonn, parey mon'n ganny demande pli

boner. Nou bezwen konpran sa peizaz artistik.

Mon pou dir ler nou dir peizaz artistik. Pran akter par egzanp. Nou war en akter lo lasenn. Me napa zis akter. Ou annan akter. Ou annan meter ansenn.

En dimoun i al dan *studio* pou al fer en sanson. Ou annan sa artis. Sa santer. Me i annan aranzier. I annan enzenyer son. Ou annan mizisyen. Skilpter, i la li. Direkter artistik, danser, dansez. I annan danser, dansez wi. Me ou annan koreografer. Ou annan *videographer* ki'n fer sa *video*.

Arh, apre ou annan sa ki mwan mon apel bann aktivis kiltirel. I pa neseserman santer li. Mon osi mon annan mon laspe aktivis kiltirel ek mwan. Mon anvi ki nou distrik i vin – nou kominote i vin pli vibran kiltirelman. Mon revandike sa.

Ler mon revandik sa la, mon pa pe fer politik mwan. Konman en sitwayen mon pe revandike ki nou bezwen *empower* nou distrik pour zot osi fer bann keksoz ki zot anvi fer. Zot met fon, met sipor deryer zot.

Apre ou annan ou bann antreprenner artistik. Bann dimoun ki'n investir dan son. Bann dimoun ki'n investir dan lalimyer. Bann dimoun ki'n investir dan lasenn.

Annandler ou war zot pe pase dan bann kanmiyon pe sorti en bor, pe al en lot bor ; pe sorti en bon, pe al en lot bor.

Donk, ler nou tann – ler artis deor laba i tann, be tel seksyon dan Departman Kiltir in ganny vote tel larzan, i ekspekte i pou ganny asiste ek son proze. Me pour lemoman i pa koumsa.

Pour lemoman bann larzan, bann fon ki zot, zot pe vote la, i pour biro, *aircon*, transpor, lapey. Sa bann biroktrat. E artis in ase zantiy pou reste trankil tou sa letan.

Donk, mwan mon pou dir, pou reponn ou kestyon Onorab, mon konnen mon'n en pe long. Nou bezwen premyerman annan konsiltasyon. Gete vreman leta lar dan Sesel, leta kiltir dan Sesel. Sanmenm sa mon dir annou re pans kiltir. Mersi.

MADAM CHAIR

Mersi. Mon a zis les bann Onorab konnen ki *given time management* mon pa pe pran ankor lalis dimoun pou demann kestyon. *Next* i Onorab Trevor Louise.

HON TREVOR LOUISE

Bonzour Madanm Chair. Mersi Madanm Chair. Bonzour Mr Victor. Felisitasyon lo ou nominasyon ankor enn fwa. Bonzour tou dimoun a lekout.

Mon kestyon pour ou se, byento ou pou vin en Anbasader. Ou forte mon mazine ou pe koz bokou lo kiltir ki ou pou pe *focus* bokou plis lo nou kiltir Kreol.

Ki sa i pou vedir pour nou Lekol Lanmizik, parske ou en artis, ou en mizisyen? E ki pou ou relasyon travay avek Lekol Lanmizik an sa ki konsern pou relev nou bann lanmizik Kreol e kiltirel?

E osi an term ou relasyon avek Minister Kiltir e Lofis Mer Lavil pou ede releve nou kiltir dan Sesel?

Parske resaman mon'n war en lartik kot en dimoun ti pe dir ti Lazournen Moutya e napa naryen ki'n ganny organize nasyonalman. So ki pou ou relasyon travay anver sa? Mersi.

MR PATRICK VICTOR

Mersi Onorab pour sa kestyon. Ankore en fwa, i tous plen, plennman lo sa konsern aktyel.

Mon dakor ek ou poudir ti a bon, ti swetab ki Konservatwar Lanmizik i annan – si i annan. Petet ti a bon annan plis program pou devlop bann dimoun, sirtou zanfan, ki anvi al dan sa domenn.

Mon dir sirtou zanfan aköz tou dernyerman la mon tann bokou dimoun ki dir zot

in anmenn zot zanfan laba e zot ganny dir in plen.

E mwan mon ti a pe propoze. Mon dir be petet – mon'n propoz en pe pli o tou. Mon dir petet ti a bon si nou konn en dimoun ki zwe en lenstriman tradisyonnèl par egzanp.

I pa neseserman en ansenyan li, me i anvi partaze. I anvi transmet. Aköz nou annan en gro problem transmisyon. I annan dimoun ki anvi transmet lo diferan nivo.

Boner mon ti a pe koz lo listwar dan nou lekòl. Mon ti a pe dir napa ase. Me transmisyon i lo tou kote. Sa bann – sa enn de dimoun ki zwe lenstriman tradisyonnèl petet ti kapab tanzantan osi – sa en propozisyon, pou reponn ou kestyon la, ti kapab ganny konsidere.

Se pour sa mon dir i enportan nou annan konsiltasyon ek sa kominote dimoun ki pratik sa kalite metye. I annan kestyon lenstriman. Me i annan pour kestyon ladans osi.

I annan en madanm 2 ou 3 zour pase, li osi menm zafer. I dir mwan son pti fiy in koud son pti rob sega pour li al lekòl. I pe atann avek en pasyan. Parey nou dir, i pe *look forward*. Apre in ganny dir, non madanm, in plen.

I pa akseptab. Si fodre desantralize, annan en brans dan en distrik kek par, annou fer. E pour nou fer sa fodre nou annan en konsiltasyon fran. Nou asize nou koze nou tou konsernen.

Akoz ler zot *vote* en fon pour en Minister, se pa neseserman pour plan nide sa ban dimoun dan sa Minister ki zot, zot anvi fer. Se pour sa nasyon antye. E sirtou bann dimoun ki konsernen ladan ou dir, be lavil zafer moutya. *Mark Moutia Day*. Yer sa, ouswa? Avan yer?

Pe enport. Mon osi mon'n en pe etonnen ki – parey nou'n dir. In vin en pti pe parey Festival Kreol. Festival Kreol osi sa 3 lannen in vin sa ki petet nou kapab dir *lowkey*. I pa kapab *lowkey*. Nou bezwen selebre li. Nou santi. Kantmenm i senp.

Annou pran lafet Nwel. Lafet Nwel kantmenm en dimoun i napa gran mwayen, i fer son pti lanbyans. I marke aköz i annan en afilyasyon santimantal avek i tous li. Donk, mon espere ankor i ava annan kolaborasyon lo tou nivo. I lavil. I Minister. I distrik.

I annan bokou sa bann kestyon la. Ti annan en lepok nou ti'n konmans en diskisyon. Mon ti byen kontan. Komite medya. Mon pa konnen, mon krwar Kiltir

ek Medya. Koriz mwan si mon mal dir.

Mr Henrie, Onorab Henrie ti envit mwan en fwa. Nou ti ganny en zoli dyalog. Petet ti kapab kontinyen sa bann dyalog. Ankor i vin dan lespri konsiltasyon, lespri partaz nide, propozisyon. Mersi.

MADAM CHAIR

Onorab Vidot

HON AUDREY VIDOT

Mersi Madanm Chair. Bonzour Mr... Osi – Mr Victor, *sorry*. Avek pep Seselwa ki pe swiv. Mon kontan bann repons ki ou'n donner e espesyalman sa mo aktivis kiltirel. Mon kestyon i anliny avek –

Ou dan ou karyer ou'n vizit diferan pei. Mon asire – e letan ou'n vizit sa bann landrwa, byensir premye keksoz ki ou vwar son leta natirel. Son bann landrwa kot ou pase ki montre ou fini – bann keksoz ki egziste i montre ou ki mannyer sa pei i valoriz en pti pe son bann leritaz avek son valer kiltirel.

Mon pran en senp legzanp. Ler mon ti antre, mon ti debarke *Kenya*, ti pou al *Kisumu*, lo erport konman ou vini ou war zot bann diferan zannimo ki zot pe promote zot annan dan zot pei. I annan plizyer repriz dan Lasanble Nasyonal mon'n soulev sa

avek Minister Kiltir lo kot i konsern kiltir - Departman Kiltir.

Sesel ou vini ou marse anvil, apard ki nou bann moniman ki egziste ozordi. Me nou pa vwar apard ki lo larzan, nou bann zannimo oubyen nou bann leritaz ki nou war poudir i pe perdi. Me i annan en mankman.

E si nou ti annan sa Sesel, i ti pa zis pour en latraksyon touristik. Me osi en ledikasyon pour zenerasyon ki vini vwar kwa ki nou, nou annan. Kwa ki nou, nou pe prezerve, ki nou pe promote.

E mwan mon kestasyon anliny avek petet ou bann vizit kot ou'n fer. Ou bann parkour dan ou travay ki ou'n fer pou promot en pti pe lo laspe kiltirel. Eski ou krwar poudir bann keksoz ki mon'n mansyonn ou i annan son merit, son valer?

Mon rapel kot lapos en fwa nou ti annan en striktir kot ton Pa. Eski ou krwar poudir i pa en bon nide ki nou merit annan bann tel valer ganny mete, pa zis lo nivo lavil, me parey ou pe dir, lo nivo distrik?

Senp legzanp ankor, Roche Caiman nou ti lo delo avan ler i ganny konstrir. I annan listwar ki ti annan kayman. Me in toultan en swe pou war poudir nou annan serten skilptir. Serten keksoz

ki nou donn valer e montre en pti pe listwar lo sak distrik.

Eski ou pa krwar poudir sa i annan en mankman, i merit ganny valorize pou form par promosyon e montre nou – konmsi annan sa diversite pour nou kapab redonn valer nou bann diferan laspe leritaz dan nou pei? Mersi.

MR PATRICK VICTOR

Mersi Onorab. Fantastik kestasyon. Mwan mon pou dakor ek ou ki sak distrik i annan son spesifisite.

Bel Ombre nou annan nou spesifisite. Lapes. I annan son kalite zistwar. Nou ganny dir poudir *Levasseur* ti kas en morso montanny pour li kasyet son trezor apre 3, 4an ki ti'n reste la ek son bann navigater ek li.

Donk, Belo Ombre i annan son spesifisite. Nou pa kapab dir, be mon pa pou al Bel Ombre aköz napa madilo. Be La Digue, Madilo son spesifisite laba.

E i normal ki ler nou vin laba nou war sa Madilo. Petet nou kapab war madilo ki ti danse 50an pase, 25an pase avek ki pe pratik la konmela. Bann zanfann, bann zenes in ganny enspire. Nou bezwen kontinyen ganny enspire.

E mon krwar ou annan rezon. Sak distrik i annan sa. Aköz sak distrik i annan son lanblenn en. Si i pa pe

fonksyonnen petet ti a bon re vizite, vwar ki nou annan pour sak sa bann distrik annan son latraksyon.

Mwan mon rapel en fwa, en pe lontan mon ti'n deza propoz en gran *board* pou met Beau Vallon. Me selman i pa ti – petet Onorab Hoareau pou dir, be la ki sa, ou pou al met en zafer Beau Vallon pou fer piblisite pour Bel Ombre?

Mon ti'n mazin la aköz la i dan krwaze semen. Konmsi pou dekouver trezor Bel Ombre, al Bel Ombre ou a war *kot La Buse* ti vini i ti kasyet son trezor.

Akoz La Renyon osi i dir *La Buse* ti vin kot zot St Denis. Zot annan menm simityer. Rodrig osi i annan son bout, son pti bout kot in prezerv li i dir *La Buse* ti vin la, ti kasyet trezor.

Nou, nou annan en kantite. Mon a dir menm Anse Aux Pins dan mon ban demars moutya ki mon ti a pe dir zot pour moutya renesans, nou ti al en landrwa anler Anse Aux Pins par lao Capucin.

Zot apel sa – i annan en mannyer zot apel sa. Kot zot dir bann lesklav ti sove. Bann maron – kanmaron - bann lesklav ti sove.

En zour mon ti al laba avek en msye *UNESCO*. I dir, be la osi ti a bon met en moniman. E i kapab fer bann viziter. Pa zis pase ek zot bis

ale. Me i debarke, i war en pe bann dimoun dan kanton Capucin mannyer i viv. E zot war sa landrwa.

Akoz mwan sa madanm ki ti montre mwan sa landrwa, i reste dan en lakaz ki i dir mwan otrefwa ti pou lakaz Matende. E Matende bann ki konn listwar moutya i konnen poudir i ti en *grand master* moutya. Li i annan en portre Matende sa madanm ki en dimoun in desinen pour li.

Donk, wi i annan en kantite landrwa kot nou kapab fer li vin bann latraksyon. Swa en pti moniman. Swa en gro moniman. Ouswa nou fer bann aktivite otour sa landrwa tanzantan.

MADAM CHAIR

Bon mon pran en dernyen kestyon. Onorab Hoareau.

HON JOHN HOAREAU

Mersi Madanm Chair. Bonzour Mr Victor e *welcome* to nou *Assembly*.

Mr Victor, mon en pti pe pertibe avek en serten size. Sirtou sa size *SACS*. Ou'n en manm Fondater *SACS* ansanm avek Mr David Andre, e ozordi nou konnen poudir i annan apepre en bilyon *US Dollars* ki dekoul dan Lafrik atraver drwa doter pour bann diferan prodiksyon teat, sanson e lezot.

So, ki ou'n fer pandan sa letan ki ou'n ganny nonmen Anbasader, pour ou kapab sey anmenn sa bann anrezistremman avek bann lasosyasyon enternasyonal ki serten sa larzan i pa zis al dan bann pei *Maghreb* parey *Algérie, Morocco, L'Égypte*.

Me i osi desann en pe dan Losean Endyen, i vin Sesel kot nou valoriz plis nou bann prodiksyon teatral oubyen sanson, ensidswit. So ki bann Seselwa ki kree, ki prodwi i ganny serten reminerasyon an plis. Mersi.

MR PATRICK VICTOR

Mersi Onorab Hoareau pour sa zoli kestyon. Mon dir ou bravo. I osi en konsern pour mwan ki SACS pa pe fonksyonnn dapre son manda.

Ler mon ti kree SACS sa letan set aköz partou kot mon ti pe ale dan larezyon ki mon'n dir zot mon ale taler, mon ti a pe tous mon drwa doter.

Avan mont lo lasenn i annan bann lenspekter la pe fer sir i war ou lalis sanson ki ou pe al sante pou demann ou lekel. I dir sa enn ou pa'n mete lekel. Sa lekel? Sa lekel? Menm si i pour ou.

Mon ti al reprezant SAC. SACS *Senegal* 2010 aköz personnn pa ti oule ale aköz, petet aköz i Lafrik be apre voyaz i long.

Ler – pou kree *Pan-African Composers' and Songwriters' Association*. I apel PACSA. Lo avyon pou tournen mon fer mon rapor preliminar. Mon al anmenn kot SACS 2 zour apre e mon demann en pti rankont pou mwan eksplike ki mannyer in pase laba.

Akoz mon ti'n demande ki Sesel – zot ti annan – zot ti a pe fer 2 komite travay. Enn pou revwar zot Konstitisyon. Enn pour bann Konstitisyon.

E mon ti'n met - propoz Sesel lo komite fer en bann lalis travay pour sa prosen 4an. Be ziska prezan mon ankor pe esper SACS dir mwan vin donn en kontrandi.

Lannen pase mon ti anmar leker mon ti demann en rankont an fezan konpran poudir depi ler mon'n kree SACS zanmen mon'n enterfer dan zot fason travay. Mon'n toultan respekte sa ki zot pe fer.

Me selman mon ti a kontan vin anmenn 2 nide. Enn, mon ti dir koumsa vi ki SACS pa pe anmas larzan okenn landrwa kot dimoun pe perform bann landrwa piblik, bann lotel, bann – tou bann landrwa kot i servi lanmizik.

Radyo i peye. Televizyon i peye. Me bann lezot landrwa kot i servi lanmizik an piblik pa peye. Zot pa kolekte. Par egzanp Stad Lanmizik, Teat

Nasyonal, ICCS, se bann landrwa Leta kot ti devret anmase.

Akoz parey nou Kreol nou dir, lonnekte i konmans dan lakour. Be mon ti ganny mal pran. Mon ti ganny tre, tre mal pran ki mon ti sorti la desi. Ok. Me mon dakor ek ou ki i annan en kantite rannman. Tou sa ki ou pe dir i vre. I annan en kantite rannman ladan. Mwan ler mon ti fek – mon kontra 2an ti fini ek sa bann Franse, sa lepok “Bwa Gayak”.

Pandan sa prosen 15an mon ti ankor pe tous drwadoter an *Euro*. E mon ti kapab fer vantar par dir mon pa pou al dan lotel pou al *jingling* avek mon gitar. Akoz regilyerman ou ti a pe kolekte.

E mon krwar tou sa bann artis nou devret sanz – nou devret sanz sa peizaz kot artis i devret ganny son reminerasyon parey fodre, en pti pe parey radyo ek televizyon pour lemoman i peye.

Me selman, pa tou sa bann *broadcaster* ki peye. Donk, la osi i annan travay pour nou fer. Mersi pour ou kestyon. En tre bon kestyon.

MADAM CHAIR

Mersi. Nou'n aprezan ariv a lafen nou kestyon. Mersi Mr Victor. Nou ava eskiz nou dan

Chamber e nou ava resorti dan *Committee Stage*.

MR PATRICK VICTOR

Mersi bokou. In en plezir. In en loner pou annan sa pti antretyen avek zot bomaten. Mersi.

MADAM SPEAKER

Bon nou ava aprezan pran okenn entervenans. Onorab Aglae.

HON EGBERT AGLAE

Mersi Madanm Speaker. Mon a dir bonzour tou Manm Onorab ek tou dimoun ki a lekout.

Madanm Speaker, Mr Patrick Victor ki'n fek sorti la devan nou i en zonm ki in kit son mark lo lasenn kot i konsern kiltir. I pa zis en santer. I en konpoziter. I en mete ansenn tou. E i osi en ankadrer. E osi en *producer*. Tousala i dan li tousala.

Letan mon'n ekout li pe reponn bann kestyon bann Manm, in servi en term ki osi mon'n touzour pe mazin lo la kot i konsern nou kiltir, nou tradisyon. E li in dir re pans kiltir. Ok.

E pour mwan sa i vedir ki, letan nou pe koz panse – e la nou pa pe koz panse dan – si mon pe konpran li byen. Akoz i annan 2 term, 2 diferan konotasyon avek sa term repans - repanse.

Enn se re al imazinen dan en sans. *Go back to the drawing board* parey nou dir. E en lot konotasyon ki nou kapab tire ladan se letan ou pe koz panse, an term medikal se, panse pou geri en keksoz ki'n arive. *Ok.*

E la mon le pran sa bout dernyen la. Kwa ki'n arive avek nou tradisyon, nou kiltir Sesel? *Ok.* Mr Faure ti ganny nominen avan sanzman 2020 koman en Anbasader kiltirel. Wi, Anbasader Victor.

E mon panse sa desizyon ki ti pran sa letan sete pour li kapab re anmenn sinerzi avek bann akter. Nou annan bann departman. Nou annan NAC, nou ti annan CINEA, Nou ti annan leritaz kiltirel, bann departman ki ti pe promot e valoriz kiltir e tradisyon Sesel. *Ok.*

E letan mon'n ekout li, i pa'n ganny sans fer sa travay li. *Ok.* Sanzman ti vini, mwan mon pa pou al dan sa bann detay o profon. Sanzman ti vini. Sa Gouvernman ti annan son panse, son fason fer.

E zot, zot ti etabli en lot striktir pou sey revitaliz lar, kiltir tradisyon. Me pa'n sitan marse. *Ok.*

E mwan mon panse ki la i annan en lot sans la devan nou la, pour nou kapab servi en Anbasader ki ava pli devan avek promosyon valorize e sirtou, anmenn larelev dan

nou kiltir e nou tradisyon ki i manke.

Letan ou'n dir manke, sirtou dan domenn touristik kot plizyer fwa ansyen Minis ki ti pe zer touris, Minister Radegonde ti vin avek bann propozisyon devan pou met valer azoute e fer kliyan depanse ler i vin Sesel. E sa ti pou dekoult dan tou kominote. Tou kominote.

Ankor enn fwa, sa pa'n arive. I annan diferan rezon ki ti ganny site. I annan bann rezon parfwa ki en pe birokrasi birokratik ki pa'n permet sa arive.

Madanm Speaker, mon krwar in ariv en moman letan pour tou sa bann akter asiz ansanm. NAC, Leritaz. I annan lezot lorganizasyon ki mon'n vwar la ki pe zer domenn kiltirel – Departman Kiltir. *Seychelles Cultural Foundation, CINEA.*

Tousala mon krwar ozordi si Legzekitiv pe ekout nou. E Prezidan ki latet Legzekitiv se pran tou sa bann antite met ansanm lo en sel latab. Akoz mon konnen poudir i annan serten panse divizyon ki egziste. Sakenn i le fer pour li ouswa pe mars lo lipye kanmarad la.

Petet i annan pou ekout mwan pa pou kontan sa ki mon pe dir, me *it's high time. It's taxpayers' money* ki pe pey laplipar sa bann antite pou

fonksyonnen tou le lannen. E nou, nou *vote* lo Bidze, met zot lo en latab. Annou tras en larout la prezan.

Depi ki mannyer nou pou al anmenn larelev avek nou bann zenn pou valoriz e promot nou kiltir e tradisyon. E osi bann ki pe performen ki'n etabli zot non. Pran zot met ansanm. Fer zot travay ansanm. Met diferans de kote.

E osi sa konponan enternasyonal. Donn loportinite, pa zis serten ki pou partisipe letan i annan bann rekognisyon ki arive.

Mwan mon'n koz ek plizyer artis. E dernyen antretyen ki mon ti annan ek en artis se Mr Jean Marc Volcy. Ki li i krwar nou bezwen annan en lakademi ase serye ki a ganny finanse avek sekter prive.

An menm tan, Gouvernman i ava annan son bout pou kapab promot sa bann diferan lar ki egziste e dan nou kiltir. E sa, mwan mon pase i en keksoz ki pou anmenn larelev ki nou bezwen.

E Mr Patrick Victor ki'n la devan nou i pou enn sa bann dimoun enstrimantal ki pou *knock on doors*. I ava enn sa pon e sa mayon ki kapab anmenn sa *link* Gouvernman ek *private sector* avek sa bann lazans pou fer marse e revitaliz nou kiltir dan son totalite.

E mwan mon en dimoun ki mon ti a kontan war sa arive, *otherwise*, nou pou – nou pei pe ganny anvai par bann *trend western*. Napa problem ek sa. Me selman, nou bezwen konsyan poudir kot nou sorti, nou osi annan en kiltir.

Mon pran en senp legzanp, ou al Moris - Moris, Morisyen dan tou pti kwen. I valoriz son sega Morisyen, son pti melodi ki zot kontan laba. E tanzantan zot annan serten pti festival ki zot organize.

Be aköz nou Sesel nou pa kapab annan en *sort of* model ki kapab anmenn sa, e met resours? Pa kit keksoz santral dan sa bann antite ki pa dekoule parfwa.

Aküz parfwa ler ou annan en aktivite pou fer ou bezwen konmsi al *beg* pour ou ganny resours pour ou fer aktivite ki konsern larelev nou tradisyon, nou kiltir? Be sa fodre nou arete sa.

So, parey dikton i dir; en pei osi i ganny zize par son kiltir. E bokou etranze ki anvi vin Sesel, ler zot fer resers zot pa pe get zis *the* – sa labote. *The sea, the sun, the greenery*. Me osi i enterese ek son kiltir. Depi son lakwizin, depi bann aktivite lwazir ki annan pou fer ek kiltir.

So, *its high time* parey mon'n dir, pour nou met sa bann antite ansanm asize

vwar, tras en semen pour nou kapab fer sa arrive.

So, mon panse ki - mon *believe* ki Mr Patrick Victor i pou vin en bon Anbasader pour Kiltir e mon swete ki kapab anmenn sa sinerzi pou releve tradisyon e kiltir dan Sesel. Mersi Madanm Speaker.

MADAM SPEAKER

Onorab Vidot?

HON AUDREY VIDOT

Mersi Madanm Speaker pou donn mwan laparol. Madanm Speaker, sa ki mon kapab dir bomaten – ozordi bomaten lo Mr Patrick Victor se ki mon apresye son lentegrite. Diran son personnalite. Son langazman dan son karyer.

E in donn nou en apersi bomaten lo son parkour lavi. Me an menm tan, fer ou reviv sa laspe kiltirel e tradisyonnel dan son koze.

Mr Victor, san dout son abilite, son kapasite leksperyans ki i annan i kapab fer en gran diferans koman en Anbasader Kiltirel pour Sesel. In deza pe fer li, me la i kapab anmenn li atraver nou laprouvasyon lo son nominasyon. Donn li sans pour li kapab fer bokou plis.

E byensir, mon mazine avek nouvo ladministrasyon pou donn li ankor sa sans nominasyon pou resevwar sa pozisyon, mon mazine ki

ladministrasyon in pare pou met resours pou ki i permet Mr Victor kapab delivre e fer kwa ki egzize.

Pour ki pep Seselwa nou vwar en sanzman dinamik. En sanzman pozitiv kot nou kapab vwar kot nou leritaz kiltirel, nou tradisyon Seselwa, tou nou bann valer, nou bann talan ki egziste i ganny byen valorize, byen ganny promote.

Pour ki nou reviv en pti pe nou bann tradisyon parey lontan kot nou ti vwar serten vibrasyon dan nou bann kominote dan pei. Kot nou laspe kiltirel i pa ganny zis ganny rekonnet dan bann letan Festival Kreol. Me diran lannen kot nou vwar i annan loportinite ki ganny kree.

Sesel nou bezwen nou vwar kot nou annan en dimoun ki vin sa entemedyer ant diferan kiltir pou kapab fasilite e adopte bann bon pratik; bann diferan kominikasyon avek bann diferan lorganizasyon enternasyonal e menm lokal pour nou kapab elev en pti pe nou laspe kiltir Seselwa e anpese ki nou perdi nou bann bon valer kiltirel e tradisyon.

Nou bezwen vwar kot bann lide i ganny byen ganny valorize. I ganny promote. E kot nou vwar kot dan diferan laspe, ki swa dan lakwizin, tradisyon Kreol. Ki swa dan

teat. Dan lar. Dan lanmizik. Dan nou bann moniman nasyonal, pour nou vwar kot nou vremen nou lidantite kiltirel i ganny promote, i ganny valorize. E pour ki i pa perdi avek zenerasyon ki pe leve.

Nou bezwen dan sa moman la, i annan en dimoun ki zwe en rol krisyel, kot byensir bann diferan artizan, bann artis. Dimoun ki pe montre dan parey mon'n dir dan diferan laspe group lar, kot zot pe promot sa latous Kreol.

Zot ganny en dimoun ki pare pou rod loportinite pou ed zot kapab antreprann bann diferan levennman, ki swa traver bann seminar ki ed zot kapab devlop zot bann abilite personnel, ed zot kapab promot zot bann prodwi.

Ede pou kapab kree plis sa lanbyans kot nou vwar kot i annan bann festival. Kot nou valoriz en pti pe bann diferan latous lar ki egziste, pour ki i pa perdi. E diran lannen nou kapab dir poudir i annan en varyete e pei pa dormi. I annan sa lanbyans.

Zis parey nou letan nou kit Sesel nou al vizit lezot pei, nou pe apresye bann lezot diferan kiltir pei nou kanmarad. Me nou bezwen ki nou osi nou viv nou kiltir. E ki Seselwa, etranze enkli Seselwa

ler i Sesel i kapab zwir parey e war li benefisye.

E sa bann travay ki Mr Victor in fer dan lepase, byensir menm si i pa ti ganny sans pour li vin ganny son nominasyon pase pour li kapab fer bokou plis, avek sipor byensir resours pour li kapab enplimant son plan travay.

Mon swete la avek sa nouvo ladministrasyon e byensir avek nou sipor nou Lasanble Nasyonal, i ava ed li pour li kapab ed nou bann distrik, enkli pei pour nou kapab vwar kwa ki nou kapab anmennen an plis pou fer sa diferans. E san dout, donn valer bann diferan akter.

Parey in dir, bann aktivis kiltirel. Kiltir, Bann dimoun ki sitan respekté nou bann leritaz ki pa anvi war nou bann leritaz ganny detri. Ganny mank respe. E atraver Anbasader Patrick Victor, byensir mon asire i pou kapab fer sa ganny respekté, ganny plis valer e pli byen ganny vwar poudir zot pe ganny valorize pour zot travay ki zot pe fer.

E mwan mon pe demann Lasanble an antye pour nou aport nou soutyen, nou sipor avek Mr Patrick Victor ozordi bomaten, pour ki bokou nou ki'n enterakte avek li, ki'n konn li, ki nou konnen san dout avek son leksperyans,

son bann mark ki in kite. I kapab ede fer pli gran diferans pour Sesel e pour nou kiltir e pour nou tradisyon Seselwa.

Alors mwan lo sa note, mon pou aport mon sipor e soutyen pour son nominasyon. E mon a demann lezot osi pou konsidere. Mersi Madanm Speaker.

MADAM SPEAKER

Onorab Lepathy.

HON NELSIA LEPATHY

Mersi Madanm Speaker pou donn mwan loportinite pou dir enn de mo pou siport nominasyon Mr Patrick Victor.

Mr Victor i en sitwayen Seselwa ki annan rikord ekstraordiner parey nou konnen, dan servis pou promouvwar nou lidante nasyonal e osi kiltirel.

Pandan son lavi antye in dedye son lekor pou avans kiltir Seselwa e promot nou kiltir atraver son lar e son lanmizik, ki'n fer li ganny rekonnet nasyonalman e osi enternasyonalman.

I enn sa zanfand ordiner Kreol Seselwa ki vreman annan son kiltir aker. E parey in dir pli boner, i anvi vwar nou kiltir vin pli vibran. Konpetans Mr Victor dan sosyokiltirel Sesel, ansanm avek son kapasite pou reprezant pei lo platform

mondyal i fer li sa kandida ideal pour Lanbasader.

Son nominasyon pou ranforsi prezans diplomatik Sesel e ankouraz osi lesanz kiltirel avek lezot kiltir. Sirman, Mr Victor pou en Anbasader ki pou promot e defann tou sa ki pour Seselwa. Sa pa zis lo kote kiltir. I osi depi lanmour Seselwa, son soufrans, son lespwar, son labote, son bann defi, nou lazwa. E osi bann moman lafet.

E mon demann tou bann Manm Onorab pou donn zot sipor nominasyon Mr Victor. E sa i ava osi montre ki nou pe donn nou sipor nou kiltir Seselwa. Mersi Madanm Speaker.

MADAM SPEAKER

Mersi. En dernyen entervenand avan Onorab Lemiel i fer *right of reply*. Onorab Herminie.

HON WILBERT HERMINIE

Mersi Madanm Speaker. Madanm Speaker, mon pa pou long aköz bokou in ganny dir. tou in ganny dir par mon bann koleg oparavan. Selman i pa pou fer zistis si mon pa azout enn de mo.

Parey nou konnen, Mr Patrick Victor in domin sa size ki nou'n koze la ozordi e in fer en tour lorizon lo bann keksoz ki i pe vin avek e bann keksoz ki i ti a kontan war arive. Nou

konman en pep, nou kiltir i enportan pour nou. I pa'n zis dan domenn lanmizik, me osi dan domenn lar, kote nou lakwizin, kote nou ladans e kiltir an zeneral.

So nou'n koze bokou lo la. E mon konnen Mr Victor i annan sa kapasite pour li kapab rezourd serten problem ki nou annan, Sirtou lo lavant bann artis, Sirtou bann pent avek lotel. Nou bann skripter avek lotel pour zot kapab ganny en pli gran louvertir pour zot kapab vann zot prodwi e pour zot kapab ganny en reveni.

E mon konnen osi i en plan Mr Victor pour li kree en vilaz kiltirel ki sa i en plan ki mon krwar i pou develop nou kiltir. Pa zis nou kiltir me nou Sekter Touris ki bokou mankman i manke, sirtou ler bann touris i annan bann – pe rod akse avek nou kiltir.

So sa landrwa i a vin en *one stop shop* pour nou kapab demonstre e prodwi nou – montre nou bann lar e diferan laspe ki pou annan pou fer avek nou kiltir.

E Madanm Speaker, mon pou terminen osi tou pour nou dir ki – pour mwan dir ki i enportan ozordi ki nou koriz sa lenzistis ki ti arive dan 6enm Lasanble.

So, mon pe demann tou Manm pour nou kapab donn Mr Patrick Victor sa sans pour

li kapab demontre son abilite lo kwa ki i kapab fer. E mon pe lans en lapel ek tou Manm pou annou siport li e donn li sa sans. Mersi Madanm Speaker.

MADAM SPEAKER

Mersi. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, ozordi devan nou nou'n vwar en gran lezand, mizisyen nou kapab dir, Mr Patrick Victor ki'n vin devan nou, ki'n vin koz en pti pe lo li menm. Son pasyon ki i annan pour diferan form kiltir.

E son pasyon osi pou prezerv kiltir Seselwa, espesyalman moutya ki nou konnen in en dimoun ki'n toultan par deryer sa linisyativ kot moutya i ganny rekonnet par UNESCO. E in lager, in lalit avek serten lezot artis ansanm pour sa arive. E sa in arive.

Madanm Speaker, si nou retras en pti pe parkour Mr Patrick Victor. Letan mon pe regarde, le 7 Out 2019 ti annan en Mosyon ki ti bezwen ganny *withdraw* isi par ansyen LGB, Onorab Charles De Commarmond ki i ti bezwen *withdraw* en Mosyon ki i ti'n anmennen pour nou apwent Mr Patrick Victor koman *Ambassador at large* pour Repiblik Sesel.

Sa ti arive aköz sa letan la Lasanble 15 lo 10 e i ti fer ki

i napa serten konsansis pour ki apwentman Mr Patrick Victor i ganny pran plas. E se la ki Prezidan Danny Faure ti apwent li konman *Honorary Ambassador* pour Kiltir isi Sesel.

E zis apre in vin *COVID*. E i fer ki petet bann travay. Sa bann kantite travay ki li i ti pe mazin. Son plan ki i ti annan pou fer. Petet si i pa ti'n reisi pour li kapab fer tou.

Ozordi Madanm Speaker, i en plezir pour mwan. I en loner osi mon krwar pour nou Lasanble pour nou vremen aprouv nominasyon Mr Patrick Victor konman sa Anbasader pour Sesel.

E mon ti a kontan ki ozordi nou fer en diferans nou tou. Annou koriz sa ki'n pase 2019 e nou tou nou'n vin ansanm konman en Lasanble, e nou'n siport enn nou frer ki nou santi i annan sa gran konesans, sa gran konpetans. E ki i pou kapab anmenn kiltir Sesel odela.

In deza ale reprezant nou aletranze an sa ki konsern kiltir. E annou formaliz son pozisyon konman Anbasader ozordi. E mon demann nou tou pour nou aprouv nominasyon Mr Patrick Andrea Victor konman *Ambassador Extraordinary and Plenipotentiary* pour Repiblik Sesel. Mersi.

MADAM SPEAKER

Mersi. In arive ler prezan pour nou prezan pran en *vote* lo Mosyon.

"In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr. Patrick Andrea VICTOR as Ambassador Extraordinary and Plenipotentiary of the Republic of Seychelles".

Tou bann Manm ki annakor? Mersi. Okenn Manm ki kont? Mersi. Lo *vote* lo Mosyon i ki 18 Manm in *vote* pour e 11 in *abstain*. Alors Mosyon in pase.

Nou ava prezan pran en *break* ziska 11er kot nou pou retournen pour nou vwar lot *nominee*.

(BREAK)

MADAM SPEAKER

Bon nou ava rebran *next item* lo nou *agenda* ki dernyen Mosyon Onorab Lemiel.

HON SYLVANNE LEMIEL

Mersi Madanm Speaker, *In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr. Nicolas PREA as Ambassador Extraordinary and*

Plenipotentiary of the Republic of Seychelles. Thank you.

MADAM SPEAKER

Onorab Vidot.

HON AUDREY VIDOT

Motion seconded Madanm Speaker, *thank you.*

MADAM CHAIR

Mersi. Nou ava prezan al dan *Committee Stage*, e nou ava resevwar Mr Prea, dan *Chamber*. Bonzour Mr Prea, si ou kapab fer en pti prezantasyon pour nou bann Manm silvouple.

MR NICOLAS PREA

Mersi Madanm Chair. Bonzour Madanm Chair. Bonzour *Deputy* Speaker. Bonzour *Leader* Zafer Gouvernman, e bonzour tou Manm Onorab. E mon ti a kontan dir osi en bonzour tou bann dimoun ki pe swiv travay Lasanble Nasyonal.

Mon ti a kontan premyerman remersi Prezidan, Minis ek *PS* Zafer Etranzer pour zot konfyans ki zot in met dan mwan. Madanm Chair, mon ti a kontan osi dir bonzour *Leader* Lopoziyon, dan Lasanble Nasyonal.

Ozordi mon'n retourn dan Lasanble Nasyonal kot mon'n pas plizyer lannen, e pour mwan i en loner pou

adres ou Madanm Chair, ek tou Manm Lasanble.

Set avek bokou imilite ki mon prezant mon avek zot ozordi. Mon apel Gerard Nicolas Prea, ne e grandi dan distrik Bel Ombre. Mon'n lekol primer Bel Ombre - sa lepok ti apel lekol St Roche Bel Ombre, e mon'n fini mon segonder kolez e politeknik.

Aprè sa mon'n travay plizyer landrwa ki enkli *Cable & Wireless*, Lopital Sesel avek the *late Doctor* Souyave, e osi tou dan Lotel *Masons*.

Mon ti komans mon karyer politik an 1998, e mon ti ganny elekte koman manm pou distrik Bel Ombre an 2002. Mon ti osi re ganny elekte an 2007, e 2016. An 2016, mon ti osi ganny elekte Deputy Speaker, e aprè an 2018, mon ti ganny elekte Speaker par 6enm Lasanble Nasyonal.

Pandan tou sa bann lannen mon'n reprezant Lasanble, e mon pei dan plizyer foronm enternasyonal. Mon ti manm Zafer Komite Zafer Enternasyonal depi 2002 ziska 2011.

Mon'n manm Komite *Common Wealth*, *IPU*, e *SADC-PF*, kot mon ti en manm Komite Egzekitiv. Dan Lasanble mon'n servi lo plizyer Komite tel ki *Bills Committee*, *Standing Orders Committee*, *TRNUC*, e osi *IAC*.

An 2007 ziska 2009, mon ti pran par dan travay delegasyon Sesel pou zwenn WTO, e sa ti mwan avek Onorab Waven William koman de Manm Komite Zafer Etranzer IAC.

Mon'n osi Manm IAC depi 2004 ziska 2009, pour asiste e swiv travay bann diferan delegasyon dan negosyasyon EPA – (*Economic Partnership Agreement*)

Atraver mon bann diferan langazman a etranze mon'n promot e defann lentere Sesel. Konm en pti leta zil e dan bann *meeting IPU* an 2019 an Laserbi, Sesel ti sanpyon sa Lasanble Zeneral avek Mosyon sanzman klima, e vilnerabilite bann pti leta zil.

Mon'n osi touzour siport devlopman soutenab e plis lenvestisman dan lenerzi renouvlab. Lo kote SADC PF mon'n ede avans devan plan pou annan en Parlman Rezyonal rezyon sid Lafrik.

Mon ti negosye retour Parlman *Madagascar* dan SADC PF, koman en manm Komite Egzekitiv SADC-PF, mon'n osi ede pou anmenn reform dan sa sekretarya pou annan plis *accountability* e latransparans.

Lo kote lokal anba mon *Speakership*, mon ti komans demars pou Lasanble ganny son lotonomi finansyel. I pa ti al tro lwen mon konnen

ansyen Speaker, in seye e mon aprann Madanm Speaker, Madanm Chair, ou osi ou pe lans ou dan sa demars.

Mon ti profite ler mon ti ganny elekte koman Speaker, pou deklar rol Speaker, koman endepandan, e enparsyal. Mon kontan ki sa ozordi pe ganny *uphold*, e pe ganny anmenn pli lwen.

Mon'n fer Lasanble vin pl amikal ek lanvironnman kot ozordi nou'n ranmas, nou'n kapab ranmas delo lapli pou plizyer rol, me *mainly* pou servi dan nou zarden.

Mon ti *spearhead* lenstalasyon, e osi tou komisyon sistenm pano soler pour nou elektrisite pour sa lenstitisyon. Mon'n fer bokou ankor pou promouvwar Sesel aletranze, e osi ede dan devlopman nou zenn demokrasi dan Lasanble.

Mon pa en diplomat par karyer, me mon'n fer bokou pou reprezant, defann, e promot lentere Sesel. Alor, mon konpran sa nouvo responsabilite, e avek led bann teknisyen byen ankadre, e en PS, e en Minis solid kot Minister Zafer Etranzer mon'n pare pour sa *challenge*.

Mon santi Madanm Chair, Sesel i pour nou tou e i reste pli gran ki nou, e mon pare pou servi mon pei. Lapel in ganny fer, mon'n reponn. Vwala an bref mon parkour, e

mon demann zot bann Manm Lasanble pou konsider e aprouv mon nominasyon. Mersi Madanm Chair.

MADAM CHAIR

Mersi. Nou ava prezan pran kestyon. Onorab Robert David.

HON ROBERT DAVID

Mersi Madanm Speaker. Bonzour Madanm Speaker. Bonzour tou Manm. Osi tou bonzour tou bann dimoun ki pe swiv nou travay Lasanble Nasyonal ozordi.

Mr Prea, bonzour e *welcome* ankor dan Lasanble Nasyonal, e felisitasyon pour ou nominasyon. Madanm Speaker, avek ou permisyon permet mwan zis zwenn ansanm avek kominote Mont Buxton e kominote bann manrmay NYS, bann kanmarad NYS pou partaz nou kondoleans avek fanmir Ms Sarah Estro, ki'n kit nou.

So, ler mon get ou CV Mr Prea, mon war ki ou'n deza Sekreter Zeneral, ou'n en kandida Vis- Prezidansyel dan Eleksyon Prezidan, ou'n en *Chief Whip*, e osi ou'n Depite Speaker kot Lasanble Nasyonal.

Prezidan Larepiblik Dokter Patrick Herminie, in fer resorti dan enn son bann lektir ki mon pou *quote* ki dir koumsa, “nou pa devret les

desten”- eskize. “Nou pa devret les desten nou nasyon ganny dikte par zentere etranze oubyen move ladministrasyon anndan pei. Nou bezwen lev ansanm koman en sel e avek kouraz reafirm nou kontrol lo nou lekonomi, nou bann lenstitisyon ek nou idantite.”

Mr Prea, si Lasanble Nasyonal i aprouv ou nominasyon koman Anbasader Ekstraordiner ek *Plenipotentiary* pou Larepiblik Sesel, ki mannyer ou santi sa bann leksperyans ki ou'n akimile atraver ou parkour profesyonnel, i ava ed ou pou pli byen desarz ou fonksyon koman en Anbasader? E dezyenmman, ki sa nominasyon i vedir pour ou? Mersi Madanm Speaker.

MR NICOLAS PREA

Bon. Mersi Madanm Chair. Mon ava pran ou dezyenm kestyon avan. Pour mwan i vedir bokou, aköz parey mon'n dir dan mon konklizyon e mon kontan servi sa dikton, “pa demande ki ou pei i kapab fer pou ou, me kwa ki ou kapab fer pou ou pei.”

Lapel in ganny fer mon'n reponn, e ozordi mon la devan zot. Byensir, kwa ki mon pou kapab fer? atraver mon leksperyans mon'n touzour vwar mon pe defann pozisyon Sesel, lentere Sesel.

I annan Manm ki'n vwayaz avek mon i annan Manm ki isi, i ankor isi dan sa Lasanble zot in vwar kot malgre mon parkour politik, lemoman ki nou kit pei nou anbank dan sa avyon nou en delegasyon, e sa delegasyon se delegasyon Sesel, tou keksoz i ganny met a kote partizan politik, tou zafer i met a kote.

E nou tou nou ale nou al travay pou rod sa ki pli byen pour Sesel, reprezant nou pei, defann lentere nou pei, e promot nou pei. Mon *believe* dan sa trwa prensip, e si Lasanble i aprouv mwan se sa, sa trwa prensip ki pou gid mwan. Mersi.

MADAM CHAIR

Onorab Vidot.

HON AUDREY VIDOT

Mersi Madanm Chair. Bonzour Mr Prea, felisitasyon pour ou nominasyon. Mon a profit sa moman osi pour mwan dir ou mersi osi dan letan ki ou'n servi dan 6enm Lasanble koman Speaker.

Ou'n en dir bann ki'n osi pe enport nou a sa lepok nou ti dan diferan parti politik. Me selman nou ou *leadership* in koman en zenn Manm a sa letan 29an, mon'n aprann en kantite atraver ou fason, ou leksperyans koman Speaker, koman en Manm Lasanble.

E mon'n tir en kantite lesan dan lafason ki mannier ou ti travay, e pour sa mon a dir ou mersi koman en Manm ki'n ganny sans enterakte avek ou.

Mr Prea, swivan ou parkour dan politik tout an respektan ou lopinyon a sa letan, e ozordi osi letan ou ti sorti koman Speaker, apre sa nou pa'n tann ou ditou dan politik.

Me la nou vwar pou dir ou'n ganny nominen par Gouvernman dizour *United Seychelles* pour ou vin en Anbasader. Kwa ki'n enspir ou pour ou aksepte sa nominasyon?

E diran prenon kont ki ou'n pran en pozman dan politik, kwa ki'n enspir ou koman en dimoun ki dan ou parkour ki'n angaze dan devlopman ou pei, ki'n toultan koz libreman lo ou pwennvi, e ou kontribisyon ki ou'n fer?

Byensir parey ou'n eksplike dan lentere pei, kwa ki'n vreman fer ou pare la ozordi pour ou pran en responsabilite parey Anbasader pour Sesel?

E kwa diferaman ki ou santi diran ou karyer ou kapab anmennen an plis pour benefis pei, e pep Seselwa pou kapab nou Lasanble byensir donn nou ankor sa langazman pour nou kapab aport sipor pour ou nominasyon? Mersi.

MR NICOLAS PREA

Mersi Onorab. Bon, i vre ki mon'n absante pandan 5an e pandan 5an mon kapab dir mon a servi sa term angle mon'n *idle*, mon'n seye kit mon lekor *busy* i pa'n fasil.

Ou konnen ou'n abitye fer en travay, ou'n abitye angaze avek diferan dimoun avek diferan mantalite *and all that*, apre soudan ou war ou, ou tousel petet mon a servi sa lekspresyon, rezete.

Me mon'n sey kit mon lekor *busy*, e avek bann pti keksoz ki mon'n kapab pas mon letan avek, mon'n vwar mon dan sa moman osi tou petet pas en pti pe plis letan avek mon manman, mon'n malerezman mon'n perdi mon papa 2021.

Me mon'n pas mon letan avek mon manman, avek enn mon gran frer ki ti bezwen en pti pe latansyon anvi zot sityasyon lasante. Me sa i pa'n zanmen anpes mon konmsi swiv en pti pe keksoz ki mannyer pe marse, kit mon azour avek sityasyon politik dan pei.

Me lo kote sa lapel, sa apwentman mon'n, mon pa ankor zwenn Prezidan Elekte, mon konnen sa i son prerogativ ki mon nominasyon in ariv devan zot ozordi, mon'n rankontre Minis Faure, Minis Zafer Etranzer, mon'n

rankontre PS Mr Ian Madeleine, nou'n dyaloge *and all that*, e parey mon'n dir atraver mon bann leksperyans, atraver bokou konnesans osi tou ki mon'n fer deor i pa fasil bokou ler mon dir i pa'n fasil, i pa'n fasil pour mwan pandan 5an.

Me selman mon annan kontak avek bokou - mon ankor reste an kontak avek bokou ki ankor la dan bann lorganizasyon, e menm dan bann Gouvernman, kot a en moman i ganny elekte *out* apre ou war li i retourn dan lofis swa koman en Manm Parlman, swa koman en Minis *and so on*.

So, mon mazine kot mon ava travay kot mon ava pe ale mon kapab renouvle sa bann kontra ankor, e ankor parey mon'n dir, rod sa ki meyer pour Sesel.

Enn bann dimoun ki'n reste touzour an kontak avek mwan i former Sekreter Zeneral IPU Madanm Gabriella Balonne, ki ler mon ti Speaker, i ti vin isi i ti vin vizit nou Lasanble. In touzour en zenn madanm ki'n enspir mwan, ozordi dan son pei i pe travay en pti pe dan politik mon kapab dir, i dan son Gouvernman laba i pe ed en pti pe ek son parti politik.

Me in touzour reste an kontak avek mwan, e li in enn toultan ki'n dir ek mwan, "pa

zanmen *give up*, kontinyen.” me an gro atraver mon leksperyans mon pou kote mon ava ganny poste mon pou travay tou pour lentere nou pti pei Sesel. Mersi.

MADAM CHAIR

Onorab Lepathy.

HON NELSIA LEPATHY

Mersi Madanm Chair. Bonzour Mr Prea, mon oule premyerman felisit ou Mr Prea, pour tenir lo ou prensip koman en Seselwa, e reste lwayal anver ou pei Sesel, e san dout mwan mon asire ki ou pou reprezant Sesel e Seselwa tre byen.

Mon kestasyon pour ou i, ki mannyer ou leksperyans koman Deputy Speaker, e osi Speaker, Lasanble Nasyon pou ed ou diriz en misyon diplomatik ? Mersi.

MR NICOLAS PREA

Mersi Onorab. Mon krwar bann Manm ki ankor la ler mon ti tenir sa de lofis tou lede kote latab in konnen lafason ki mannyer mon’n travay, e a tou moman mon ti *welcome* Manm lo tou lede kote pour nou kapab dialoge.

E parfwa, parfwa menm isi dan *Chamber* nou’n ariv lo bann pozisyon kot ti annan en term nou ti kontan servi, nou dan en lenpas e mon regard serten Onorab, ki la devan

mwan ki ankor la devan mwan, e parfwa ler nou’n ariv ladan menm petet dan Chair koman Speaker, ou santi ou osi ou war ou dan sa lenpas ki direksyon.

Me mon’n vremen apresye korperasyon bann Manm, e sirtou bann Manm ki annan bokou leksperyans, ki annan bagaz ki’n ede petet par ler nou apel sa deblok sa lenpas kot nou travay in kapab flow, e in deroul byen.

Leksperyans ki mon’n gannye dan sa de lofis, e leksperyans pou travay ansanm avek diferan karakter, sa osi i pou ed mwan, aköz kote mon ava ganny poste mon konnen mon pou al zwenn parfwa bann negosyasyon osi tou ki pa pou fasil.

Me i annan en keksoz ki ou fer ler ou pe reprezant Sesel, ou pa negosye pour ou, ou pa negosye lo ou menm. Ou touzour bezwen mazine ozordi avek teknolozi ou annan sipor en Minister dan ou pei a tou moman, i annan bann *Desk Officers*, i annan menm *PS Madeleine*, ki vremen, vremen konesan dan zot bann dosye, e se sa bann dimoun ki pou ed nou ki pou fer nou kapab travay.

E kot mon pou ganny poste osi tou i pou byensir donn mwan sa koudmen lo kote administratif en lofis *and*

so on, mon'n travay avek mon administrasyon isi tre byen as *Deputy Speaker*, as *Speaker*, e mon krwar mon pa vwar okenn difikilte koman mon pa pou kapab delivre. Mersi.

MADAM CHAIR

Onorab Herminie.

HON WILBERT HERMINIE

Mersi Madanm Chair. Bonzour Onorab Prea, *once a Speaker, always a Speaker*. So, *welcome* dan Lasanble again. Mon kestyon pour ou Onorab, nou konnen ki en pei pa kapab tenir lo son lekor dan en kwen, nou bezwen angaz nou avek lemonn pour nou kapab progrese lo tou nivo.

So, ou koman en Lanbasader ki pli gran forte ki ou pou vin avek pou ed pei kapab *achieve* son bann lobzektif lo en nivo enternasyonal? Mersi.

MR NICOLAS PREA

Mersi Onorab. Ankore mon pou sit en parol ki enn nou bann vedet isi dan sa Lasanble in dir, "Sesel ozordi pa kapab izole, lemonn in vin parey en vilaz global."

Me sa ii enportan osi tou negosyasyon par ler i kapab entans, akòz dan negosyasyon tou pei pe sey rode kote, kwa, ki kapab sorti avek pli byen pour son pei.

Mon'n vwar mon dan sa bann sityasyon, mon'n vwar mon kot mon pe lager menm dan en *Speakers' Meeting IPU* pour nou pouse pou sa pti pei ki apel Sesel, son Mosyon i pa an priyorite lo tou lezot Mosyon.

Mazinen ou annan lorganizasyon Palestine par egzanp, ki pe pouse pour en Mosyon vin devan anvi zot sityasyon ki zot pe pas ladan. Sa ti avan sa ki pe pase ozordi, plis ki 5an pase.

Ou annan bann pei Lafrik, anvi zot bann konfli entern ki pe- i annan lezot pei ki pe rod lo kote ekonomik, ou annan bann gro pir sans parey Lenn, parey Lasin, ki dan *IPU*.

Me ou pe negosye parmi sa bann zean, e finalman ou ganny ou negosyasyon i abouti dan keksoz, e ou vwar ou Sesel ou pe prezant devan en Lasanble Zeneral *IPU* ki konpri par lao 170 pei ki manm kot i annan bann gran, gran dimoun la.

Ou annan *Speaker* Parlman Langleter, ou annan bann *Speaker* diferan Parlman Lostrali, nou konnen Lostrali i annan diferan Parlman *and all that*.

Ou abouti dan ou negosyasyon, ou'n *strong* dan ou negosyasyon *ok*, e mon koleg ki ti la sa lepok Onorab William, Onorab Jenny

Letourdie, nou'n travay e nou'n kapab perse.

E sa i montre ou poudir lafors ki ou al avek dan bann negosyasyon ou kapab ganny keksoz pour pei. Dan sa vilaz global ou pa get groser. Ozordi i annan bokou pei ki pe fer bokou tapaz ki menm le enpoz li lo lezot pei, me sa pa pou fer en pei parey Sesel per.

Ozordi Sesel i ganny klase dan Lafrik, ozordi *focus* par bokou bann pei i lo Lafrik, me toultan mwan menm ler mon ti *dan SADC Parliamentary Forum* sa ti bann keksoz ki nou ti pe komans prepar nou, zour bann resours dan bann lezot pei i pe fini sa Kontinan ki zot in toultan *term* li koman *the Black Continent* en zour i pou vin enportan.

E la ozordi nou pe war son lenportans, me mon warning avek bokou bann pei dan rezyon SADC, se ou byen, ou resours i pour ou. Parey Sesel nou osi tou nou annan nou resours pour nou, e nou ki bezwen annan kontrol lo la, e nou ki bezwen dir ki mannyer nou pou zer sa resours, *ok?*

So, ler ou negosye ou bezwen negosye avek en lafors pour ou kapab ganny keksoz, e mon krwar ozordi Sesel depi ler nou'n retourn dan miltiparti, Sesel i en pei ki lemonn i rekonnet e respekte,

e se la lo sa *platform* ki okenn negosyasyon, okenn travay ki mon pou al fer Sesel ki mon pou anmenn keksoz. Mersi.

MADAM CHAIR

Onorab Trevor Louise.

HON TREVOR LOUISE

Mersi Madanm Chair. Bonzour Mr Prea, byenveni. Felisitasyon lo ou nominasyon. Mr Prea, mon kestyon pour ou se koman en Anbasader byento, i annan bokou bann loportinite ouswa bann antretyen ki bann lezot pei i anvi fer avek bann parti politik.

E resaman nou'n vwar dan dernyen eleksyon in annan bokou parti politik ki'n partisipe. Koman en Anbasader petet ki garanti eski ou kapab donn sa Lasanble byento ou en Lanbasader byento, ki ou garanti ou kapab donn ek sa Lasanble ki ou pou travay pour tou Seselwa pe enport ou afilyasyon politik, pe enport ou parti politik?

E mon anvi zis dir ki mon fyer pou war ozordi koman en ansyen Speaker, i annan bokou dimoun ki'n koz fortman lo ou *as a former Speaker*, e montre lapel senser Dokter Patrick Herminie, ki i vreman anvi inifye, e travay pour Sesel. Mersi.

MR NICOLAS PREA

Mersi Onorab. Mon krwar mon fason ki mon'n travay isi i deza met en fondasyon lo kote mon pou ganny anvoye, kote mon pou ganny poste, ki mannyer mon pou travay.

Byensir koman en Anbasader, si menm i annan en delegasyon Lasanble Nasyonal oubyen en delegasyon Sesel i vizit sa pei kot mon ganny poste, mon pou fer sir mon pou rankontre zot pou akeyi zot, e kot mon kapab ede mon pou ede.

Mon travay se, mon pa get kouler politik, mon ti fer sa byen kler ler mon ti vin Speaker, kot mon anvi travay pour mon pei. Parey toultan mon ti dir, "*show i run* anba dan *Chamber*, zwe i zwe anba dan *Chamber*." Mwan mon ti en refri, *ok*?

Mon pa enterfer dan deba, mon fer mon travay e mon aplik *Standing Orders* kot fodre aplike. Mon travay si mon ganny aprouve koman Anbasader, mon pou travay dan en fason enparsyal pou napa politik.

Ler ou pe pran en responsabilite parey, parey mon'n dir ou pe al travay pour ou pei Sesel ou pe al fer monte Paviyon Sesel ki reprezant nou tou la anndan, ki reprezant tou parti politik ki osi tou an deor sa Lasanble Nasyonal. So, mon bi e mon krwar mon'n

deza koman demontre sa pou travay pour lentere Sesel. Mersi.

MADAM CHAIR

Onorab Uranie.

HON ROCKY URANIE

Mersi Madanm Chair. Bonzour Mr Prea. Bonzour tou koleg Onorab. En bonzour spesyal pou tou zabitan Zil Pros ki a lekout.

Mr Prea, mwan mon kestyon i en pti pe pli personnel, pou kapab demontre ki kalite karakter ou annan. Mwan enn ki ti *witness* lo televizyon swiv Lasanble e osi lo medya sosyal, kot ti annan en lensidan ki ti deroule dan Lasanble kot en serten *MNA* mon pa anvi akiz personn. Me selman sa ti en fe, ki ti montre serten *disrespect* pou ou ler ou ti dan *Chair*.

E mon ti war ou ti tenir serten kalm. E mwan mon ti anvi konnen, eski ou pou kapab anmenn sa menm lapros si ou ganny mete koman Anbasader, dan nenport ki pei ler petet i annan bann lezot bann serten dimoun oubyen bann serten ki anvi enfliyans ou osi enpoz serten keksoz lo ou.

Eski ou pou kapab tenir sa menm lapros, sa menm karakter oubyen demontre en lot pli o nivo karakter pou

anmenn benefis pou nou pei Sesel? Mersi.

MR NICOLAS PREA

Mersi Onorab. Mon krwar sa mo lenfliyans i pa marse avek mwan. In ganny seye, me i pa'n marse. Ou konnen ler ou pe *chair* koman Speaker, ou pa kapab menm avan ou vin la ou pa kapab ni kapab dir prevwar koman deba i kapab ale. Koman keksoz i kapab arive, ki reaksyon en Manm.

Me ou bezwen pare pou nenport aktyalite, nenport keksoz levennman ki kapab arive. E bann keksoz ki'n pase, mon krwar mon'n dil avek dan en fason tre kalm. E parey mon'n dir mon'n aplik *Standing Orders*. Me tou sa i dan lepase, sa ki'n arive in arive. Tou dimoun in *move on*.

E toultan mon dir ler nou la anndan, nou pa ziz nou lekore. Se dimoun deor ki ziz nou. E se sa rezon ki ler ou ale ou al debout dan en lot eleksyon, zabitan, dimoun, deor Seselwa ki vote i pas sa zizman. Me aletranze mon pou travay.

Mon pou travay parey mon'n dir san okenn lenfliyans. Mwan ziska prezan dan mon karyer politik napa enn ki'n sey enfliyans mwan. Akoz mon krwar menm zot pou ler zot pran en pti bref lo mwan, zot poudir sa i pa en boug ki nou kapab enfliyanse.

Ler mon dir enfliyanse i kapab menm sey anmenn larzan *whatever*. I pa mars koumsa. Si mon koumsa ozordi dan mon senplisite, dan tou mon imilite se akoz sa zonm ki mon ete.

Si mon ti otreman petet mon pa ti pou la ozordi devan zot dan sa Lasanble pe vin demann zot pou konsider e aprouv mon nominasyon, pou mwan gannyen travay pou mon pei. Mon ti ava petet pli lwen. Mersi Onorab.

MADAM SPEAKER

Mersi. Mon pa pe vwar okenn lezot Manm ki oule demann keksyon. Mon ava prezan remersye Mr Prea, e eskiz li dan *Chamber*. Nou ava sorti dan *Committee Stage*, pou nou pran bann entervansyon.

MR NICOLAS PREA

Mersi Madanm Chair. Mersi tou Manm Onorab.

MADAM SPEAKER

Okenn Manm ki anvi fer lentervansyon. Onorab Aglae.

HON EGBERT AGLAE

Mersi Madanm Speaker. Mon ti a kontan dir de mo, mon pa pou long. Lo nominasyon Mr Nicolas Prea koman Anbasader. I en dimoun, i en zonm ki'n mon'n swiv osi letan mon ti pe swiv politik.

Mon pa ti ankor vin en politisyen, mon'n swiv li. E apre mon'n antre dan politik, mon'n ganny sans rankontre kanmarad dan bann parkour e menm lo nivo enternasyonal kot li *as Speakers has Head of Delegation* mon'n ganny sans *travel* ansanm dan bann misyon diplomatik ki nou ti annan pou fer.

E mon annan en gran respe pou Mr Nicolas Prea, akòz parey Onorab Georges ti dir avek Mr Pool letan i ti vin isi dan Lasanble "*what you see is what you get*". E nou tou dan lavi nou pas dan bann diferan leprev, moman ki fasil, moman ki difisil. E sirtou ler dan politik ou ekspekte ki parfwa ou pou pas dan move tan.

Me sa ki admir mwan avek Mr Prea, se ki in tenir ferm, in gard lafwa. Malgre tou sa bann storm ki i ti pe fer fas o bor li. E menm sis dan Lasanble Nasyonal letan in pran *Speakership*, in touzour gard son *calmness*. E osi sey balans parey in dir li menm, sey balans tou lede kote pou donn en *fair* Lasanble dan tou son splander mon kapab dir.

E Mr Prea, in san dout in kot en mark dan politik Sesel. In osi enn bann dimoun ki'n ede fer serten sanzman mon kapab dir dan la demokrasi nou pei. I annan son *background* edikasyonnel ki i

pou donn li son forte pou li kapab kontinyen fer en travay pou pei. E sa ki mon kontan se touzour i met Sesel.

Sesel an premye apre son lekor. E sa i en bann karakteristik enportan ki en zonm i avek sa nivo ki i ete pou ed li kapab desarz bann responsabilite dan sa bann *highest* fonksyon pli o fonksyon mon kapab dir ki pei i kapab annan osi, *ok*. I en Anbasader pou reprezant *la présidence* lo nivo enternasyonal.

E byensir i pou annan bann lyen kontak kot zot pou bezwen annan bann kominikasyon, malgre in dir pa ankor zwenn avek Prezidan. Me i pou annan son moman letan pou partaz vizyon ki byensir i nou parti. Nou annan en manifesto, me i osi annan en plan vizyon pou pei osi lo nivo enternasyonal ki pou bezwen ganny partaze. E la i ava kapab egzekite.

E osi an terminan se nou pe fer sa ki pe ariv se nou bezwen regard tou Seselwa, *ok*. Pe enport Mr Prea i en zanfan Sesel, e i kapab fer li. E dan okenn moman osi si i annan bann lezot lapwentman menm si pa lo nivo Anbasader ki pei i bezwen fer malgre bann diverzans lepase ko ti konsern politik.

Si pou anmenn pei devan, nou bezwen fer li. E

mwan mon pare pou donn sipor dan sa bann direksyon. So, mon napa okenn dout ki Mr Prea i pa pou delivre lo non Lepep Seselwa. E mwan mon apre pou siport son nominasyon ki la devan nou. Mersi.

MADAM SPEAKER

Mersi Onorab Vidot.

HON AUDREY VIDOT

Mersi Madanm Speaker pou donn mwan laparol. Madanm Speaker, letan nou pou pran sa desizyon ozordi pou mwan aport mon sipor e soutyen pou nominasyon ansyen Speaker Onorab Prea dan pozisyon koman Anbasader.

Mon pou fer li en pe dan menm lalinye ler mon ti lev mon lanmen pou siport nominasyon pou Minis Sylvestre Radegonde. Zot personnalite i annan sa similarite, 2 dimoun ki mon konnen pe enport zot lopinyon politik dan zot parkour karyer lavi. Zot in toultan annan en bi a ker. E sa se lentere isi Sesel, e lentere pep Seselwa.

Dan zot enteraksyon osi avek zot, zot 2 personnalite pe enport koman bann politisyen pe enport ki ou ki bor ou afilyasyon ou ete. Me sa lapros, sa karakter ki zot porte sakenn byensir i le son kalite. Me zot montre poudir zot bann

dimoun ki zot kontan zot pei, zot kontan zot sitwayen.

E nenport ki moman ki zot dan zot serten pozisyon ki zot gannnen pou zot deservi zot pei. Zot annan sa lentere, e byensir mon'n servi en pti pe lo Mr Radegonde akòz mon ti vwar serten similarite an term zot fason travay kot ki konsern Seselwa e pep Seselwa.

Me Ansyen Speaker Prea, mon leksperyans koman en Manm Lasanble dan 6enm Lasanble ler mont i fek komanse, in ed mwan koman en endividi, koman en zenn Parlmanter pou konpran e fason ki mannyer ou bezwen *cope* e travay pa zis koman en Manm Lasanble. Me osi koman en dirizan.

Tou an respektan bann lord, bann regilasyon lo travay Lasanble. E mon'n apresye lafason ki mannyer i ti fer son travay pe enport si nou kapab annan nou serten diferans dan lepase. Me mon'n aprann en kantite keksoz parey mon'n dir li bomaten.

E mon apresye sa, e mon'n remersi li pou sa osi ki bann bon valer ki mon'n kapab tenir avek li. Sa ki mon parmi osi se ki mon ti deza dir dan mon, dan enn mon bann *induction* dan ler mon ti antre dan la pou 8enm Lasanble kot mon ti pe partaz avek bann nouvo Manm se ki letan nou

bann Manm Parlman nou reprezant Sesel aletranze.

Nou pa regarde ki afilyasyon parti politik sa Manm ki pe akonpany ou. Me nou la koman en frer ek ser Seselwa ki pe reprezant nou lenstitisyon. E nou travay pou lentere pei, lentere nou lenstitisyon. E Ansyen Speaker Prea, i san dout sa dimoun ki mon konnen i pou kontinyelman atraver nou sipor pou son nominasyon dan pozisyon Anbasader, i san dout i pou fer en bon travay avek en konsyans kler.

E byensir son lentegrite i konfirm mwan personnelman pou krwar poudir i kapab fer bann bon negosyasyon, bon travay ki dan lentere pei e lentere nou sitwayen Seselwa. E son bagaz leksperyans ki in annan atraver dan son pozisyon koman en ansyen Speaker, ki'n en Manm Lasanble.

E osi dan sekter prive kot in ete in enterakte avek plizyer dimoun. San dout osi son bann keksoz ki in lite dan letan ki i ti dan Parti Lopozisyon, sa letan *SNP*. Kot in vwar i annan bann defayans lo nivo kominoter e lo nivo Sesel ki'n partaz son pwennvi atraver en loportinite. La i ava ganny sans pou li aport son kontribisyon vwar ki mannier si kot i ankor annan serten defayans, pou ede elev en pti

pe sa bann defi pou ki Sesel nou war nou pe avans devan.

Mon oule osi dan sa laliny kot nou pe koz lo nominasyon ansyen Speaker Prea. Mon ti a kontan felisit e dir mersi bann endividi ki'n rekonnet ki Ansyen Speaker Prea i annan sa potansyel pou li vin en Anbasader pou Sesel. Zot in vwar zot bann kalite dan li, mon mazine zot pep fer sa bon desizyon.

E mwan mon pou *trust the process* pou ki i a ganny sa sans pou li prouv son lekor kwa ki i kapab fer pou byennet pei. E montre poudir vreman *leadership* egzekitif ozordi zot vwar poudir zot pe met an pratik sa ki zot pe prese.

E sa se valoriz en dimoun anver son kontribisyon ki i kapab fer pou son pei, e sa kot i pou al reprezante pe enport *on background* oubyen son listwar parkour ki swa in dan politik oubyen non in endependan.

I son swa kot i sorti, me i pare pou li travay pou Sesel e pep Seselwa. E mwan mon pou demann Lasanble Nasyonal pou nou aport sipor pou nominasyon Ansyen Speaker Prea.

Mon byen kontan ki yer nou ti siporte pou ki en ansyen Depite Lasanble Nasyonal ek son bann konesans e bagaz ganny en loportinite.

Ankor la nou Lasanble nou pe donn en lot frer Seselwa ki'n pas atraver parkour nou lenstitisyon kot i donn laspirasyon lezot Manm ki enterese pou angaze dan politik, e dan Parlman ki i annan bann sans bann lezot pozisyon ki zot kapab byensir avek travay montre zot abilite.

E zot kapab avans devan zot osi e ganny en sans pou pran bann lezot responsabilite ki dan lentere Sesel e pou pep Seselwa. Mersi Madanm Speaker.

MADAM SPEAKER

Onorab Arissol.

HON SANDY ARISSOL

Madanm Speaker bonzour. Bonzour tou bann Manm e tou dimoun ki a lekout. Madanm Speaker, mon ti anvi dir detrwa mo an relasyon finisyon bann nominasyon ki'n ganny prezante devan Lasanble Nasyonal depi yer pou bann dimoun ki'n ganny nominen pou vin bann Anbasader avek laprouvasyon Lasanble Nasyonal.

Parey nou'n vwar lo nou *Order Paper* Lartik 64 nou Konstitisyon i fer provizyon. E pou bann dimoun ki pe ekoute deor Lartik 64 (1) i dir "Prezidan i kapab avek laprouvasyon en mazorite bann Manm dan Lasanble

Nasyonal apwent en dimoun koman en Anbasader."

So, sa ki nou pe fer Lasanble Nasyonal pe fer se sa ki Mr Patrick Herminie koman Prezidan in demann sa Lasanble Nasyonal pou zot kapab fer.

Zis parey Mr Patrick Herminie koman Prezidan i kapab osi akord en dimoun ki'n kondannen pou okenn lofans en pardon konplet ouswa dapre serten kondisyon legal 60(1)(a) nou Konstitisyon i fer provizyon fer.

So, sa i en pti pe bann lenkyetid ki bann dimoun pe dir, pe koz lo la laba deor. E sa vilaz drog ki nou'n vwar Larivyer Anglez yer, avan yer pe sirkile - nou swete ki sa bann keksoz i ava aret fer dimoun per e les nou zanfann viv dan trankilite pandan vakans.

Madanm Speaker, mon anvi san mansyonn okenn bann dimoun ki'n vin al devan profite pou felisit tou bann Seselwa ki'n vin devan Lasanble Nasyonal, ki'n vin koz lo zot nominasyon.

Mon rapel Mr Patrick Herminie koman Prezidan dan enn nou bann *interview* i ti dir "i pe *recall* tou bann ki aletranze ki'n fer en travay pou Sesel e pou ranplas zot par bann zenn Anbasader/Anbasadris.

Dan son *interview* lo *SBC* i ti dir sa, alor mon ti a kontan felisit tou bann zenn Seselwa ki'n vin devan nou Lasanble Nasyonal ki pe al pran sa bann pozisyon Anbasader lo non Sesel. E zot osi koman bann Seselwa frer ek ser Seselwa.

Mwan senpleman sa ki mon ti a kontan dir ek zot, se fer Sesel fyer e pa dezapwent nou. E rode kwa ki Sesel i kapab gannyen anba sa bann pozisyon Anbasader, me pa zis laba pou reprezant Sesel e fer paviyon flote.

E mon ti a kontan profite Madanm Speaker, pou mwan osi dir mersi tou bann Seselwa fanm ek zonm ki'n servi sa pozisyon pou en pe letan pou plizyer lannen. E la byento zot pou ganny *recall* pou zot retourn dan zot pei.

Madanm Speaker, dezyenmman mon ti a kontan dir en keksoz an relasyon ek bann Anbasader, bann dimoun ki pe al Anbasader. Letan Gouvernman *US* atraver Prezidan Patrick Herminie zot in vwar larzan pou nou kapab ouver serten Lanbasad aletranze, bann landrwa kekfwa kot nou ti napa en biro en Lanbasad, zot in vwar larzan pou fer sa.

Sa i pou vedir plis Larzan palto, plis larzan pou sekretarya, plis larzan pou transpor, pou drayver e pou *staff* travay dan sa bann biro.

E sa mwan mon'n nepli *trust the process*, prezan mon pe *follow the process*. Parske mon pa tro kapab zis *trust* sa ki pe arive dan nou pei.

Me selman se Mr Patrick Herminie ki'n ganny elekte koman Prezidan. E mwan mon anvi dir ek sa 30 mil siporter ki ankor krwar e siport nou pou nou annan kouraz, annan konfyans e annou *follow the process* ki pe ganny anvoy avek nou koman bann Seselwa.

Letan zot in vwar larzan Madanm Speaker, pou ouver bann nouvo Lanbasad i pou annan plis depans, mon ti a kontan ki Ladministrasyon Mr Patrick Herminie, zot osi vwar larzan pou nou kapab donn en *backpay* sa 13enm mwan saler ki nou, nou pa ti donner la 2020/2021. Mon konnen zot kapab fer li sa, zot fer li en pti moman sa zot.

Si zot pou war larzan pou zot kapab fer sa, parske la nou pe ouver ban nouvo Lanbasad, so, vwar en pti larzan pou donn sa bann Seselwa laba deor en keksoz. Parske se zot ki'n mansyonn sa, nou, nou pa ti fer parske nou pa ti get nou pep. Me zot in dir zot en Gouvernman ki okip zot pep, depi nesans ziska lanmor.

Zot en Gouvernman ki ekoute, ki annan laspirasyon e tousala zot in dir nou. So, mon pe met sa travay lo zot, e pa

bliy osi bann *carers* donn zot en pti keksoz la ki bann trwazyenm az in ganny en keksoz.

E pa bliye Desanm tou lorganizasyon, tou lenstitisyon i fer en *end of year party*. Sey gete anba ki bann *carer* i tonbe, anba ki Minister met zot ansanm pou zot osi kapab ganny en pti *end of year* pou zot osi kriy *Merry Christmas and Happy New Year*. Madanm Speaker.

Letan mon pe terminen, mon trwazyenm pwen letan mon mon'n demann bann Anbasader pou fer bann demann rod bann keksoz pou Sesel. Mon ti a kontan fer en demann ozordi.

Ou konnen UAE par egzanp nou annan en dimoun ki reprezant nou laba. E mon ti a kontan ki ozordi Sesel nou'n ouver en *racetrack* pou nou bann zenn.

Eski i pa posib pou atraver Lanbasad UAE, ki okenn nou bann zenn ki fer byen ki sorti premye dan nou *racetrack* i ganny posibilite li osi pou li kapab al get *Formula 1 Abu Dhabi*, koman en rekonpans sa *sport* ki zot kontan isi pou zot ganny sans al get li aletranze.

Zis parey Prezidan larepublik Patrick Herminie in ganny sa posibilite pou li. E in ganny envite pou li al get

Formula 1 avek son zanfan, e nou vwar porter pe sirkile.

Si ou donn sans bann zenn osi Sesel ki kontan sa *sport*, pou zot ganny sa posibilite pou zot al gete zisteman parey Mr Patrick Herminie in ganny sa posibilite pou li fer koman Prezidan Larepublik ki mon kontan pou li.

Parski sa i en kourtwazi ant 2 pei zis parey letan bann pei zot vin Sesel, nou'n anmenn zot dan Zarden Botanik parske se laba ki nou annan pli gro lagrenn dan lemonn. E kot zot kontan. Alor nou annan sa lesanz osi.

Mon dezyenm demann ki mon ti a kontan Madanm Speaker dan Lasanble Nasyonal, nou annan nou, nou *LGB*.

LGB se Onorab Lemiel, i sa Anbasader pou nou *from* Lasanble avek Egzekitiv. Mon ti a kontan demann avek li letan mon pe konklir, si sa lannen bann zanfan pou ganny posibilite pou zot vin dan Zarden *State House* pou tir en portre avek nou nouvo Prezidan, avek nouvo Madanm Prezidan parey in leka dan bann lannen avan pou zot get lalimyer pou zot *enjoy* sa festivite.

E pou sa msye ki pa ti ganny sa gro ba avek Madanm *First Lady* la, omwen i a ganny en pti *selfie* avek son fanmir

dan Zarden *State House*. Si Onorab Lemiel i kapab konfirm sa nouvel pou nou.

Si bann zanfan i kapab *State House* pou ouver ankor sa lannen, pou tou fanmir Seselwa ganny sa posibilite vin tir en pti portre souvenir avek Nouvo Prezidan e avek Nouvo Madanm Prezidan.

Ankor enn fwa Madanm Speaker, mon felisit out bann Seselwa pou zot lapwentman pou zot dominasyon. E nou swete ki zot fer Sesel fyer, e nou lo sa kote latab e mwan mon pou kontinyen *follow the process*. Mersi bokou Madanm Speaker.

(APPLAUSE)

MADAM SPEAKER

Onorab Georges. Onorab Georges.

HON BERNARD GEORGES

Mersi Madanm Speaker. Madanm Speaker, permet mwan avan tou o mwen an mezir ki mon pe komanse pou mwan... permet mwan pou mwan lo lapar nou *Caucus* ozordi rapel avek Lasanble Nasyonal ki nou'n perdi enn nou Manm Onorab Steven Pillay ki dan nou *Caucus*. E ki apre midi i pe al dan son dernyen demer.

E lo lapar nou *Caucus* mon osi profite lo lapar Lasanble Nasyonal nou anvi

reasir li ek son fanmir ki i dan nou lapriyer ek nou panse la ozordi.

Madanm Speaker, tel parey Onorab Arissol *Chief Whip LDS* fek dir sa dernyen zour edmi in en parkour enteresan pou nou Lasanble, kot nou'n asim enn nou bann rol enportan, e sa se siport nominasyon, aprouv nominasyon ki Prezidan Larepublik i anvi fer pou Anbasader.

Resaman nou ti fer menm traze avek Minis. E la safwasi nou fer avek Anbasader. E tou lede i annan en rezon spesifik aköz nou, nou bezwen fer. E sa se aköz en Minis, en Anbasader tou lede i ganny apwente direktman par Prezidan Larepublik.

E i servi pandan sa letan ki Prezidan Larepublik i anvi. Se selman li ki apwente e se selman li ki dezapwente, e ki retir enn sa dimoun ler i nepli bezwen son servis.

E se pou sa rezon ki en tel apwentman i bezwen vin devan nou Lasanble Nasyonal pou nou aprouve, aköz *unlike* Prezidan li menm e nou bann *MNA* ki ganny elekte nou ganny swazir, nou ganny aprouve par lepep e Minis avek Anbasader i ganny aprouve par en sel dimoun.

E sa dimoun i bezwen kontrefwa i bezwen ki i annan

en lot lenstitisyon pou fer sir ki sa bann dimoun ki i anvi apwente, se bann dimoun ki valab. E ki tenir legzizans sa pos dan lekel zot pa ganny apwente. E sa i en travay ki nou fer plizyer Lasanble in fer siksesivman.

Me i en travay tre enportan ki nou devret fer. Nou pa *interview* sa bann dimoun ki vin devan nou, zot in fini ganny nominen par Prezidan. Li in fini *interview* zot oubyen in demann en dimoun *interview* zot. Nou, nou rol se pou asire ki zot alaoter e ki zot kapab desarz sa bann responsabilite.

E mon'n dir sa Madanm Speaker aköz i annan en rezon senp. I annan dan ka Anbasader ou plito permet mwan nou al laba, rezon senp se ki Anbasader i reprezant parey in ganny dir plizyer fwa pa selman pei me pli partikilyerman i reprezant Prezidan, aköz se Prezidan ki *focus* en pei.

I reprezant Prezidan dan en lot pei. E Minis zot rol e kekfw nou pa toultan realize ki en rol en Minis se pa pou *run* en Departman Gouvernman oubyen *run* en Minister, sa se en sa se pa son rol. Rol en Minis se pou *advise* Prezidan tel parey rol en Anbasader se pou *advise* Prezidan.

E sa i enportan, aköz sa bann dimoun i bezwen bann dimoun ki kapab *advise* Prezidan byen, pa *run* en departman, pa *run* en Lanbasad.

Me rod lenformasyon dan en fason kot zot pou kapab anmenn sa lenformasyon devan Prezidan. E donn li meyer lenformasyon posib pou li kapab pran bann meyer desizyon dan lentere nasyonal.

E se sa, sa travay ki nou'n fer sa enn de dernyen zour. Alor Madanm Speaker, nou dan sa konteks nou bezwen regard an sa ki konsern Anbasader. Sa bann diferan kategori Anbasader e aköz lo nou kote latab i annan serten ki nou'n dakor avek, i annan serten ki nou pa'n dakor avek.

Anbasader i annan annefe 2 kalite. Enn se bann *carrière* diplômat, bann *diplôme de carrière*. E sa 2 premye ki ti vin devan nou yer. E lezot se bann Anbasader ki pa bann Anbasader *de carrière* e ki pe ganny sa swa koman en *reward* pou sa ki zot in akonplir. Swa aköz zot bezwen al fer en misyon spesifik dan en landrwa spesifik.

Swa aköz i en rekonpans pou en keksoz ki zot in deza fer. E nou vwar devan nou dan sa dernyen zour edmi en levantay sa bann dimoun. Lo

nou kote latab, nou, nou an faver *diplôme de carrière*.

Nou krwar ki i enportan ki nou valoriz bann zenn ki travay dan Minister. E pou asire ki zot pou kapab progresse dan zot karyer. E en zour ariv Anbasader, tel parey Mr Belle e Mr Romain tou lede in fer nou konpran yer.

Zot annan sa laspirasyon, se pou sa rezon ki zot *join* sa Minister pou zot monte. Lo lot kote i annan lezot, i annan lezot Anbasader ki annan de fwa nou demann nou lekor aköz ki sa bann dimoun pe ganny nonmen. Se pa nou rol sa? Sa se rol Prezidan Larepublik.

Me nou antan ki sa *body* ki aprouv sa nominasyon nou bezwen annan de fwa demande. Eski nou pe fer en bon keksoz pou aprouv serten dimoun si nou pa konnen rezon aköz zot in ganny swazir?

Aküz ki zot pa'n *join* Minister Zafer Etranzer e progresse zot osi? Kote zot pe ale e pou ki rezon? E la nou vwar Madanm Speaker en diverzans. Par egzanp nou lo nou kote latab parey nou dir nou an faver diplomat de karyer, nou pa an faver en *reward*.

Me i annan leksepsyon. Par egzanp Onorab Pool in vini e an tout fransiz in dir nou ki li i pe ganny nominen pou en

landrwa pou en rezon spesifik aköz son spesifisite i koz sa lalang.

E nou'n etidye laba e i konn travay, i konn sa pei. Donk, sa nou vwar otomatikman lala in bon, lala in bon en bon rezon aköz sa dimoun pe ganny nonmen. Me lezot nou pa tro sir.

Annefe nou pa sir ditou, nou pa konnen aköz zot menm zot, zot in vin devan nou e zot in dir zot pa konnen kote zot pou ganny plase kekfwa zot pou ganny plase isi, kekfwa zot pou ganny plase en lot landrwa.

E sa i fer nou poz serten kestyon e Onorab Arissol in poz sa kestyon bomaten lo kestyon kou. Nou en pei ki annan en lekonomi ki limite. Nou pa kapab fer paryaz avek bann lezot pei. Nou pa kapab annan diplomat dan tou bann pei, malgre ki nou ti ava swete aköz nou napa kapasite nou napa finansman.

E donk, nou demann nou lekor dan ka lezot sa bann dimoun aköz zot pe ganny apwente, kote zot pe ale nou pa'n ganny dir. E si par egzanp sa parol in monte pandan sa zour edmi.

Si i annan en Lanbasad ki pe al ganny ouver Moris, nou a demann nou lekor kestyon, eski i en bon lide annan en Lanbasad Moris?

Akoz Moris apre tou i zis 2erdtan 15 minit lo avyon.

Eski sa Lanbasader pa ti pou kapab asiz isi Sesel e al Moris 1 fwa tou le mwan? Parey Lanbasader Leta-z-Ini ki reste Moris ki vin Sesel de tanzantan.

Sa se bann kestyon ki nou bezwen demande a en moman kot nou pe ganny demande koman en Lasanble Nasyonal oubyen ki nou pou ganny demande byento ler Bidze i vin devan nou, pou nou aprouv sa bann Bidze.

Apre nou annan Mr Patrick Victor. Mr Patrick Victor li i tonm dan en kategori en pe diferan aköz mon krwar dan son ka ankor enn fwa, nou bezwen *read between the lines*. Mon krwar dan son ka e bann Manm in fer resorti se en koreksyon en keksoz ki ti sipoze ganny fer depi pli boner.

E dan ka Mr Patrick Victor nou kapab dir ki i en *reward*, me i en *reward* merite aköz i en figir ikonik dan lanmizik Sesel. Alor, i pe ganny sa *reward*.

Nou ti a'n konpran en pe plis leksplikasyon lo lapar Prezidan, lo lapar Gouvernman, lo lapar zot lo zot kote lata ki konn sa bann keksoz. Pou nou kapab konnen kisisa ki nou pe fer aköz ki nou pe pran sa bann

desizyon ki nou pe pran ozordi.

Akoz i pa selman en kestyon mazorite. Zot, zot konnen, zot, zot satisfè. Zot, zot siporte e zot, zot pou vot an faver. *That's not how the process works*. Si nou anvi *trust the process*, nou bezwen *trust the process fully*.

E *the process* i bezwen konpletman ouver avek en levantay ki ler tel parey Mr Andre Pool in vin devan nou yer. E in dir nou e in eksplik nou egzaktman aköz i ti pe ganny nonmen. Sa se bann keksoz ki nou ekspekte ki sorti lo lot kote letab.

Alor, Madanm Speaker mon pa anvi pran tro letan, *carrière diplomate*. *Diplômate de carrière* nou pou toultan siporte. Bann diplomat ki annan en rezon spesifik pou zot al dan en landrwa spesifik pou en bi spesifik nou pou siporte, bann ki pe ganny en *reward* aköz en servis ki zot in rann avek leksepsyon.

E mon fer li kler Mr Patrick Victor ki li son servis in fini rann pou lanmizik, sa i vin en pe pli sipe. E nou demann nou lekor eski nou ganny tou lenformasyon ki nou bezwen, pou nou kapab aprouv sa bann nominasyon ki vin devan nou.

Mon lapel alor avek *LGB*, se pou ler nou vin fer sa ankor ki nou ganny en pe plis

lenformasyon ki nou ganny otan lenformasyon ki posib, akòz dan sa sikonstans nou Lasanble pe azir koman en Lasanble antye e non pa koman 2 lanmwatye ki pe asiz enn o bor lot. Mersi bokou Madanm Speaker.

(APPLAUSE)

MADAM SPEAKER

Mersi. Onorab Sopha. Onorab Sopha.

HON GERRY SOPHA

Bonn apre midi Madanm Speaker. Bonn apre midi tou koleg Onorab. Bonn apre midi tou dimoun ki pe ekout nou.

Madanm Speaker, nou'n annan nou bann dimoun ki'n ganny nominen pou Anbasader. Prosedir in ganny swiv, in anvoy devan Lasanble Nasyonal.

E zot Lasanble Nasyonal in vote pou bann ki'n deza fini pase, la nou annan enn dernyen. Byento nou pe al pran en vot lo la. E mon krwar tou prosedir in ganny swivre.

Madanm Speaker, lot kote latab. Bann Onorab lot kote latab zot in pas serten komanter. E zot in dir pou dir par egzant Prezidan Herminie in swazir bann dimoun. E sa bann dimoun se pou i annan serten ki'n ganny swazir par *reward*.

Me prensip Prezidan Herminie, se pou rod dimoun ki pou kapab fer marse son Gouvernman e reprezant Sesel a aletranze. Ki en mannyer ki nou pei i a war keksoz pe bouz dan en bon direksyon par en ladministrasyon ki responsab.

Atraver ou Madanm Speaker, si bann Onorab lo kote latab lot kote latab ti annan tou sa bann nide ki zot in met devan la ozordi, zot ti devret pran sa bann bon nide si ti bon zot ti a'n met li avek zot ladministrasyon sortan. Ozordi zot pa ti ava war zot, zot in vin dan lopozisyon.

Si ti annan kalite dan bann keksoz ki zot in dir la dan sa detrwa minit ki'n pase. Sa kalite zot ti'n devret fer en travay pou ki zot Gouvernman o pouvwar. E si zot pe konplent la ozordi, nou pa responsab lo sa kote latab pou zot kot zot ete ozordi. nou, nou responsab pou met nou Prezidan *State House*. E met nou an mazorite lo sa kote latab.

Madanm Speaker, i difisil pou ou kapab aksepte larealite ler ou pe kontinyen viv lo *denial*. Nou annan nou en zonm ki'n ganny elekte koman Prezidan pou en manda 5an. In montre son konpetans koman en *leader*.

Parske avek zis 10 Manm Lasanble dan 7enm Lasanble avek tou sa malis ki zot in sey

an port anver li in montre zot in debout, in diriz son parti. E in anmenn rezilta e ozordi Ladministrasyon *US* dirize par Prezidan Herminie i o pouvwar.

Mon ti a kontan fer resorti, sa fristrasyon ki ti annan avan Oktob 2025 ozordi dan lavil kot ou pase ou pa antann sa kantite fristrasyon *anymore*. Ki laprev sa i donnen? Laprev i kler Madanm Speaker, se ki ladministrasyon Dokter Herminie in anmenn soulazman pou sa nasyon.

Ladministrasyon Dr Herminie, in montre ki i pe vin parti solisyon pou sa pei. E non pa parti problem. E sa ki ti sipoze anmenn lespwar e fer lavi Seselwa malere, se zot ki'n vin *part of the problem instead of part of the solution*.

Madanm Speaker, mon'n antann Onorab Arissol ler in dir poudir i annan bann dezord ki'n pase tou resaman mon ti antann yer dan Larivyer Anglez. E sa i an koneksyon avek sa fleo drog ki annan dan pei.

Nou devret realize Madanm Speaker, poudir pandan ki ladministrasyon sortan ti dan lofis nou'n antann lekel ki ti pe soutire pou anvair Sesel avek *Heroin*. Se en aktivis *LDS* ki ti vin devan ti dir sa bann gro latet

la, sa bann Sefdeta zot menm zot ki pe ede pou polye sa pei.

Madanm Speaker, ler en *statement* parey i ganny fer, sa letan lekel ki ti o pouvwar? Lekel sa bann Sefdeta ki ti la? Lontan zot dan sa biznes sa msye ti dir.

MADAM SPEAKER

Onorab relevans silvouple lo kestyon.

HON GERRY SOPHA

Madanm Speaker. Nou'n ariv en pozisyon dan sa pei ler nou'n *fail*, nou pe sey fer krwar poudir la nou kapab travay. Zot ti ganny 5an pou travay zot pa'n travay. Ozordi Seselwa in pran en desizyon in met en nouvo Ladministrasyon *State House*.

Sa Ladministrasyon koman in debite in vin ek en plan devan Seselwa. In anmenn en plan 100 zour, e in plis ki delivre. Parske preski tou sa bann keksoz ki'n mete dan sa plan 100 zour, in nobou anmenn devan Seselwa.

E Seselwa la deor pe koze pe dir poudir sa ladministrasyon fek komanse, i pe montre nou poudir vre zot serye sa bann dimoun.

Prezan mwan mon pe demann mon lekor Madanm Speaker atraver ou. Si lot kote lataab pa ankor vwar sa mon demann mwan ki mannyer zot

kapab war en pti zegwir lo montanny, en gro lelefan dan zot salon zot pa trouve.

Madanm Speaker, mon krwar desizyon ki Prezidan Herminie in fer pou swazir sa bann dimoun pou anvoy devan nou i en bon desizyon. E Ladministrasyon US dirize par Dokter Patrick Herminie, in war *failure* ladministrasyon sortan. E sa se *micro-manage*. Alors Prezidan Herminie pa pou fer en fot parey pou vin zwe zot zwe, aköz zot zwe zot in tap boul dan zot prop gol.

E rezilta pa dan zot faver. Me Dokter Herminie i konnen ler li i dan sa laplenn kot i pe zwe, i pou bezwen les boul antre dan gol oponan non pa dan zot prop gol.

E se sa rezon ki nou lo sa kote latab ozordi lo sa kote latab nou pou sipor bann nominasyon ki'n vin devan nou.

E nou pou donn Ladministrasyon US dirize par Dokter Herminie tou nou sipor pou nou kapab konplet sa 5an. E Seselwa i a war diferans ant ladministrasyon sortan, e ladministrasyon ki la dan lofis aktyelman. Mersi Madanm Speaker.

(APPLAUSE)

MADAM SPEAKER

Onorab Loze.

HON JOHAN LOZE

Mersi Madanm Speaker. Madanm Speaker, mon konnen ki ou, ou pa en politisyen. Ou fonksyonn endepandaman avek tousala. Me selman mwan mon en politisyen. Prezan mwan koman en politisyen, e la mon pou dir en keksoz senserman pou Lepep Sesel tande.

Mon ti a kontan mwan koman en politisyen, si demen mon tonm malad mon bann dirizan i pase vizit mwan. Zot ede pran ka avek mon fanmir dizon mon en zonm ki annan zanfan, zot zet en regar. Non pa rezet mwan, abandonn mwan konpletman apre pas en pti mesaz lo mon lanmor.

Sa i son senser ve koman en politisyen. Mon swete ki si zanmen i ariv mwan en keksoz napa sa nivo lipokrizi konmsi ki nou vwar de fwa devan nou.

Madanm Speaker, ti annan en zwe ki ti komans diran Ladministrasyon Prezidan Faure. Sa ti komans ler Madanm Potter, Anbasader Prezidan Herminie sa letan ti ganny propoze.

E zot kandidatir ti ganny rezete. E zwe ki ti komanse sa bann letan sete *technocrat v/s* politisyen. Ou pa kapab met en politisyen dan en pos.

E i ti en zwe malen sa a lepok, zot ti dir zot sa bann dimoun. Zot ti dir koumsa sa bann Kandida Faure sa bann

zonm for nou pa pou kapab donn li sa bann dimoun aköz sa pou fer son travay marse.

Alors, met bann *technocrat* koman Minis, pa met politisyen koman Minis. E sa letan largiman ki zot ti pe sey servi sete Prezidan Faure pa ti'n ganny elekte, i ti ganny selekte. Alors, vi ki i ti'n ganny selekte pa ti pou kapab les li ganny en Kabinet for pou travay avek.

Be la largiman selekte pa debout la. Mon fek sorti *State House* kot Prezidan Herminie mwan bomaten.

Mon'n war en Prezidan elekte, malgre ki i pe asiz dan en pti biro aköz Biro Prezidan pa ankor fini ganny *refurbish*, zot in pran tou pake zot in al avek. En Prezidan Elekte, zonm ki'n ganny elekte dan bwat vote.

Be oule dir mwan menm si in ganny elekte dapre zot i pa'n ganny selekte, zot pou vin dikte menm kw aki i pou mete, kwa ki i pa pou mete. *Diplômate de carrière*, pa reward heyyy... "Ah be wi Pti Mimi, pa ou laniverser ozordi." Seselwa in fer kler pa ou laniverser Pti Mimi. In fer kler avek zot depi dan bwat vote.

Napa *diplômate de carrière*, napa sa bann zwe malen ki zot ti sey zwe ler Prezidan Faure ti la. Tou zot bann largiman bet i tonbe. "Ah be wi Pti Mimi, pa ou

laniverser ozordi" zot pa pe vin rod nou diploma de karyer se pa kisisa.

Sa bann zwe pa pe marse *anymore*. Pep Seselwa in konpran poudir sa ti en taktik vol pouvwat.

Prezan li Seselwa in fer son swa li, in elekte en Prezidan par *voie* dan bwat vote. Be sa Prezidan prezan li ki i fer li? In ganny elekte lo en vizyon. In ganny elekte lo promes eleksyon. In ganny elekte lo son manifesto.

Be i pou al pran nenport ki dan bor semen pou li vin fer enplimant son vizyon, delivre lo son bann promes eleksyon lo sa ki in ekrir dan son manifesto? Non. Premyerman i pou bezwen rod dimoun ki posed en serten nivo lwayote.

Dezyenmman i pou bezwen rod dimoun ki i konnen i kapab delivre, ki pou kapab pouse pou son azanda. Be lekel dimoun ki pou fer sa? I dimoun ki konvenki dan sa ki i pe fer. I dimoun ki deza partaz menm vizyon avek li. E ki krwar dan sa ki li in avans devan.

Si en dimoun li i pa krwar Seselwa i devret annan en retirement a laz 63 an. Ou krwar i pou vin lager pou enplimant sa?

Be non Pti Mimi i pa pou vin lager pou li enplimant sa. Be aprezan, sa dimoun ki ganny apwente par sa

Prezidan i annan serten *constitutional duties* pou li delivre lo la.

E prezan li dan lenplimantasyon son bann *constitutional duties* ki i annan, i *accountable to* Egzekitif ki'n ganny elekte. E Egzekitif li i *accountable* avek pep Seselwa. *We close the loop.*

Dan 5an Sesewla i desid ankor li. Si ti devret *diplômate de carrière* ouswa dimoun ki pou vin delivre. Be in mete *diplômate de carrière.*

E dan *diplômate de carrière* ki'n ganny mete i annan a serten letan ti pe menm son lwayote politik ti anver zot parti. Sa in kler. In tre kler.

Nou tou nou konnen parske i ti la anndan pe travay pe siport lenstitisyon ki zot, zot ti pe met an plas. So, mon krwar in annan en prose ase enklizif ki'n deroule.

Be aprezan Prezidan Herminie, i bezwen dimoun pou enplimant son Polisi. I bezwen dimoun ki pou annan *accountability* anver li e son Gouvernman.

E i bezwen delivre en ladministrasyon efikas. Akoz la nou bezwen ouver Lanbasad, parske nou nepli annan en Prezidan ki *cabin crew* la. I pa pe monte desann dan 4 kwen lemonn *tea, coffee or me* lo avyon la.

La nou bezwen travayer plase pe travay. Nou pa pe ale ankor *COP 1* ziska *Cop 33*, fini. Prezidan i bezwen travay li osi, e i bezwen met son dimoun an plas pou travay. Be Madanm Speaker, ler nou pe *follow the process* prezan.

Sa vilaz drog Larivyer Anglez li i fek ne an Oktob? I fek vin la yer li? Depi zour Onorab Labonte pe kriy lasasen la anndan dan sa Lasanble, ozordi ki zot reve i annan en vilaz drog Larivyer Anglez prezan ki zot tande. Be i ti la li.

Be *career* osi mon sipoze fek paret lo later Sesel. *Poof!* Sa lannen i bezwen *Christmas party*. Sa dernyen an i pa ti bezwen?

Sa dernyen 5an pa ti egziste *carer*, nou a'n koze lo *carer* nou. 5an nou'n la ni en mo lo *carer* nou pa dir. Nou pas Lalwa nou kre en lazans, nou asiz dan Lasanble nou dir koumsa *career* i pou anploye ek lazans. Kan Lalwa *black and white* i dir *carer* i anploye avek son resipyan.

So, la ozordi ki nou reve ki *carer* i egziste, nou vin rod parti nwel pou zot. Nou vin rod *backpay* 13enm mwan saler. Sirkiler in sorti la *by the way* en. Kreol dan *Civil Service* pe komans ganny zot larzan. Prezidan Herminie, pe delivre lo son bann promes.

(APPLAUSE)

HON JOHAN LOZE

E mwan sa ki mon annan pou dir Lepep Seselwa Madanm Speaker. An terminan sa ki mon annan pou mwan dir se Lepep Seselwa, zot kontinyen *trust the process*. Bann *followers* ki pou *follow* zot lavi antye a kontinyen *follow the process*. Parske zot pa pou *lead* sa pei ankor zanmen! Zot a *follow*! Mersi Madanm Speaker.

MADAM SPEAKER

Onorab Lemiel, *right of reply*.

HON SYLVANNE LEMIEL

Mersi Madanm Speaker. Madanm Speaker, devan nou ozordi in annan Onorab Nicolas Prea ki'n vini e ki nou'n kapab demann li bann plizyer kestyon ki nou ti anvi. E Onorab Prea in reponn tou zot bann kestyon; tou nou bann kestyon ki nou'n annan.

E a mon avi mon sir e serten ki Prezidan Patrick Herminie in fer li en bon swa pou li swazir e nomin Mr Nicolas Prea pou vin koman Anbasader pou reprezant Sesel.

Madanm Speaker, mon pe ganny demande or nou pe ganny demande lo kote latab isi sirtou kestyon in ganny poze a mwan pou petet *next time* nou pli nou vin ek plis

lenformasyon kote sa bann Anbasader pou ganny plase. Plis lenformasyon detaye pou zot kapab pran en desizyon.

Madanm Speaker, isi dan sa Lasanble nou kapab vin avek lenformasyon pli detaye si oule si zot in deside *LDS* pou zot pa vote, zot pa pou vote. Sa i enn. Dezyenmman tou sa dimoun ki'n vin devan nou ozordi a mon a *vie*, nou'n kestyonn zot. Nou'n vwar ki zot tou zot annan sa kapasite e abilite pou zot kapab al reprezant Sesel koman Anbasader.

Nou'n ganny Mr Patrick Victor bomaten, li osi in vini in koze ki en zonm ris lo kote kiltirel in deza al reprezant Sesel lo nivo aletranze. In fer son travay byen.

E Mr Nicolas Prea definitivman avek son kapasite ki i annan, in travay en long parkour dan politik. In dan nou Lasanble Nasyonal. In enn nou bann Speaker ki'n travay ki'n sey anmenn sa lendepondans Speaker dan nou Lasanble Nasyonal, menm si ti annan bokou retisans.

Me selman in fer son travay, e in fer li avek devosyon. E in fer li avek lentegrite, in fer li byen. Madanm Speaker, lo komansman lannen mwan avek loto nou ti tonm dakor ki dan sa Lasanble annou pa fer

li vin parey 7enm Lasanble. Kot i annan sa bann rise, pouse, sa bann maltrete *off-mic*, lo *mic*.

Annou travay koman imen, annou travay byen. Me *off-mic* mon'n kapab tande ozordi ler Onorab Sopha ti pe koze en Onorab LDS in demande ki kalite Onorab nou anmennen isi dan sa Lasanble.

E in menm dir plito ti met en lisyen. Me ler ou ganny bann remark parey, e i annan en Onorab menm li menm li ki'n dir e in kriye byen for poudir li ki'n dir. I vreman vilenn. I vreman mal koman en Onorab ou'n ganny elekte dan en distrik pou ou vin travay e reprezant ou pep, pou ou komans senm bann laenn parey e bann maltrete parey dan en Lasanble Nasyonal. E ki sa depi o komansman nou ti'n tonm lo en desizyon pou nou pa fer li.

E mon krwar depi o komansman, sa nou pe ariv a lafen lannen Madanm Speaker, nou pe ariv a lafen lannen, mon krwar in ler pou nou met en *stop* avek tousala.

(*comments off-mic*)

HON SYLVANNE LEMIEL

(Zot in ganny zot sans pou koze, les mwan koze. Onorab Arissol, ou ti koze les mwan

koze. Si ou annan en keksoz ou ava dir apre.)

So, i fer ki Madanm Speaker, i pa normal ou vwar en sel kou nou pe eksite, zot pe nerve, zot pe eksite me napa sans pou nerve pou eksite. Mon pa pe nerve, mon pe eksplike ki'n arive. E sa mon pe dir i bezwen dis kontinyen. Nou pa devret kapab kontinyen koumsa.

Si enn i fer, lot i fer Madanm Speaker. Nou pa pou zanmen kapab annan en konklizyon, en finisyon ek sa bann latitud. Ozordi mon pa'n tann en Manm lo mon kote latab pe maltret personn lo lot kote latab.

Mon pa'n tann en Manm pe maltret personn ni lisyen, ni lisyen. Mon pa'n tann personn lo mon kote latab pe nonm sa ki parey lo zot kote zot in fer.

Madanm Speaker, *back to* nou biznes. Si pou annan parti zanfann *State House* sa mon pa kapab reponn. Sa Onorab Arissol ou ava al rod ou lenformasyon ou menm, si pou annan vizit, si pou get lalimyer.

Lalimyer i annan anvil, bann zanfann pe regard lalimyer. Si pou al regard *State House*, sa i pou prerogativ Prezidan ki li i pou pran son desizyon ki i pou fer si i pou les *State House* ouver pou zanfann vin tir portre *or not*.

E petet osi mon'n tann en Manm in nonmen, nou zanfàn pou mont State House ki zanfàn pou al regarde apard lalimyer ou pe dir napa naryen ankor. Lisyen in ale, torti in ale, meb in ale, tou keksoz in ale Madanm Speaker. I fer ki nou pa war sans pou nou bann....

I fer ki nou pa war sans pou nou bann zanfàn petet al *State House*, pou zot al zis get lalimyer. Akoz zot ti kontan en pti pe sa bann zafer vwar sa lisyen, al get torti en pti pe.

Aprè nou'n tann LDS osi Onorab mon bon koleg Onorab Arissol menm in nonmen ki si pou annan parti pou *cleaners*. Si pou annan parti pou *carers*.

Me Madanm Speaker, mon ti a kontan dir ki zot ti annan zot en Lasanble 2tyer. En *super majority* ki zot ti vreman *proud of*. Zot pa ti demann zot Prezidan la dan sa Lasanble pou fer sir organiz en parti pou bann *carer*. Zot ti kapab fer sa zot sa letan.

Me zot ti deside fer bann pti parti antre zot, zot menm *State House* toultan. E zot pa ti mazine si ti annan *carers* pou zot fer parti. Me nou plis ki sir ki nou Gouvernman i annan keksoz ki nou pou vini avek pandan sa 5an pou nou amelyor lavi nou bann *carers*.

(APPLAUSE)

HON SYLVANNE LEMIEL

Back to business. Madanm Speaker mwan mon ti a demande.

E mon sorti dan sa laliny mon krwar mon'n donn zot, zot bann larepons ki zot bezwen. Mon ti a kontan petet avan mon, ava nou terminen lo sa size lo sa Mosyon.

Madanm Speaker pou mwan demann nou bann koleg Manm Onorab isi dan nou Lasanble pou zot aprouv propozisyon apwentman Prezidan in mete devan nou Mr Onorab Nicolas Prea koman Anbasader *Extraordinary and Plenipotentiary* pou Repiblik Sesel. Mersi.

(APPLAUSE)

MADAM SPEAKER

Mersi in ariv ler pou nou pran en vot lo Mosyon. *In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr. Nicolas PREA as Ambassador Extraordinary and Plenipotentiary of the Republic of Seychelles.*

Tou bann Manm ki annakor? Mersi. Okenn Manm ki kont? Kestyon lo Mosyon 17 Manm in vot pour, e 11 in *abstain*. Avan nou pran en

break. Tou lede kote pa ekoute. Tou lede kote i fer tapaz letan en kote pe koze.

Malerezman i annan letan kot i annan keksoz petet ki ganny dir mwan mon pa'n tande. E alors mon pa kapab vremen pas en *ruling* lo la ou dir keksoz lo la.

Selman *at the end of the day*, koman Lasanble nou ki deside ki mannyer nou ganny vwar. Nou ki deside ki mannyer piblik pou war nou, e ki mannyer nou pou azir.

E mwan koman *presiding officer*, koman Speaker mon la pou donn zot loportinite pou koze pou koz lo keston ki devan Lasanble.

Me selman parey Onorab Lemiel in dir, parey mon krwar nou tou nou pou agree *going forward* nou ki pou deside ki mannyer nou pou ganny war.

E petet mazin en pti pe pli byen ki letan en dimoun pe koze, lot kote pe koze pran letan pou nou ekoute, reste trankil. Mersi. Nou ava pran *break*. E nou ava rebran 2er.

(BREAK)

MADAM SPEAKER

Bon. Nou ava aprezan pran lot *item* lo azanda pou ozordi, ki *Second Reading National Institute of Science, Technology and Innovation Bill, 2025*. Onorab Lemiel, si nou kapab ganny Mosyon. Nou pou

bezwen fer *suspension of Standing Orders*.

HON SYLVANNE LEMIEL

Mersi Madanm Speaker. Bon apre midi Madanm Speaker. Tou koleg, Manm Onorab. Tou dimoun a lekout.

Madanm Speaker, anba *Order 97(1)*, mon demann ou permisyon pou mwan *move* pou sispann *Order 69(1)* pou permet ki *National Institute of Science, Technology and Innovation Bill, 2025* i ganny lir en Dezyenm Fwa, malgre ki sa peryod 7 zour depi son *First Reading* pa ankor pase. Mersi.

MADAM SPEAKER

Mersi Onorab. Okenn Manm ki Onorab Louise. Onorab Claudette Louise.

HON CLAUDETTE LOUISE

Bonn apre midi Madanm Speaker. Mosyon i ganny segonde. Mersi.

MADAM SPEAKER

Mersi. Nou ava pran en vot lo Mosyon. Lasanble i agrer pou nou... Nou ava pran en vot lo Mosyon pou *suspend Standing Orders*. Bann ki agree? Mersi. Okenn Manm ki kont?

Lo keston pou nou *suspend Order 69(1)*, 16 Manm in vot pour avek 12 in *abstain*. Nou ava aprezan bouz lo *Second Reading National Institute of Science, Technology*

and Innovation Bill. Onorab Lemiel.

HON SYLVANNE LEMIEL

Mersi Madanm Speaker. Anba *Order 69(2)* mon move ki *National Institute of Science, Technology and Innovation Bill, 2025* i ganny lir pou en Dezyenm Fwa. Mersi.

MADAM SPEAKER

Okenn Manm ki... Onorab Gill.

HON CHURCHILL GILL

Mersi Madanm Speaker. Bonn apre midi Madanm Speaker. Tou Manm e tou dimoun ki pe ekout nou, Mosyon i segonde. Mersi.

MADAM SPEAKER

Mersi. Nou ava fer Minis responsab pou *Bill* Vis-Prezidan antre silvouple avek son tim. Bonn apre midi Vis-Prezidan. *Secretary of State* Mr Estico avek Mr Victor Hill. Vis-Prezidan, mon ava demann ou pou fer prezantasyon lo *Bill please*.

**VICE-PRESIDENT
SEBASTIEN PILLAY**

Bonn apre midi Madanm Speaker. Mersi bokou. E bonn apre midi Leader Lopozisyon. *Leader* Zafer Gouvernman. E tou Manm Onorab. E tou dimoun ki a lekout ozordi apre midi ki pe swiv Lasanble.

Madanm Speaker, i fer mwan en plezir pou retourn ankor enn fwa dan Lasanble. E safwasi pou prezant nouvo Lalwa pou Lenstiti Nasyonal pou Lasyans, Teknolozi e inovasyon.

Madanm Speaker, sa Lalwa i anliny avek bann prononsman Dokter Patrick Herminie Prezidan Larepiblik Sesel an sa ki konsern bann *commitment* ki nou'n fer ki nou parti in fer anba Manifesto dan sa premye 100 zour pou entrodwir en lazans ki konsern devlopman teknolozi Inovasyon.

Sa Lalwa i revwar plizyer keksoz Madanm Speaker. I prevwar ki nou fer kreasyon ren lenstiti Nasyonal pou teknolozi inovasyon ki nou pran sarz tou bann laspe Lasyans, Teknolozi, Inovasyon dan Sesel.

I pou en lazans ki pa pou zis lo en baz mikro. Me pou regard keksoz dan en fason dan en perspektiv pli elarzi pli *micro* pou asire ki Inovasyon, teknolozi e Lenvestisman dan inovasyon pou teknolozi i en keksoz ki nou Gouvernman i fokaliz lo la.

E met an plas bann striktir e prosedir nesaser pou ede ki bann lenvestiser potansyel lokal i kapab si oule ganny oubyen war en plas dan sa sekter ki pe devlope dan en fason konsiderab otour

lemonn. Madanm Speaker, i enportan pou note ki *NISTI* ti deza aziste parey nou apel dan en konfigirasyon diferan dan lepase.

Sa ki nou pe propoze safwasi, se kreasyon en nouvo striktir otour sa lazans pou fer ki i ava ganny en *drive* e posibilite pou nou kapab kre lenvestisman dan sa sekter.

Me pa zis sa, kre en fon pou donn *funding* pou bann proze lenvestisman dan teknolozi renovasyon ki a kapab en keksoz ki afekte bokou zenn Seselwa ozordi ki pe rod en lo laspe pou zot kapab envestir ladan.

Sa Lalwa li menm i en Lalwa ki konpreansiv dan lesans ki dan kreasyon sa lenstiti i osi kre bann diferan fonksyon ki sa lazans pou annan. E bann keksoz ki bezwen fer zisteman an relasyon avek ede pou kre e *foster* en lanvironnman kot i ava annan linovasyon dan teknolozi.

Premyerman Madanm Speaker, enn bann keksoz ki sa Lalwa i sipoze fer se kre en lanvironnman ki ava *conducive* pou ede ki i annan bann kondisyon ki ava ede pou devlop bann devlopman dan syantifik, oubyen teknolozi an sa ki konsern inovasyon teknolozi.

Fodre mon a note Mr Speaker, ki enn bann domenn

ozordi dan bokou pei kot i annan bokou lenvestisman parmi en demografik popilasyon ki pli zenn se dan Sekter Teknolozi Nimerik. Sirtou dan Sekter Inovasyon Teknolozi.

I pou osi annan kolaborasyon direk avek bann partner enternasyonal, e bann lenstitisyon ki deza an egzistan oubyen bann lantrepriz ki deza pe fonksyonnen. Pou asire ki nou kapab anmenn bann lekspertiz enternasyonal.

Me osi kre bann lekspertiz lokal avek en bi pou devlop bann konpetans lokal e rezyonal, an sa ki konsern Devlopman Lasyans Teknolozi Inovasyon.

Savedir an dot mo sa lazans pou osi *foster* en nouvo konsep ki nou apel en *science diplomacy*. En lot keksoz ki sa lazans i sipoze fer, se met a dispozisyon oubyen ede pou kre resers e devlopman ki ava atrakte bann biznes oubyen lantrepriz pou siport diverzans bann lenvestisman *Itech*.

E bann loportinite ki sa i ava von avek, pou ede ki nou redwir bann pri pou teknolozi inovasyon mannyer i ete ozordi.

I pou osi ede *improve* bann *awareness* avek atraver bann Program Edikasyonnel, dan lendistri ek bann lezot sekter enkli ki dan ledikasyon

pou ede ki bann diferan domenn nou ava war partisipasyon pli aktiv bann zenn dan devlopman teknolozi.

Me osi zot partisipasyon dan servi teknolozi. I pou osi ede met an plas bann stratezi pou promot ledikasyon e devlopman dan resours imen an sa ki konsern Teknolozi Inovasyon.

Madanm Speaker, Sesel i annan potansyel pou li devlope dan sa domenn koz nou annan en sistenm ledikasyon ki stab. Nou annan en striktir politik ki stab. E nou annan en demokrasi ki stab. Sa sekirite ek stabilite i a kapab permet nou pou nou devlope dan en fason ase konsiderab si nou met lanfaz lo sa devlopman. E osi kre bann kondisyon ki sa devlopman i kapab arive.

I pou osi promot kreativite inovasyon. E osi pou promot kreativite, e anmenn bann pratik pli inovativ an sa ki konsern lafason ki teknolozi i ganny servi.

E si oule anmenn bann pli pre teknolozi avek bann diferan lenstans dan pei pou fer ki plis dimoun i ava kapab partisip dan devlopman teknolozi.

Enn son bann konponan enportan, entegral ki'n ganny enkli dan sa Lalwa. Se ki sa lazans pou osi met an plas

bann stratezi pou kolabor e promot litilizasyon sa ki nou apel *Artificial Intelligence* oubyen *AI*.

Sa i pou enkli bann lezot teknolozi emerzan ki a fer ki i ava donn loportinite bann zenn Seselwa pou partisip aktivman dan devlopman sa bann teknolozi.

Me osi kre larises atraver sa bann teknolozi. Alors, dan sa konteks si nou regard finansman sa lazans enn bann konponan ki pou enkli dan sa lazans se pou osi aktivman rod resours finansyel ki a kapab ede donn bann *grants* dan lefitir pou bann *prospective investors* si oule ki oule investir dan devlopman lasyans teknolozi.

Enn son bann fonksyon ki pou enportan se pou promot Lasyans Teknolozi, Inovasyon. E sa lazans pou fer sa atraver plizyer metod. E dan son restriktirasyon se sa ki nou'n anvizaze. I deza annan bann diskisyon Madanm Speaker ki nou'n komanse avek bann lezot lenstitisyon, e bann lakonpannyen enternasyonal pou fer ki nou kapab anmenn serten teknolozi lo nivo nasyonal isi Sesel.

Parey zot konnen enn bann bi Gouvernman se anmenn en transformasyon *digital* dan nou pei. E sa i en keksoz ki nou pe travay aktivman lo la pou akonplir li.

I enportan pou note ki i deza dan sa konteks, nou'n fini angaz diskisyon avek plizyer akter lezot pei lo en pwennvi bilateral osi pou fer ki nou kapab anmenn sa devlopman teknolozi. E si oule anmenn en lemerzans teknolozi isi Sesel.

Rev, me pa rev Madanm Speaker, se ki en zour nenport dimoun ki mars zis ek son telefonn dan son lanmen i ava annan tou son lenformasyon.

I a menm kapab *travel* ek son telefonn. I a menm kapab pey tou son keksoz lo telefonn. E sa se enn bann keksoz ki nou oule *achieve* avek emerzan e kreasyon teknolozi. Ki ava fer ki Sesel ava'n vremen zwenn lemonn global an sa ki konsern devlopman teknolozi. I pa en keksoz ki enposib, i annan bann striktir en plas ki kapab ed nou fer li.

Me nou bezwen pare pou nou komit nou lekor e siport bann mezir pou nou kapab fer sa. Madanm Speaker, i annan en lot keksoz ki enportan an sa ki konsern sa lazans.

E sa se nou pou bezwen pran mezir pou protez sa ki nou apel *Intellectual Property Rights*, pou bann dimoun ki fer resers e inovasyon dan domenn teknolozi. Pou bann ki petet pa okouran i annan plizyer zenn Seselwa ki'n deza angaz zot dan domenn inovasyon e devlopman bann

prodwir nimerik, pou fer ki nou kapab fer nou lavi en pe pli fasil.

Malerezman dan bokou ka, sa bann lenvestisman oubyen sa bann nide inovativ pa'n ganny gete aköz nou'n toultan konsider bann teknolozi ki deza egziste koman pli enportan. E kot nou bann priyorite, e alors nou pa'n donn ase lenportans avek lemerzans teknolozi ki pe arive ozordi.

Lesansyel Madanm Speaker, se kre en sosyete ki pli entelizan -en sosyete ki konn servi pli byen teknolozi, me pa abiz teknolozi. E fer sir ki teknolozi i vin pli bon zanmi me non pa nou pli pir lennmi.

I pou osi ede pou devlop bann laboratwar pli spesyalize pou fer resers lo pwennvi lokal e rezyonal. La nou bezwen note Madanm Speaker ki sa i ava kapab enn bann keksoz kot i ava annan serten si oule serten limitasyon an sa ki konsern bann keksoz ki nou kapab fer.

Me nou bezwen osi realize poudir bann laboratwar an sa ki konsern teknolozi inovasyon lasyans i pa neseserman bezwen bann laboratwar fizik.

Nou kapab osi pe koz lo bann pwennvi *digital*, ki mannyer nou kapab kre bann diferan *hub* ki ava permet bann diferan entelektyel

oubyen akter, partisip dan bann devlopman parey nou kapab vwar ozordi ki nou kapab fer en miting atraver *zoom*. Tousala i posib atraver teknolozi ozordi.

Madanm Speaker, i enportan pou nou konpran akòz ki i nesesser pou annan en lazans ki dedye pou fer sa travay. Dan domenn teknolozi i enportan toultan ki ou annan en *drive* ki ganny etabli. E apre sa *drive* i ganny pran par bann lezot sektè ki swa sektè prive oubyen bann akter ki pe fer li, pou fer ki nou kapab bouz pli devan.

Apriori, ler nou regard ki manner konfigirasyon teknolozi, inovasyon lasyans in ganny kondire i ti'n pri parmi lezot konsiderasyon lendistri e inovasyon ki pa ti pe permet li devlope dan lafason ki i devret devlope. In ganny retire e donn son lenportans prensipal.

E dan Minister ki pe dil avek *digitalization* e transformasyon nimerik pou asire ki i ava annan en koneksyon ant le 2.

Savedir lo en pwennvi striktirel, son konponan striktirel i ava ganny remet an plas. Me mon pwennvi devlopman inovasyon *NISTI* i ava *drive* sa larestan sa prosedir.

Madanm Speaker, bann Manm ozordi apre midi i

annan en loportinite. En loportinite pou zot donn bann zenn Seselwa ki pe devlope dan sektè nimerik en sans pou kapab ganny en landrwa en *hub* si oule. En pwen fokal, en pwen santral ki ava permet zot realiz zot rev pou vin bann akter kle dan domenn teknolozi.

Sesel i annan ase konpetans pou fer sa. E nou annan ase dimoun ki'n devlope dan pwennvi entelektyel, e pwennvi edikasyonnel atraver zot *training* pou kapab fer sa.

Madanm Speaker, nou ava apresye pou note ki ozordi nou annan *programmers* Seselwa ki kapab *design* bann program ki lo nivo menm bann ki enternasyonal.

E souvandfwa nou pa war, nou pa remarke akòz nou pa pe donn loportinite sa bann dimoun pou montre zot talan, e demontre kwa ki zot kapab fer. Atraver sa Prozedlwa ki nou pe fer ozordi se zisteman sa ki nou oule fer.

Sak Manm Onorab ki vot lo sa Lalwa, mazin en ki dan zot distrik i annan en zenn ki pe devlope e ki anvi partisip aktivman dan sektè e transformasyon nimerik nou pei.

Zot pou pe donn sa zenn sa loportinite. En vot atraver sa Prozedlwa i en vot an faver sa zenn, sa ki i anvi akonplir.

E lepanouisman teknolozi dan nou pei. Nou bezwen regard pli larz ki bann konsiderasyon politik.

Si yer en ladministrasyon ti deside pou retir *NISTI* koman en lorganizasyon, sa ti son prerogativ Polisi.

Ozordi nou pa pe regard konsiderasyon politik. Me nou pe regard konsiderasyon ki mannyer nou kapab avans nou pei pli devan. I nesese pou nou komans annan bann nouvo fason panse. E regard keksoz dan en nouvo lanpler.

Ozordi teknolozi pe avans sitan vit. E nou pa kapab koman en pei les sa kit nou deryer. Wi nou bezwen amenn en transformasyon nimerik kot nou tou nou al *online*, kot nou tou nou kapab fer nou laplikasyon nou bann prosedir *online*.

Me akote sa i annan en lot travay ki bezwen ganny fer. E sa se en travay inovasyon. Ki bann nouvo keksoz nou kapab anmennen atraver teknolozi pou ed nou fer nou lavi pli fasil. Pou ed nou fer nou lavi pli konfortab. E pou anmenn en lot nivo lenvestisman pou nou pei.

Madanm Speaker, Lasanble i bezwen pran konsyans en fe. E sa se ki Sesel napa bokou resours dan ki bann zenn i kapab servi pou envestir oubyen dan ki

zenerasyon fitir pou kapab envestir ladan.

Me transformasyon nimerik i reste en landrwa realizab kot nou kapab kre lenvestisman e menm larises pou nou pei.

Me pou nou kapab fer sa nou bezwen annan en *buy in* tou Seselwa. Devan sa Lasanble ozordi apre midi i en Lalwa ki zisteman pe al ver sa lanpler. E i kler Madanm Speaker ki lentansyon sa Lalwa se zisteman kre sa. Dan sa konteks Madanm Speaker, i osi enportan pou nou note ki transformasyon nimerik pa regarde ki ou konotasyon politik, relizye oubyen lezot keksoz.

Sa ki regarde se ki ou annan akse, e ki ou annan sa kapasite pou kapab travay *within* en sekter ki pe kontinyen evolye. Nou, nou bezwen er sir ki tou Seselwa i kapab ganny akse ek teknolozi. Sa i al ver demokratizasyon teknolozi pou asire ki tou dimoun pe enport kot zot ete, zot kapab ganny akse ek teknolozi.

Mon krwar ki bann Manm i konpran e konsyan *lenjeu* en tel Lalwa. E i ava nesese ki zot ganny nou sipor.

Madanm Speaker, mon'n prezant sa Lalwa dan en konteks kot ozordi nou pei i *at* en *cross-roads*. Swa nou

deside pou nou kontinyen fer keksoz parey nou pe kontinyen fer. Swa nou deside pou nou anmenn inovasyon, e sanz konteks e sanz fitir nou pei.

Sa ki Gouvernman aktyel pe prezante i pa en keksoz ki annan pou fer avek zis son prononsman koman en parti politik. Me en keksoz ki regarde e prezant en program devan Lepep Seselwa, ki Lepep Seselwa in aksepte atraver met li o pouvwar pou delivre lo sa program.

Sa Gouvernman i Gouvernman tou Seselwa. Pe enport si ou'n vot pou li, oubyen ou pa'n vot pou li. Lesansyel alors i bezwen fer ki nou tou nou travay pou realiz bann ve e bann swe ki Lepep Seselwa in met an plas.

Sa ki nou pa devret fer selman se regard en keksoz pirman *from* en konotasyon politik, aköz i en kote ki'n anmennen e i pa lot kote oubyen aköz sa.

Sa ki mon oule dir ozordi apre midi, zot, zot Lasanble Nasyonal. Zot, zot regard lentere zot bann kou sitwayen. Zot la pou fer reprezantasyon. E zot la pou fer ledikasyon. E sa ki pli enportan zot la pou rod loportinite pou tou Seselwa demen.

Madanm Speaker, sa Prozedlwa devan nou i reprezant loportinite pou tou

Seselwa demen. Se alors avek sa ki mon pou termin mon prezantasyon.

E demande, e fer rekomandasyon, fer Pledwari ki tou Manm sa Lasanble i siport sa Prozedlwa pou nou lans en lapel avek bann zenn ki pe regard nou deor.

E sa nouvo zenerasyon Seselwa ki pe ki pe adopte teknolozi. E ki krwar ki teknolozi i kapab transform zot lavi. Annou siport sa Prozedlwa pou ki Gouvernman i kapab travay lo kre sa si oule sa *science and Innovation Hub*.

Ki ava permet nou bann antreprenner, nou bann diferan akter dan sa sekter kapab ganny loportinite pou zot kapab zisteman anmenn inovasyon teknolozi dan nou pei. Avek sa Madanm Speaker, mon met sa *Bill* devan Lasanble. Mersi.

MADAM SPEAKER

Mersi Vis-Prezidan. Nou ava prezan pran bann entervenans pou deba zeneral. Onorab Claudette Louise.

HON CLAUDETTE LOUISE

Bonn apre midi Madanm Speaker. Vis-Prezidan ek ou delegasyon. Tou bann Manm Onorab e tou dimoun a lekout. Sa *Bill* devan nou pe demande ki en Lenstitisyon Nasyonal pou Lasyans ek Teknolozi ek inovasyon i ganny reetablir

koman sa lenstiti fokal ki pou anmenn *leadership* e kordinasyon pou resers dan sa domenn.

NISTI, Lenstiti pou Lasyans e Teknolozi Inovasyon ti vin operasyonnel an 2014 e son Lalwa ti ganny aboli an 2021. Rezondet pou etabli *NISTI* ti baze lo en odit fer par *UNESCO* an 2010, pou vwar kote size Lasyans Teknolozi, Inovasyon i sitye dan Sesel. Rezilta ti montre ki bann fonksyon Lasyans teknolozi inovasyon ti disperse dan diferan Minister, Lazans e ki ti napa en striktir pou lead sa domenn lo nivo nasyonal.

E se la kot rekomandasyon ti fer pou fer ki en striktir lenstitisyonnel e en lankadreman Lezislatif koman en lazans ki tous tou sektè krisyal pou devlopman lekonomi Sesel.

Sikse *NISTI*, primordyalman in ede elev konesans nasyonal lo sa size Lasyans, Teknolozi e Inovasyon in kontribye dan devlopman. E kordin lansman en premye Polisi Nasyonal e lankadreman stratezik an 2016.

NISTI in osi etabli en program edikasyonnel ki nou *shorten* li *STEM*, Lasyans, Teknolozi, Enzenyer e Matematik. Sa ti an 2017, pou sansibiliz zanfàn lekòl, paran e lantouraz laprantisaz lo son

lenportans. Anba sa program laprantisaz *robotic* ti ganny entrodwir. E Sesel ti fer son premye partisipasyon dan defi global *robotic* 2017.

Premye konpetisyon an *Washington DC* an 2017, Sesel ti ganny plase 126enm. E firamezir, *Team Seychelles* in amelyor son pozisyon global 21enm pozisyon an 2024. E pli o plasman ti dezyenm pozisyon dan Premye *Challenge Robotic Global* Vertyel pandan Pandemik *COVID-19*.

NISTI in pozisyon Lasyans, Teknolozi, Inovasyon koman en zouti pou diversifikasyon ekonomik e devlopman soutenab. *NISTI* in pas Sesel anler dan Program Edikasyonnel *STEM*, koman en Pti Leta Zil egzanpler kot i ti ganny prezante Meday Bronz *Washington DC*, *Al-Khwarizmi Award* koman en lorganizasyon pli byen e pli byen organize.

Apartir la, *NISTI* an kolaborasyon avek Minister Ledikasyon in etabli plizyer klib dan lekòl otour Mahe, enkli Grand Anse Praslin pou promot Program *STEM*.

Bann zanfàn ti annan sa lentere e lantouzyazm pou partisip dan bann Program *STEM*. Partaz *skill*, ganny plis bagaz e bokou zot bann *high performers* e menm pran en karyer dan sa domenn.

Sikse *NISTI* an deor Ledikasyon *STEM*, in ede met an plas sipor pou bann dimoun ki vin avek bann komansman proze nouvo linisyativ ki'n tonm dan sa kad biznes, teknolozi e inovasyon biznes. In fer provizyon mendev, partaz konpetans pou bann debitan. E bokou debitan in zwenn sa Program *NISTI*.

E atraver sa serten in komersyaliz zot biznes, e i annan ki ankor dan prosedir. An 2017, *NISTI* in anbark lo devlopman bann lankadrem nasyonal pou etabli en dokiman operasyonnel konpreansiv pou inovasyon biznes teknolozi, teknolozi biznes.

NISTI in kolabor avek plizyer fondasyon resers e partner lokal pou kordin sipor e asire ki resers i lo nivo standar enternasyonal.

An kolaborasyon enternasyonal, *NISTI* in ed Sesel ganny vizibilite, konekte avek lemond syantifik. *NISTI* in asir partisipasyon Sesel dan bann plan aksyon proze lasyans teknolozi inovasyon.

E Sesel in avek sikse devlop son prop plan aksyon. Konsekans fer en fermtir *NISTI* par Gouvernman *LDS*, in anmenn lenteripsyon ekonomik ek stratezik anver bann progre Lasyans Teknolozi Inovasyon.

E afeblir ladopsyon teknolozi ver bann sektor prodiktiv. In abes moral bann *staff* a sa letan. E bokou profesyonnel ti'n perdi zot lanplwa.

Enteripsyon dan devlopman Program *STEM*, afeblir langazman zenn kontinyite ver ledikasyon pou inovasyon e lanplwa. Bokou zenn ki ti deza angaze dan program *NISTI* ti perdi loportinite *mentorship*.

E aplikasyon lasyans ek teknolozi pratikal dan laklas. Perdi sans ganny ekspeze avek realite lemond. E sans akse in limite pou aprofondi letid e karyer dan sa domenn.

Sesel in perdi kolektivite avek lemond syantifik. Ozordi Sesel in tonm par deryer bokou bann Pti Leta Zil dan lasyans teknolozi inovasyon. E nou pei vwazen Moris i bokou pli devan lo Lendeks Inovasyon. Sesel pa'n annan son lobligasyon lasyans teknolozi inovasyon lo kote *SADC* e *EU*.

E aköz sa in ganny deprive bann loportinite kolaborasyon e lasistans finansyel. Resaman Sesel pa'n perform osi byen dan Konpetisyon *Global Robotic*. E sa i pa reflekte mank talan, me labsans en lankadrem sipor lenstitisyonnel ki ti pou en lavantaz. Sa lenpak i reprezant en perd pa zis pou program,

en perd konfidans, en perd *momentum* e aspirasyon parmi bann zenn.

An gro sa pa ti en desizyon stratezikman byen kalkile par Gouvernman LDS. Avek reetablisman *NISTI*, i en letap krisysel pou Gouvernman US, pou anmenn restorasyon *STEM*. Relev langazman zenn, remet lenerzi lo kote inovasyon biznes.

Sesel pou bezwen pran bann gran lepa pou asire ki nou zwenn avek larestan rezyon e bann Pti Leta Zil pou elev Lasyans Teknolozi, Inovasyon dan son plan devlopman e *socioeconomic*.

Akt koman en pon ant Gouvernman, bann ki annan lentere dan sa sekter bann Sekter Prive, partner enternasyonal. *NISTI* pou osi gid Gouvernman lo bann lemerzans teknolozi e inovasyon vize ver rezilyans nasyonal lonterm kont bann faktor advers espesyalman sanzman klima.

Promot aktivite kreativ e konpatib dan lekol. Anmenn plis proze lasyans inovasyon ki a elev lentere, elev nivo e kalite lansennyman e aprantisaz dan matematik.

E osi fer ki resers ek devlopman i atrakte bann lantrepriz e biznes. Devlop stratezi e promot lilizasyon *AI* e lezot emerzan teknolozi e modernizasyon nimerik

koman zouti dan tou laspe devlopman *socioeconomic*.

NISTI pou bezwen etabli en lakademi lasyans, pou fer provizyon endepandan baze lo levidans pou gid Gouvernman, promot ekselans e promot lentegrite syantifik pou fourni resers e ledikasyon.

E ki sa lakademi i ganny servi koman en lavwa kredib pou piblik. E bann ki travay lo bann Polisi, ferm gap lasyans avek bann bezwen lasosyete pou benefis nasyonal e global.

E parey tou lorganizasyon rikord a ganny garde e rapor a ganny prezante par *CEO*. Rikord nou bann aktivite, e *statement* finansyel lenstitisyon i a ganny fer prezantasyon par son *CEO* ki nou konnen Mr Estico i en dimoun kapab e konpetan. Nou asire ki Gouvernman i a regard akse abordabilite tou dimoun pou plis devlopman dan sa domenn teknolozi.

Madanm Speaker, *NISTI* in frot zepol avek bann pei pwisan. E avek sanzman klima dan sa domenn i vremen enportan pou transformasyon.

E fer ki non selman par en ekipe avek bann bon gidans e lenplimantasyon. Koman en Seselwa, mon napa dout ki *NISTI* pou vin avek bann lapros e metod modern pou retourn pli determinen pou rebran son pozisyon.

Enn bann pilye fondamantal dan nou manifesto, anba lendistri teknolozi ek transformasyon nimerik. Sesel pou en nasyon *smart* kot teknolozi e moter progre enn ki kre loportinite pou inovasyon. E avek sa mon remersi ou Madanm Speaker.

(APPLAUSE)

MADAM SPEAKER

Onorab Hoareau.

HON JOHN HOAREAU

Mersi Madanm Speaker. Bonn apre midi Madanm Speaker. Bonn apre midi VP ek ou lekip. E tou dimoun ki pe ekoute.

Madanm speaker, i enportan pou dir ki pou nenport ki pei devlope i bezwen annan sipor pou son bann lendistri tradisyonnel pou li bouz avek teknolozi ek linovasyon, nou napa problem avek sa nou. Sirtou dan domenn Lagrikiltir, Lapes ek Lartizana e bann sekter kot nou kapab fer en pe larzan pou nou lekonomi devlope.

Alor, en seksyon *RNB* i en seksyon enportan pou anmenn inovasyon pou anmenn devlopman teknolozi dan sa bann domenn. Listwar in montre kot Lerop in arive ozordi, in pas atraver sa ki nou apel bann revolisyon endistriyel. Kot dan bann lannen 1760 a 1960 nou'n

vwar ki sa in ganny pouse par lilitizasyon sarbondter.

E ozordi nou'n koz osi lo en dezyenm evolisyon endistriyel ki'n ganny pouse par elektrisite, *gas* avek delwil. E trwazyenm evolisyon endistriyel ki'n ganny pouse par lenerzi renouvlab.

E ozordi nou pe koz osi lo en katriyenm revolisyon endistriyel ki ganny pouse par teknolozi nimerik. *Smart factories, Robotic e physical and biological technologies.*

Ou konnen nou, nou problem ti avek malgre ki sa lenstiti ti annan bann on kriter pou li egziste, bann bon rezondet pou li egziste. Me nou problem ti avek lafason ki nou pe get valer pou larzan. Madanm Speaker, dan nou lendistri lokal par egzantp Lendistri Kannel.

Si nou realize menm ki *NISTI* ti'n fermen koman en lenstitisyon, me selman ti *still* annan en seksyon, en departman dan Minister Lantreprenarya kot ki ti antreprann bann size devlopman teknolozi e laplikasyon teknolozi dan lendistri.

Me nou pa ti vwar ase sa bann keksoz ganny devlope. Nou pa ti vwar ase sa bann kriter si oule sa bann fonksyon ki'n ganny mete anba son Lalwa, ki'n ganny met an aplikasyon. Par egzantp Minis

pou Lantreprenarya ti vin avek sa lide devlopman kannel. E kannel son lesans li menm i annan en valer vreman ser lo nivo mondyal. I annan en valer pou bann lakonpannyen ki fer bann prodwir kosmetik, *Coca Cola* ensidswit, akòz se sa bann zengredyen prensipal ki ganny mete ladan pou donn li sa gou inik ki i annan.

Me nou pa'n vwar ase valer azoute ganny mete lo sa bann prodwir kannel lo travay pou anmenn si oule. Parey sa Mr Moustafa ki ti pe fer serten travay pou ekstraksyon lesans kannel.

Nou pa'n vwar ki manner sa lenstitisyon in kapab ed li pou li mars pli devan avek teknolozi, pou fer sa bann ekstrasyon ganny en pli bon *quality or purification level* pou son bann prodwir ensidswit pou li kapab eksporte. E retenir zisteman pli bokou larzan dan nou lekonomi.

Nou konnen devlopman lagrikiltir, devlopman *Aqua* kiltir osi nou kapab servi nou gomon pou fer plizyer keksoz avek kosmetik, bann prodwir kosmetik nou dimyel pou fer bann lezot prodwir medisinal ensidswit.

Me nou pa'n vwar ki fason, i annan sa lentegrasyon ant *NISTI* avek sa bann diferan sekter dan lekonomi.

So, se sa ki'n fer nou en pti pe pran en lot lapros avek sa size. Menm si ou get lo kote fason *NISTI*, relasyon ki i devret annan avek liniversite, akòz bokou fwa dan sa bann lezot pei Lerop se liniversite i annan en *faculty* pou *research and development* ki osi ede.

Alor, model ki nou, nou ti pe pran nou ti pe mazine ki *NISTI* ti ava kapab entegre avek Liniversite Sesel.

E anmenn bann resers devan ki kapab ed sa pti dimoun oubyen sa pti agrikiltir pou devlop teknolozi dan lagrikiltir pou devlop teknolozi dan lartizana e osi bann prodwir ki dan nou lendistri tradisyonnel.

Madanm Speaker, i annan osi devlopman *patency* en prodwir standar tousala i kapab tonm anba zot prerogativ zot *purview*, *per se* pou zot kapab devlope.

Par egzanp nou konnen ozordi bann dimoun ki prodwir savon lokal ki vann avek touris, bann prodwir delwil ki fer masaz ensidswit zot bezwen anvoy zot prodwir aletranze pou al ganny bann sertifikasyon pou standar, pou fer sir ki sa bann prodwir pa toksik pou lapo ensidswit.

Oubyen son bann zengredyen ladan i balanse ensidswit. Se sa ki nou ti pe ekspekte ki *NISTI* ti pou kapab anmenn pou lev bann

prodwir artizanal, bann prodwir ki bann dimoun bann artizan lokal i fer e ki kapab anmenn plis rantabilite dan pei.

Olye pey pou anvoy zot prodwir Malaysia pou al ganny sa bann standar, zot ti kapab fer li atraver teknolozi ki *NISTI* ti pou kapab anmennen.

So, alor mwan mon konpran ase byen en lenstitisyon ki *stand alone* i pli fasil pou li akse avek bann fon enternasyonal, aköz souvandfwa bann lezot lorganizasyon enternasyonal i pa tro anvi donn larzan en Gouvernman. Tandi ki kapab donn larzan pou en program devlopman atraver en lenstitisyon ki en pe endependan.

Me an dizan, nou pa'n vwar ase sa bann kalite zimlaz, sa bann kalite relasyon enternasyonal ki'n ganny devlope pandan sa bann letan ki i ti egziste.

So, nou ti vwar petet bokou lanfaz ti ganny mete, mon pa pou dir ou non lo kote ledikasyon, lo kote bann pran par parey mon nou dir dan bann Konpetisyon Enternasyonal *Robotic*, pou donn marmay sa motivasyon pou zot konpran teknolozi.

Me nou pa'n vwar ase ki fason sa lenstiti, sa larzan ki ti ganny mete ladan ti *trickle down* tou bann Sekter

Tradisyonnal Artizanal ou lapes ou lagrikiltir.

Madanm Speaker, nou e vwar osi ki sa lenstitisyon atraver son Lalwa pou kapab osi manage bann *funding* pou nouvo teknolozi bann zenn ki enterese dan nouvo teknolozi pou anmenn pou donn zot bann *funding* pou zot kapab fer sa bann keksoz.

Me mwan mon pe demann mon lekor en kestyon eski sa i pou mars parey en *revolving fund*? Oubyen i pou en keksoz ki vin zis en *grant*, me apre nou pa vwar ki fason i pou bezwen pran dan larzan dan *Consolidated Fund* pou li zis met ladan toultan?

Eski ki fason sa *funding* pou marse, mon ti a kontan ki petet ki *VP* ler i donn son larepons. Eksplik nou en pti pe an detay ki fason sa bann *funding* pou ed sa bann zenn an deor, ed sa bann zenn dan mon distrik ed sa bann zenn dan lezot landrwa osi pou zot kapab anmenn bann proze ki *technologically savvy* pou zot kapab ganny *funding* pou zot fer sa bann keksoz.

Madanm Speaker, parey mon'n dir nou lo nou kote nou pa kont annan en landrwa oubyen en lenstitisyon, oubyen Departman Gouvernman ki kapab promouvwar resers ek devlopman.

Me selman nou ti annan problem lo valer pou larzan lo ki fason sa bann keksoz i *trickle down* pou al kot bann pti dimoun dan distrik. E pou kapab fer ki nou lekonmi i agrandi. E sa bann dimoun dan distrik i benefisye avek sa keksoz. Avek sa mon a remersi ou. Mersi.

MADAM SPEAKER

Onorab Trevor Louise.

HON TREVOR LOUISE

Bonn apre midi Madanm Chair. Bonn apre midi tou dimoun a lekout. Bonn apre midi *VP* ek ou delegasyon.

Madanm Chair, mon pou konmans mon lentervansyon koumsa. Mon pou dir ki napa zistifikasyon pour letan nou kree en baryer ekonomik. *Ok*.

E mwan mon onnetman e senserman krwar ki sa fermtir *NISTI* an 2021 in met lasyans, lendistri e teknolozi 7an - 4an an retar. 4an an retar. *Sorry*, en.

An 2014 *NISTI* ti ganny kree, parey Onorab Claudette Louise in fer sorti, anba *National Science Technology and Innovation Act*.

E 7an apre, pa ni menm bokou letan an 2021, i ti ganny aboli konman en lenstiti e sa Lalwa ti ganny *repeal*. Savedir ti nepli anfors. E bann proze lenplimantasyon sa lenstiti ti ganny *absorbed*

anba Departman Lantreprenarya e Lendistri.

Gouvernman avan ti ferm en lenstiti ki ti'n ganny kree pou fer resers e pou avans teknolozi e lasyans dan nou pei e abzorb li anba en departman, *ok, as part of the process pou downsize and rightsize i suppose*.

Me sa lenstiti konman en lenstiti sa letan i ti kree en *Policy and Strategy* an 2017 ki sipoze dayer ale ziska 2025, ki mon mazine la avek son – ler nou a redonn zot, zot lotonomi zot a reganny etabli, zot a kapab revwar sa Polisi.

E i vin dan en letan kot i ideal e agreab. Parske konman en Gouvernman, *United Seychelles* pe met bokou lanfaz lo *artificial intelligence*.

E avek bann *emerging trends*, savedir bann nouvo tandans bann devlopman enternasyonal, nou vwar ki i annan bokou devlopman ki pe ganny fer ki i pa ti pe forseman ganny anmase anba sa *Policy and Strategy*, ki mon swete ki avek *the establishment of* sa lenstiti la i ava kapab ganny entrodwir.

Me selman mon anvi zis fer resorti – mon swete ki *VP* i pran *note* ki malgre in annan bokou bann *achievements* ki'n ganny fer atraver *NISTI*, in osi annan *challenges* ki bann *staff* in apros mwan. Serten *staff* in

apros mwan pou met devan ki ti egziste.

E bokou dezapwentman in vin par fermtir, pa zis *NISTI* an 2021. Me osi ler *NISTI* ti ganny demande pou sorti Bel Ombre kot i annan son landrwa, *ok*, ki ti pou vin son *incubator*. Son *hub*. E zot ti ganny tire pou kapab *accommodate* bann marmay lekol Belonie. Akoz mon mazine petet i ti annan en rezon deryer.

Me selman, *NISTI* konman en lenstitisyon ti perdi bokou an term *funding*, an term sipor. E bokou zot bann proze nasyonal e enternasyonal ti ganny met *on hold*. E menm i annan ki zot ti perdi tou. *Alright*.

E bokou bann *staff* sa lenstiti oparavan pe rod garanti an term avek sa – letan *NISTI* pou ganny reetabli la, si zot pou ganny zot en landrwa ki *fixed* pour zot kapab antreprann zot bann proze.

E osi ti annan en proze an term sa ki zot ti apel li *GERD*, *Government Expenditure on Research and Development*. Ki i paret *NISTI* ti'n konmans en *semi online survey*. E i paret Sesel ti *the leading country in Africa*.

Me ankor byensir avek sa fermtir *NISTI* nou ti perdi, malgre nou ti annan resours, nou ti perdi nou sans pou kapab enplimant sa proze. E

sa i parmi enn de bann *challenges* ki'n ganny fer.

Me nou osi rekonnet ki i annan avek sa *robotics competition* parey Onorab Louise in fer resorti, Claudette Louise in fer resorti ki i annan bokou zenn ki'n ganny sans pou antreprann bann vizit enternasyonal, bann lesanz kot zot in ganny sans pour zot aprann bokou. Lanmerik, *Mexico*, *Dubai*, *Switzerland*, kot zot in kapab partaz e obtenir bann nouvo teknik e fason fer.

Be ler nou, nou annan en zenn *homme* ki tre edike, Adrien Hoareau, ki li osi a plizyer repriz mon aprann in ganny sans pour li partisip dan bann tel lesanz. E menm nasyonalman mon konnen poudir in fer en kantite an term devlopman.

Now, in terms of the Bill, an term nouvo keksoz ki i pe vin avek, nou vwar ki Prezidan pe ganny mete konman *patron* pour *NISTI*.

E sa mon santi ki i pe montre komitman Gouvernman e Prezidan li menm pour li kapab pran sarz si ou le an term bann devlopman an term lasyans, teknolozi e lendistri ki pe vini dan nou pei.

E mwan mon pou dir ki mon pou siporte en tel *Bill* parske mon konnen poudir i annan bokou benefis ki pou

apporte pour Sesel. Espesyalman dan bann zenn Seselwa. E mon swete ki larestan mon bann koleg ava fer parey. Mersi.

(APPLAUSE)

MADAM SPEAKER

Onorab Aglae. Onorab Aglae.

HON EGBERT AGLAE

Mersi Madanm Speaker. Bonn apre midi VP, Mr Estico e Mr Pool. E tou dimoun ki a lekout.

Madanm Speaker, sa *Bill* ki devan nou pe fer kreasyon en lazans ki pou regard domenn teknolozi, lasyans e inovasyon. I en lazans ki nou ase azour aköz letan mon ti dan Lasanble mon'n deza fer serten diskisyon lo la.

Pour en pei parey Sesel ki pe devlope, en tel lenstitisyon i annan son lenportans, *ok*. E tou sikse mon kapab dir i bezwen annan en konmansman, i bezwen annan en fondasyon, *ok*.

Mon'n ekout serten entervenan lo lot kote latab atraver ou Madanm Speaker. Bann rezondet ki zot pe site. Bann rezon ki zot – son Gouvernman an 2021 ti pran pou *repeal* Lalwa ki ti fer kreasyon sa lazans.

E enn bann rezon ki'n ganny site se valer pour larzan, i enn. Ki fer – i fer

mwan reflesir lo enn de keksoz.

Si nou pou atas valer larzan avek tou keksoz, i pou annan – ti pou annan serten resers. Ti pou annan serten *outcome* ouswa serten dekouvert ki pa ti pou zanmen egziste, *ok*.

Akoz plizyer resers pou anmenn linovasyon, pou anmenn bann nouvo konseps, nouvo prodwi, i pran letan, *ok*. Zis parey dan domenn medikal. Resers pou bezwen fer pour ou trouv en gerizon, en tretman. *It takes time*. E ou bezwen annan *input* resours lo en baz kontinyel avek *hope* ki demen ou pou ganny en rezilta.

Be si tou Gouvernman *au monde* ti dir, mon pa pou met larzan aköz nou pa ankor war en gerizon parey pour *HIV/AIDS*, ouswa en gerizon pour serten kalite kanser. Ouswa pour en serten kalite maladi. Be zanmen nou pou annan en tretman.

Ouswa ou pe pran en lapros pour mon pa pou envestir larzan aköz mon pou – dapre zot sa i en gaspiyaz larzan. Be nou pa pou bouze, zanmen. I en refleksyon ki nou bezwen fer sa. Nenport ki Gouvernman ki vin o pouvwar.

Sa lazans in ganny kree avek en bi vizyoner li, pou met Sesel ansanm *at par* dan en peryod letan, ki pou dan le

fitir. I pa pou vin dan 3an, 4an, 5an sa. Dan le fitir avek bann zean ki pe *compete* avek bann linovasyon ek teknolozi ki nou bann zenn zenerasyon ki pe monte i pa ganny kit deryer.

I annan en pei ki mon'n swiv de pres ki mon admir son fason ki linovasyon lo nivo Lafrik in fer. Sa se *Nigeria*. *Nigeria* i annan en bon program ki'n devlop son lasyans teknolozi dan diferan konsep. E menm lo nivo liniversiter. Bann diferan lakademi ki zot in met anmars.

E ou war poudir zot in perse dan lemonn. En pei dan Lafrik. Ozordi zot in perse menm lo baz nivo Eropeen zot in ale. Be zot pa ti konmans yer sa. *Way back* ek lenvestisman ki'n ganny envestir dan zot sistenm Gouvernman avek sa bann – atraver sa bann lazans pour zot ariv kot zot ete ozordi.

Be nou nou'n fer - 2021 nou'n fer en pa an aryer. Malgre zot in dir poudir sa fonksyon ki sa lazans ti annan, *NISTI* ti annan ti'n met li dan en Minister.

Be nou tou nou konnen poudir letan ou, ou pran, parey menm zafer ek *APDAR*, met li anba Minister Lasante. La ou pran *NISTI* ou ti met li anba Minister lenvestisman Lantreprenarya. Napa gran keksoz ki ti arive aköz sa latansyon nesaser ki i ti

bezwen i pa'n zanmen gannnen. *That's the problem* letan nou fer sa.

Mon osi mon'n swiv tou resaman dan nouvel kot sa group zenn ki partisip dan sa *forum robotics* enternasyonal in eksplik zot dezapwentman, zot konsern ki zot in fer fas avek letan zot in al partisipe. E letan zot in laba dan transportasyon, zot in rankontre problemm avek zot sistenm e zot pa'n kapab perform alaoter.

Eski – kestyon ki mon a demande, lekel ki ti pe *oversee* pou fer sir ki – pa neserman zis *oversee*. Sipor ki zot ti merit pe gannnen.

E mon mazin en ki si atraver en lazans ki ti pou pli byen ankadre avek en pli bon program ki ti pou *ensure* depi son komansman ziska son legzekisyon final. Mon asire ki sa zot ti pou ganny en pli bon *performing result* dan en sans.

Mon konnen poudir *NISTI* ti'n konmans fer lot – nonm lagrikiltir. Ti annan bann inovasyon ki zot ti pe vin avek dan lagrikiltir atraver bann sistenm pestisid e son lizaz dan li menm. Son bann demizasyon. Nou konnen zot ti pe fer sa.

So zot ti pe fer en travay ki pa bokou ti pe konpran petet. Mon pou dir koumsa mwan. Petet pa bokou ki ti pe ganny eksplike ki ti pe arive

ouswa ki ti pe ganny fer. Ouswa petet zot lentere pa ti ladan. E ler ou lentere pa dan en keksoz i pa vedir i napa nesesite ouswa i napa son lesansyel. Sa fodre nou fer sir. Sirtou kot i konsern teknolozi.

Letan ou pe antre lo laz, ou pe vyei, *the use of* teknolozi pour bokou nou i pa sa sitan esansyel konpare ek en zenn. E se sa ki letan ou annan bann *leaders* ki anmezir zot pe vyei, saze zot pa pe war sa nivo teknolozi, i pa vedir ki sa ki pe monte li i pa bezwen sa. Nou bezwen war pli devan ki sa. Nou bezwen balanse sa bann keksoz.

So, pour mwan mon *welcome VP* ou *Bill* pou remet sa lazans *NISTI* lo son pwen kot i merite. E dan Lalwa i met Prezidan Larepiblik koman patron *NISTI*. Wi, Prezidan i annan en laz li osi.

E mon kontan. Se sa ki mon'n nonm sa bout. Mon kontan poudir i pou vin patron pou *oversee* fonksyonman sa lazans li menm. E i a konpran osi akoz ki i bezwen annan en lenvestisman kontinyel anver lasyans, linovasyon ek teknolozi. Akoz sa i labaz kot lemonn pe bouze ozordi.

Tou keksoz pe vin pli *mechanical*. Bann diferan prototip in ganny *designed* konmela ki kapab ganny servi dan menm dan servis piblik pou ed nou *fast track*. E nou

manifesto i mansyonn litalizasyon teknolozi e *AI* modern pour nou kapab bouz keksoz pli devan.

So, i en lespwar pour sa bann zenn ki pe leve, ki pe pran lasyans teknolozi konmen enn zot domenn letid e zot karyer. Sa i zot laport ki pe ouver ankor en fwa pour zot kapab ganny ankadre.

E mon demande ki byensir, avek liniversite osi in nonmen. Ti annan en program ek liniversite. Sanmenm sa ki mon dir. Zot pa'n ganny eksplike serten keksoz. Zis nou pran keksoz ki ti la ki zot pa konpran, zot in zete. *This is the problem.*

So, mon konnen pou annan son labaz lo liniversiter osi ki pou vini pou ankadre. E *VP*, nou swete ki Sesel i bouz devan avek sa nouvo transformasyon ki mon santi – mwan mon apel li transformasyon mwan. Mon pou dir poudir nou pe bouz devan avek en vizyon ek en inovasyon. Mersi.

(APPLAUSE)

MADAM SPEAKER

Onorab Georges.

HON BERNARD GEORGES

Mersi Madanm Speaker. Madanm Speaker, annan de fwa ler mon ekout nou bann Manm Onorab, mon demann

mon lekor, eski zot in lir sa Lalwa ki devan nou ozordi avan ki zot koz lo la?

Ou war Madanm Speaker, Vis-Prezidan i annan parfetman rezon. Sa se pa en Lalwa pour nou vin fer politik lo la. E nou pa anvi fer politik. Alor akoz ki zot, zot in deside pou vin fer politik avek sa Lalwa?

Ou war, ler mon ekout Onorab Claudette Louise, mon dezapwente. Akoz pou sa Onorab, *LDS* ki sel rezon ki *NISTI* in *fail*. In donn nou en litani tou bann problem ki selon li, *LDS* in koz *NISTI*.

Pourtan, pourtan, larealite i byen diferan. E mon ava eksplik zot akoz larealite i byen diferan. Les mwan komans avek zis enn.

Onorab Aglae fek dir nou ki, *ya*, Prezidan – Prezidan koman patron sa lenstiti, i en bon keksoz. I en keksoz enportan akoz sa i vin anba Prezidan e li ki pou –

Be anba Lalwa 2014 Prezidan menm ki ti patron sa Lalwa. Zot Lalwa ki zot ti pase an 2014. Prezidan. Mon ava lir avek zot seksyon 17(1) Lalwa 2014, *National Institute for Science and Technology and Innovation Act*. “*The President shall be the Patron of the Institute*”.

Forward to the past Madanm Speaker, eskiz mwan. Nou ti annan en

loportinite la apre midi e Prezidan in envit nou. In servi sa mo, mon pe envit zot. In envit nou kolabor ansanm pour nou fer en zoli travay pour nou dir wi.

E li menm li in dir, i toutafe normal ki diferan Gouvernman i annan diferan Polisi. Nou, nou Polisi sete pou tir sa lenstiti. Zot, zot Polisi se retourn sa lenstiti.

Ekout zot prop Vis-Prezidan mon bann zanmi. Akoz in donn nou – in donn nou son filozofi apre midi. In donn nou semen. In tras semen pour nou. In dir nou sa set en size kot nou bezwen kolabore. Nou bezwen travay ansanm. I pa en kestyon ki devret divize. Me zot in kontan pou fer li.

Les mwan prezan eksplik zot akoz ki zot napa rezon e akoz ki mon krwar e mon konvenki – e mon'n dir sa semenn pase. Mon'n dir la, e mon pou dir sa ankor ki sa ki zot pe fer avek sa Lalwa ozordi, set egzaktaman sa ki zot in fer avek bann lezot avan.

Zot program 100 zour zot in sakrifye *quality for speed*. Zot bezwen fer en keksoz pandan 100 zour, alor zot in fer li vit e zot pa'n ganny sifizaman letan pour zot asize e regarde, *is this the best that we can do?*

Ler Vis-Prezidan i dir nou apre midi ki son rev se ki tou

Seselwa i a kapab fer tou keksoz zot kapab lo zot telefonn. Be mwan mon war plen dimoun pe fer tou sa ki zot bezwen lo zot telefonn mwan.

La o bor mwan i annan enn ki asiz o bor mwan i fer tou keksoz lo son telefonn li. I fer mwan mazin sa – i fer mwan mazin sa liv ki ti sorti dan bann lannen 1980 ki ti apel " *The Hitchhiker's Guide to the Galaxy*" ki dir ki ti annan en bann *aliens* ki ti'n vin isi Sesel – ki'n vin Sesel. Eskiz mwan. Ki ti'n vin lo later e ki bann dimoun ki ti reste lo later – nou, nou ti krwar nou ti telman avanse.

Zot, zot in sorti lo zot plannet zot in ariv kot nou. Nou, nou ti krwar nou ti'n telman avanse aköz nou ti annan *calculator* ki mars ek batri. *That's the thinking* ki mon war ki pe arive la devan nou ozordi.

Let's think boldly mon bann zanmi. Eskiz mwan. *Let's think boldly* Vis-Prezidan. Ou ti annan en loportinite. Zot ti annan en paz blan. *You had a blank page*, zot ti'n kapab ekri sa ki zot ti anvi lo la. E menm li in dir.

Nouvo fason panse. Annou annan en nouvo fason panse. Sa se pa en nouvo fason panse. Sa se pa en nouvo fason panse. Sa se en *rehash* of Lalwa 2014. Mon a

dir zot aköz. Les mwan, avek ou permisyon Madanm Speaker, pran 2 minit.

Long title "An Act to .provide", eksetera, texto cut and paste. Short title texto cut and paste. Apre – e sa mon a retourn lo la taler ler mon adres *Bills Committee*. Dan seksyon "Lenterpretasyon" zot trouv mwayen entrodwir en fot.

"3. *Establishment of the Institute*", *texto cut and paste. "Objectives of the institute, 4". (a), (b), (c).*

(c) zot in azout "*science diplomacy*". 3 mo. (d), (e), (f), (g) *texto cut and paste. (h) zot in azout "artificial intelligence".*

"5. *Functions of the Institute*". 5 (a) *texto. 5 (b) texto. 5 (c) la zot in entrodwir zot technology hub. (d) texto, (e) texto, (f) texto, (g) texto, (h) texto.*

(i) zot in azout en bout "*regional and international collaborators*", se tou. (j) *texto, (k) texto, (l) texto, (m) texto. (n) zot in extend li en pti gin. (o) i nef "create a conducive environment."* 4 laliny. (p) i pa swiv avek son *chapeau*. Mon a retourn lo la taler. *Bills Committee* pa'n war en problem.

Ziska prezan 99poursan sa ki sa vye Lalwa set egzakte man sa enn nef. Apre zot tir *Board*. Sel keksoz zot in fer zot in tir sa *Board* ki ti

egziste avan e “*Patron of Institute 6*”, *texto*. “*Chief Executive Officer*”, *texto*. Zot entrodwir en fot.

7(2), mersi Vis-Prezidan, ou'n ekout mwan semenn pase. Mon ti'n dir ki dan lapwentman nou devret annan menm kriter pour *dismissal*. E mon'n war ki sa in antre. Donk, mersi bokou, mon war ki mon parol semenn pase in marse.

“(5) *The Chief Executive Officer shall submit to the Minister reports*”, *texto*. Me, zot in entrodwir en fot dan zot kopye, zot in fer en fot. Nou a retourn lo la taler.

“8. *Termination of Chief Executive Officer.*” Sa i nef. “*Other staff of the Institute*”, *texto*. *Financial Provisions 10 (a) texto. (b) texto. (c) texto. (d) nef. “moneys received by the Institute as a funding*”, sa mon a retourn lo la taler. *(e) texto. (f) texto.*

“(2) *funds of the Institute*” egzakteman parey. *Word for word*. Sel keksoz zot in azoute, “*artificial intelligence.*”

“11. *Accounts*”, parey. “12. *Financial year*”, parey. “13. *Constitution of Committees*”, *new*. La zot in entrodwir *committees*. “14. *Minister *may (to) give directions*”, parey. “15. *Members *and (of) employees to be public servants*”, parey.

Ou war Madanm Speaker, alor ki nouvo fason fer ki nou pe koz lo la? Zot annan zot – zot ti annan zot en paz blan e zot in fer en sel keksoz. E sa ki mon pe repros zot nou fer, *forward to the past*. Se tou ki zot in fer.

Sel keksoz zot anvi fer se dir, sa ti nou lide an 2014. *LDS in tire*. La prezan nou pe retourn li egzakteman parey i ete avan. E nou ava menm kopye sa Lalwa. E zis pou montre zot ki nou pa'n kopye li, nou pou fer 3 fot ladan. *It's basically what you've done. That's basically what you've done.*

Nou anvi Vis-Prezidan, nou anvi ed ou. Nou anvi travay avek ou. Nou tou nou dakor isi ki nou bezwen annan en lenstiti *research and development*.

Me, eski – eski *this is the best that you could come up with?* Eski sa se - Vis-Prezidan li menm li a 2 repriz in apel sa en lazans. E Onorab Aglae fek apel li en lazans.

It's not an agency. Napa lazans la ki zot pe kree. Eskiz mwan. Napa lazans. I annan en *CEO* avek en Prezidan ki patron. Se tou. Sel keksoz zot in fer zot in kree en lenstiti. I pa en lazans. Zot napa *Board*. Zot in tire *Board*. Zot in met li laba. Zot in met li direk anba Prezidan.

E la ankor enn fwa mon remersye ou Vis-Prezidan akòz sa sete mon lide. Semenn pase mon ti dir ou *APDAR* ti devret Prezidan *CEO*. La ou'n ekout mwan, ou'n tir sa 5 – ou'n tir sa 5 soz, ou'n met egzakteman anba Prezidan. *Well done. Thank you very much.* Sanpyon. Nou koz menm langaz ou avek mwan. Ou war? *Is that the best...?* Lazans. Lazans. Oli lazans? Oli lazans?

Sa ki zot in fer Madanm Speaker. E i regretab - i regretab pou dir ki avek tou lavolonte ki nou annan ki nou anvi ed zot, ki nou anvi travay avek zot. Kot zot in kapab vin avek en – *that's the word. The word is in there. Innovation.*

Zot ti'n kapab *innovate*. Anmenn en nouvo striktir. Anmenn en Lalwa ki pou fer nou pei fyer. Anmenn en Lalwa ki pou nou pei fyer. Anmenn en Lalwa ki pou kapab travay. Zot al fer en *cut and paste* e zot fer fot anmezir ki zot pe fer sa *cut and paste*.

Ki mannyer nou kapab rekonsilye sa ki zot in fer avek sa ki zot in koz lo la ozordi ki zot anvi fer. *Move Seychelles forward.* Eskiz mwan, *Research Science and Innovation Hub.*

Fek koz lo la, la taler. *Science and Innovation Hub.* La nou pe al fer en *Science and Innovation Hub*. Eskiz mwan,

be depi 2014 ki zot ti pe fer? Depi 2014 ziska 2021 ki zot ti pe fer? Ti zot lazans! Oli sa *hub*? Oli sa *hub* ki prezan nou pe al fer?

E mon ava dir zot en keksoz. E mwan, mon vwayaz en kantite Moris mwan. Moris in fer *cyber city* depi 30an pase. Nou, nou ozordi ki nou pou al fer en *cyber* - *I mean, yeah, better late than never.* Mon *full* dakor. Nou pou siport zot. Anmenn Bidze nou ava donn zot.

But – But, ki zot pe fer depi 2014? Mon pa anvi denigre person, me Onorab Hoareau in mansyon sa en pti pe. Oli sa teknolozi? Oli sa direksyon sa- nou'n war bokou zenn zanfan lekol ki annan en abilite fantastik. Nou'n war zot pe bouz devan.

Wi, nou'n war zot pe fer robot e zot in ganny bon *marks*. Felisitasyon, *100percent* nou siport zot. *But apart from that*, kisisa ki tanzib ki zot in kapab montre nou ki zot in fer pandan sa 7an, e ki ozordi ki zot bezwen vin fer en *Science and Innovation Hub*?

Akoz ki – akòz parey Onorab Hoareau in demande, akòz ki zot pa'n mazin en pe plis? E si zot in mazin en pe plis, Vis-Prezidan ava dir nou. Akòz zot pa'n mazin en sinerzi avek Liniversite Sesel? Liniversite Sesel i anvi grandi.

E la Prezidan aktyel in koz *in terms of a campus* ki toultan depi dezannen nou pe koz annan en *campus*, annan en *proper university*. En landrwa kot ou kapab antre, konnen ou dan en liniversite.

I bezwen grandi. *This would be a fantastic opportunity* pou fer li grandi. A *Science and Innovation Hub* dan Liniversite Sesel. Met bann sinerzi ansanm olye travay dan *silo*. Ki zot ava dir nou, nou pa'n fer. Wi mon dakor. Me zot, zot ki ti annan *the blank sheet* la ki zot kapab ekri lo la. E olye fer li, zot al fer en *cut and paste*.

E dezyenmman. E ankore enn fwa Onorab Hoareau in tous lo la. Ler nou regard enn bann keksoz ki zot in entrodwi, e sa se *in terms of* finans. Kot zot pou kapab *raise* finans. La aköz mon pe rode Madanm Speaker mon pa pou war li, me *it's here*.

"Funds of the institute". Zot in azoute, *"moneys received by the Institute as a funding for their project development from any source whatsoever."* Ekselan. *Well done*. En bon inovasyon.

Me, eski zot krwar ki bann *research institutions* deor, oubyen bann biznes isi Sesel, *Seybrew, Takamaka*, eksetera, eksetera, ki dan prodiksyon.

Eski zot krwar ki i pa ti pou pli fasil pou donn finansman avek en lazans ki endepandan anba en *Board*, *instead of* avek en antite ki en lenstiti *by name but actually* i en brans Gouvernman ki asiz anba Prezidan e ki annan en *CEO at its head*? Oli sa lendepandans ki nou ti a kontan war e ki ti egziste avan anba Lalwa 2014?

Ki mannyer zot pou al rod sa bann fon ki zot menm zot, zot in met dan Lalwa, *unless* ki zot annan sa stati konpletman endepandan oubyen menm kazir endepandan ki zot napa la?

E si zot ti anvi sanze pou sorti anba lezel Gouvernman pour zot kapab *raise* sa bann *funds* parey mon antisipe ki zot pe fer aköz zot in met li dan Lalwa, aköz ki zot pa'n sanz son striktir konpletman e fer li reste konman en *agency* parey zot, zot in dir, en lazans ki ti a kapab fer sa?

Oubyen vin en parti Liniversite Sesel ki nou tou – e mwan mon en gran zanmi Liniversite Sesel. Mon'n *teach* Liniversite Sesel. Aköz ki nou pa'n kapab donn sa lot lenstitisyon sa sinerzi? E mon krwar mon konnen Madanm Speaker aköz. Aköz nou anvi al tro vit.

Nou'n anvi dir avek Lepep Seselwa, *dazzle* Lepep Seselwa avek lefet ki la, la

nou'n promet zot 50 keksoz. Nou pe fer li, dan 100 zour nou pe fer li.

Si nou ti'n pran en pe plis letan e nou ti'n annan sa deba avan olye apre ler zot in fini drafte zot Lalwa, mon plis ki sir ki zot ti pou *end up* avek en keksoz ki bokou, bokou meyer.

Nou pa kont. Nou'n fini dir nou pa kont. Nou kit sa Lalwa pou pase aköz zot annan mazorite. Me si nou ti'n pran letan e si nou ti annan en pe plis diskisyon, nou ti ava'n fer en *NISTI* ki bokou, bokou pli performan. E nou ti'n fer sa *NISTI* ki Onorab Claudette Louise ti anvi war ki a vin sa baton mazik pou boom, sel kou i pou fer tou keksoz arive.

Me malerezman, *we fell short*. E *we fell short* aköz *the process* pa ti *trust* nou, malgre ki nou, nou ti'n ganny demande pou *trust the process*.

Alor, avek sa detrwa mo Madanm Speaker, permet mwan retourn lo – aköz mon war pou napa *Committee Stage* taler. Les mwan dir ki mon dezapwente avek *Bills Committee*.

Mon dezapwente ki *Bill* i vin devan sa Lasanble kot nou, nou lezislater e ki sa ki'n drafte *Bill* pa'n kapab koriz fot. Sa ki'n siny *Bill* pa'n war sa bann fot. E sa ki'n etidye sa

Bill dan *Bills Committee* pa'n war sa bann fot.

Alor, me mon ava *raise* li la. Mon pa pou *move* en *amendment* aköz – nou konnen aköz. Sa se zot travay. Me dan “*Interpretation*” *section, definition* “*Standard Scale*”, zot in met en “s” an plis e zot in met li an pliriyel. “*Standards Scale*”. *It's not. It's* a “*Standard Scale*”.

Dezyenmman.

Dezyenmman parey mon ti dir, anba *clause* 5. “*The functions of the Institute shall be*” 5 (p) dernyen paragraf. “*the functions of the Institute shall to*”, e i swiv “*such other functions as may be prescribed*”. Obviously, i annan en fot la ki *Bills Committee* pa'n vwar.

E dan “7. (1) *The President, shall*”. Obviously *that's not correct*. E dan 7. (5) “*The Chief Executive Officer shall submit to the Minister reports in regards to*”. That's not English. With regard to or in respect of, wi. Me in regards to, no. Alor mon met sa devan zot pou dir ki nou ekspekte nou.

E la mon pe koz - mon pa pe koz pour mwan, me mon pe koz pour nou tou. E mon pe defann mon koleg *Leader* dan Lasanble Nasyonal. *LGB deserves*, aköz se li ki ansarz sa *Bill*. *She deserves better*.

She deserves ki *Bills*

Committee i fer son travay e ki sa *Bill* ki li i pou demann pou lir en Trwazyenm Fwa i ava *the best Bill* ki kapab vin devan nou ler nou vin devan Lasanble Nasyonal.

So *please Bills Committee*, fer zot travay. *You're being paid for it*. Fer zot travay e anmenn bann *Bill* isi devan ki nou lo *floor* Lasanble nou pa bezwen koriz bann pti fot lo otograf, me ki nou kapab *focus on the principles of the Bill* e debat lo la. Avek sa detrwa mo Madanm Speaker, mon remersye ou.

(APPLAUSE)

MADAM SPEAKER

Onorab Loze. Onorab Loze.

HON JOHAN LOZE

Mersi Madanm Speaker. Madanm Speaker, mon pou repran en sitasyon ki'n ganny fer.

E *since* nou pe sit Douglas Adams, alors mon ava konmans dir ki Douglas Adams ti ganny tit son liv an 1971 en zour swar apre ki detrwa zour i pa ti'n manze. In bwar en ta lalkol. In tonm sek dan en *field* pe get zetwal.

E ler i ti pe get zetwal i ti ganny son tit "*The Hitchhiker's Guide to the Galaxy*". Mon konn sa aköz mon konn tou son bann *quirks* son bann liv par ker vi ki mon osi mon lir

Douglas Adams, *to the point* ki in ekrir 5 liv ki i ti apel "*The Hitchhiker's Guide to the Galaxy: A Trilogy in Five Books*". Mon krwar en sel dimoun ki'n kapab fer sa.

Bon, an parlan sitasyon *Hitchhiker's Guide*, vi ki nou pe koz lo bann *alien* ki'n vin lo later. Be i annan en lot group *alien* dan *Hitchhiker's Guide*. Mon krwar zot apel bann *jatravartids*.

Be dapre Douglas Adams sa bann *aliens* zot, zot annan 50 lebra. Be natirelman si ou annan 50 lebra, ou annan 50 sa ki vin anba lebra. E dapre Douglas Adams sa i premye sivilizasyon dan liniver ki ti evant deodoran avan zot in envant larou.

So, *since* nou pe koz Douglas Adams ozordi *The Hitchhiker's Guide to the Galaxy*, alors *ya*. Sa en *quote* Douglas Adams.

Bill ki devan nou. *Bill* ki devan nou i la pou promot linovasyon teknolozi dan pei. Sirtou nou bann zenn Seselwa ki zot, zot posed nide e potansyel pou liber zot potansyel, pou permet zot vin devan e vin larsitek sa sosyete nimerik ki nou pei i bezwen.

Pou permet zot vin devan avek sa bann nide ki zot posed, konekte zot avek bann partener aletranze. Konekte zot avek bann Seselwa aletranze parey ti deza pe

ganny fer avan ki zot ti pran gran koute pou koupay *NISTI* avek. Pou konekte zot avek finansman. E i annan en kantite finansman pou teknolozi dan sa monn.

Sa *Bill* ki devan nou i en semen pou liber potansyel nou bann zenn Seselwa. Nou kapab asize, *dot the i's*, tir fot, montre ledwa.

Be Onorab Georges, i annan enn ou Manm in dir *patency* dan plas *patents* taler, ou pa'n tande? *Patents* se teknolozi ki ou anrezistre. Ou anrezistre ou patant.

Be *patency* se lavenn ki'n debloke. Ou pa'n tande sa fot? La Onorab Hoareau pe get mwan li ki'n dir lo size *patency*. Mon konn tre byen aköz mon'n soufer avek lavenn bloke.

So, nou pou pas la anndan nou pou tir fot. Nou pou rod isi. Nou pou rod laba. *Texto*. Selman lavenn bloke i o bor nou. Be deblok en pe lavenn laba kot ou!

Madanm Speaker, en zouti travay in ganny mete devan Lasanble e son fonksyon i viz ver lazenes Seselwa.

Sa menm lazenes Seselwa ki ler i apros bann lenstitisyon pei ki gouvènn bann diferan fonksyon sosyeter, i ganny bloke, i ganny dir non ou pa pou kapab avans devan aköz nou,

nou annan nou group dalon anba nou Gouvènnman ki li in fini ganny plase pour li benefisye avek bann retonbe dan pei.

Sa *Bill* ki devan nou la, i pe kree posibilite pour sa bann zenn Seselwa la ki ekrir zot *app*, ki desifre zot *software* pour zot nobou avans devan e ganny akse avek benefis dan zot sosyete.

E si i reisi fer sa. Si i reisi pour li fer sa, *what does it matter* si *clause 14* i *texto* avek *clause 14*, 2014. Ki bor ki'n ekrir poudir si nou pe retourn ek menm *Bill* pou fer menm fonksyon, i pa kapab menm *Bill*? Lekel ki'n dir sa?

Lekel sa Bondye *drafting* ki annan Sesel, sa Konstitisyon *drafting* ki dir fodre nou *bend over* e ador sa ki serten dimoun i dir nou fer dan sa pei? Be nou'n fini adore sa ki Seselwa in dir nou fer dan eleksyon. Ladorasyon in ganny fer. Nou pa pe vin ador sa ki zot dir nou ankor.

Parske ou konnen ki zot ti dir nou zot? Ler mon get dan montanny, mon war Dolar partou anler dan montanny! Dolar ti kannel. Ler Minis ti vin la devan, kestyonn li lo kannel, i reponn lo sa ki mous i fer la. Ki mannyer i apele? Vomi mous la? I reponn nou lo dimyel avek lavanniy La Digue.

Be sete sa linovasyon ek teknolozi anba zot Gouvernman. Kot zot ti pran pli zenn Minis lo nou *Cabinet*. En Minis ki mwan mon ti annan bokou *enthusiasm* ler i ti vini. Mon ti lev lanmen ek lenerzi pou aprouv son kandidatur.

Zot pran pli zenn Minis lo nou *Cabinet*, zot fer li vin devan. Retourn ek teknolozi ek lendistri mon vye granmanman. Be ou pa war nou problem pa ti ekonomik nou? Nou problem pa ti teknolozi?

Pli zenn Minis lo zot *Cabinet* i vin promouvwar teknolozi e lendistri mon vye granmanman. Kannel, lavanniy, kopra. Be non. Non, non, non, non, non, non, non, non, non. Non.

Mwan mon krwar zot ek teknolozi *ma* granmer, zot kapab *take a rest. Relax. Chill*. Asize laba kot Seselwa in met zot asize. *Take a rest* pour 5 minit, refer zot. Refer zot en pe. Refrwadir zot tansyon. Dizer sa ki'n pase dan eleksyon, apre nou a koze.

Apre nou a koz lo diferans patant avek lavenn bloke. Nou a koz pli tar. Pour lemoman la, dizer sa ki'n arive avek zot, asim sa ki'n arive avek zot. Akoz si zot anvi travay en lot travay, nou kapab travay byen ansanm nou. Be selman sa bann pti

lalert la, i pa pou marse. I pa pou marse. Mersi Madanm Speaker.

(APPLAUSE)

MADAM SPEAKER

Onorab Woodcock.

HON WAVEL WOODCOCK

Mersi Madanm Speaker. Madanm Speaker, lo konmansman lentervansyon Vis-Prezidan, in fer en lapel. E a plis ki 2 – mon krwar sa i trwazyenm fwa kot in fer en tel lapel pour nou travay ansanm, vin ansanm lo bann topik ki enportan pour nou pei.

Me i malere Madanm Speaker, apre ki Vis-Prezidan i fer en tel lapel, en Manm i vini, i fer en *statement*. Mon krwar in apel nou *alien*, apre in fer teat lo plizyer Minis ki ti annan dan nou *Cabinet* ki ti responsab Lendistri ek Lantreprenarya.

Lendistri i pa dil avek zis inovasyon ek teknolozi. Lendistri i dil avek bann resours ki'n egziste depi menm avan nou'n ne *for ages and ages*. Lagrikiltir, lapes ek lezot keksoz ankor. *Obviously* teknolozi i ed nou avans en pti pe pli devan.

Mwan sa ki mon ti a kontan. Mon senserman anvi travay dan en fason pou osi ede pour nou bouz keksoz pli devan. Me i sagrinan ki menm

a plizyer repriz, menm dan son larepons son *right of reply* parfwa, menm VP menm in – apre ki in demann nou pour nou travay ek li pou ed zot siport zot, li osi parfwa in atak nou.

Ou konnen, sa ki sagrin mwan plis se ou konnen, Lepep Seselwa, toultan mon dir. Yes, zot in ganny 34mil ekek *vote*. Nou nou'n ganny nou 38mil800 *vote* dan dernyen eleksyon. Kantite nou in perdi nou syez. I annan ki'n retournen. I annan ki pa'n retournen lo tou lede kote. Dan lepase, e la prezan.

Me selman sa ki enportan se ki nou bezwen rekonnet poudir nenport ki ladministrasyon ki vini ozordi, demen, apredmen, i annan bokou keksoz ki zot in fer ki byen. Mon pa kapab dir tou keksoz ki zot in fer i mal.

Me lenpresyon ki ler mon'n ekout bann entervenman avan mwan ler zot in koze, zot in donn lenpresyon – menm Onorab Loze ki'n fek koz apre mwan, ki i napa naryen ki'n arive kot i konsern *technology*. Kot i konsern bann *digital platform*. Kot i konsern *e-service* dan nou pei, ki i fo.

I annan en kantite ki'n arive. Petet nou ti kapab fer pli byen. Me pou vini pou dir, napa naryen. Napa naryen. Nou'n retourn dan lendistri nou gran pye.

Kan nou war klerman si ou pe get Sesel sa evolisyon teknolozi dan nou pei Sesel, ou pou war i annan en kantite keksoz ki'n arive kot i konsern transformasyon bann *digital platform* dan nou pei. E ler ou pe dir naryen pa'n arive, e ou pe osi ensilte bann profesyonnel dan plizyer seksyon, departman dan Minister, parey *DICT*.

E dan 6enm Lasanble, nou Lasanble, MYSCC nou Komite ki ti annan Manm lo tou lede kote latap, nou'n fer plizyer vizit, plizyer Minister. Nou'n al menm fer en vizit kot *DICT* e nou ti vreman enpresyonnen avek travay ki'n arive kot i konsern transformasyon bann *digital platform* dan nou pei Sesel.

Annefe, pandan letan *COVID*, i en keksoz ki nou le akseler sa transformasyon *digital* dan nou pei Sesel. So *many platforms* in ganny kree. So *many apps*. So *many services* ozordi in bouz *online* aköz bann defayans ki nou pei in fer fas avek. In fors nou pour nou evolye.

Eski nou ti kapab pli lwen? Wi. Nou'n fer en bout la. I prerogativ sa nouvo Gouvernman pour li fer son bout pou kontinyen anmenn nou pei pli byen kot i konsern devlopman bann *digital platform* dan nou pei Sesel.

Pour nou zis tap kalot e dir pandan sa 5an *it doesn't matter*. Polisi diferan Gouvernman i sanze. Gouvernman Vis-Prezidan Mr Herminie i pe baz son travay lo son manifesto. Ler nou ti la nou ti baz nou travay lo en manifesto.

I annan keksoz ki nou pa'n agree lafason ki'n fer. Nou'n aranz li dan en fason ki nou krwar i pou pli meyer. E zot petet zot krwar poudir lafason ki nou pe fer keksoz ozordi i pa le meyer fason. Zot anvì vin fer li dan en lot fason. Sa i zot prerogativ.

Me selman fodre pa zanmen bliye poudir lo nivo enternasyonal, Sesel in ganny rekonnet pour sa devlopman, sa transformasyon lo kot i konsern bann *e-services* dan nou pei.

Dapre *2024 ITU report*, Sesel ti *rank* 3enm Lafrik dapre *ITU report*. Menm dapre rapor *UN*, Sesel i parmi bann *top* pei. *Top* pei lo Kontinan Lafrik kot i konsern *e-government development* kot i konsern *digital public services*.

E ler nou rekonnet sa, nou pe osi rekonnet travay nou bann teknisyen ki'n fer pou anmenn nou pei kot nou ete ozordi. E sa bann teknisyen i travay dan sa administrasyon ki ti la, e zot pe kontinyen travay dan sa administrasyon ki la ozordi.

Ler *NISTI* i ganny *set up* zot pou bezwen servi sa bann *government platform* ki deza an egzistan. Travay pou bezwen kontinyen.

Letan *COVID* nou'n vwar transformasyon a plizyer laspe. Dan ledikasyon nou'n war. Ler nou bann marmay ti pe asize se zot, Minister Ledikasyon atraver bann zenn, bann diferan partener zot in devlop en kantite bann *app*.

Bann *services online* kot nou zanfàn ki pa ti pe al lekòl zot ti kapab enterakte avek zot bann ansennyan kot zot ti pe ganny zot – laprantisaz ti'n kontinyen. Nou ti war en *innovation* dan lafason ki ledikasyon in devlope dan nou pei Sesel. Nou'n war *online teaching* in vin en keksoz pli *prevalent* ozordi.

Fodre pa zanmen bliye poudir pandan nou administrasyon i annan en Manm Onorab – i annan en Manm Onorab ki ti anmenn entervansyon dan nou Lasanble. *Sorry*, eskiz mwan, en Mosyon dan nou Lasanble Nasyonal.

Sa ti an Zilyet 2023 kot sa Mosyon ti ganny anmennen par Onorab Henrie, kot i ti pe demande pour nou met an plas en *mechanism* pour tou bann – pour *public sector*, Gouvernman e bann servis

parastatal pou *go cashless by 1st January 2025*.

Nou pa'n arive pou *achieve* sa konpletman, be nou'n nobou kapab fer li dan plizyer lenstans. Parey *SGPA* in adopte sa kot i konsern *digital payment* dan bann diferan park maren kot konmela i *digital*. E zot in fer – zot in double lakantite larzan ki zot in kolekte.

E ozordi 15milyon, *SPTC* osi parey. Nou'n war ozordi ki ou nepli pey ek *cash*. Ou servi ou kart. I en keksoz ki pe marse. E bokou fwa –

E ler sa bann keksoz – ler sa Mosyon ti vin devan Lasanble, ti annan konsern ki ti ganny leve regardan sa Mosyon. Ti annan bann Manm lo kote *US* ki ti annan en pe rezervasyon lo sa Mosyon ler sa Mosyon ti vini.

Onorab Aglae in dir koumsa boner dan son lentervansyon, fodre met resours. Pa met en valer lo teknolozi.

Me ler mon mazine. Mon'n al gete *reporting* e *verbatim* ler sa Mosyon ti ganny anmennen, i annan bann Manm lo lot kote latab ki ti la. I annan ki Minis ozordi. Zot ti dir ki sa pa en priyorite pour nou *go cashless*. I annan keksoz pli enportan ki sa. Selman la, zot pe dir napa en valer lo teknolozi. Fodre plis resours.

Plizyer komanter ti ganny pase. Onorab Aglae ti - mon rapel, Onorab Cosgrow ti osi dir poudir sa i en keksoz tro anbisye pour nou *endeavour* ladan. Onorab Aglae ti dir koumsa e i ti kont.

Mon rapel sa letan i pa ti an faver sa zafer kart *SPTC to completely go cashless*. E i ti menm annan serten *issue* avek *Travizory* sa letan.

So ti annan bokou bann konplent. E Onorab Loze menm ti koze e i ti demann en kestyon vreman enportan, konbyen i pou kout pei pou fer sa? *A cashless government*.

Me ozordi, eski nou pe demann sa bann kestyon? Ler nou ti apwent 13 Minis zot ti pe demande, zot ti pe kestyonnen ankor i pou kout bokou larzan. Be la ozordi zot vini zot apwent 14 Minis. Konmsi konpran mwan sa bann lakizasyon. Ou konpran?

Zot apwent plis *SS*. Zot apwent plis keksoz. Zot reouver bann lazans ki nou ti'n fermen. Eski zot pe demande sa bann kestyon, konbyen i pou kout Gouvernman? *Ok. NISTI*, konbyen i pou kout Gouvernman pou *reinstate NISTI*? *Ok*.

E kestyon ki ou bezwen demande. Eski *NISTI* pou fer pli mye ki i ti pe fer oparavan, aköz ti annan – nou bezwen

admet, ti annan bann defayans? E eski *NISTI* prezan i pou fer pli byen ki ti fer oparavan? Ou konpran?

Ozordi dan nou pei Sesel nou'n war en evolisyon. Nou'n war en kantite keksoz ki nou Gouvernman in pouse pou met an plas.

Mon rapel zisteman en keksoz ki malerezman zot in servi pou fer politik avek *e-Border Management System*. Ozordi nou servi *biometric passport*. Nou annan sistenm *Travizory* ki nou servi. Eski zot mazine ki zot ti dir?

Avan eleksyon, *in fact* resaman i annan en *interview* ki'n donner, mon krwar Mr Prezidan Herminie kot in dir koumsa poudir; ah konmela ou pa bezwen demann permisyon pou vin Sesel.

Non, be sa depi menm avan eleksyon ou pa bezwen demann permisyon pou vin Sesel. Lontan nou'n sanze. Lontan nou'n tir sa 5 *Euro*. 5 *Euro* ki nou ti bezwen peye.

En pe letan konmela, i menm annan en *desk* lo erport, menm avan, byen avan eleksyon kot si – lontan si ou pa ti anpli *online* ou form *online Travizory*, ou pa ti annan drwa anbarke.

Konmela, *for* en pe letan pe ale la, ler ou ariv erport si ou pa'n anpli ou form, ou anbarke *still*. Ler ou ariv erport i annan en *desk* i annan en

zenn en msye ek en madanm ennler i la pou asiste bann dimoun ki pa'n ganny sans ranpli zot form *online*.

Me selman, sa teknolozi ki nou annan nou *border control* ozordi i enn pli avanse dan lemonn. I en teknolozi ki bokou pe lafet pe *emulate* ozordi. E i annan bann pei partou dan lemonn ki pe adopte sa ki Sesel in fer.

Akoz ozordi ler ou debarke i sitan vitman. Avan en dimoun i debarke nou'n fini konnen lekel sa dimoun. Konman i antre son portre i ganny tire. Sa lake nepli parey lontan, ou bezwen esper sepa konbyen letan. Keksoz i *flow*. Keksoz i vitman e i ed nou dan nou *border security*.

Eski sa pa en lavansman teknolozi ki'n arive anba ladministrasyon? Ti annan bann konversasyon ki ti'n konmanse anba ladministrasyon avan. Nou'n kontinyen lo la. Nou'n travay. Nou'n anmenn nouvo keksoz.

E probableman sa Gouvernman osi ki la i annan keksoz ki nou'n travay ki nou'n konmanse ki zot pou konplete. I annan proze ki nou'n konmans nou pou koup riban. Zis parey ler nou ti vini, nou ti koup riban serten zot proze. Gouvernman Sesel i reste Gouvernman Sesel. Ladministrasyon i sanze. Fodre nou pa bliy sa.

Vre, ozordi zot pe kraz nou. Ozordi zot pe ensilte nou. Me sa lakord ki anmar – ki mannyer? Ki anmar bef nwar. Ou konnen. Ki anmar bef rouz. I anmar bef nwar li osi. Ozordi - demen zot kapab war zot, zot tourn ankor dan Lopozisyon.

Eski nou pou *go back and forth* pour nou ensilte, maltret kanmarad a plizyer repriz, kan enn bann *Bill* sitan enportan i vin devan nou?

Arh, arh. Akoz mwan mon ti fer sa avek ou. La mwan ki la o pouvwat, mon pou rann ou laparey. Mon pou fwet ou ek menm roten.

Selman, ler *VP* i vin devan Lasanble Nasyonal i dir nou koumsa annou travay ansanm, annou ed kanmarad. Annou siport kanmarad. Apre en Manm i vini i apel nou en *alien* 50 lebra. En.

I vini i ensilte nou. I *quote* en zafer dan en liv. I ensilte nou. I ensilte nou Minis. I ensilte nou bann *forefathers* ki'n travay dan bann lendistri ki ozordi ek teknolozi nou kapab ede dan evolisyon sa bann keksoz. I ankor egziste dan nou pei Sesel e nou bezwen.

Nou pa kapab akòz bann keksoz ozordi nou gran pye ti servi serten resous dan lepase ti fer serten pratik, ki ozordi nou bezwen arete. Non. Nou bezwen evolye konman en pei. Nou bezwen evolye

konman en nasyon. Nou pa kapab met tou resous dir met laba akòz sa ti enn bann keksoz lepase.

Ozordi *DICT*. *DICT* mon krwar fot ki nou administrasyon in fer mon pou bezwen admet, nou pa'n *market* ase e eksplik ase bann servis ozordi ki Gouvènmman in met an plas. E i annan en kantite ozordi. Bann *service digital* ozordi i enkrwayab ki ozordi in ganny met an plas dan nou pei.

Ozordi bann aplikasyon i sitan bokou. Bann *digital platform* ki'n ganny met an plas pandan sa dernyen 5an. Ozordi nou annan *CID*. Malerezman en kantite Seselwa pa konnen.

Digital ID. *Wallet digital private license*. *Secure login* kot ou kapab ganny akse avek nenport ki – antre dan bann *government portal* e ganny akse avek plizyer bann diferan servis Gouvènmman. Parey mon servis. Mon servis en lot *platform* ki nou kapab servi ozordi. Kot ou akse parey mon'n dir, bann diferan servis Gouvènmman.

Nou annan *E-Service Gateway*. *Tax and business registration online*. *Land and housing application* ou kapab fer *online*. *Passport application* ou kapab fer *online*. *Electoral Commission* *District Verification*. Ou anvoy en *text*,

deswit i dir ou si ou'n anrezistre ouswa ou pa'n anrezistre.

So en kantite keksoz ki'n ganny fer. Nou annan CCBISS kot i konsern *Children Care Benefit Information System*. E plizyer bann lezot *tools* ki nou servi. Enkli *AI* e ozordi in antre dan nou popilasyon. Nou pe servi.

Parey mon'n dir e mon toultan dir, i kler – si Lepep Seselwa la deor pe ekout Lasanble. Ler ou pe ekout bann Manm fer lentervansyon, i annan en kantite Manm son lentervansyon i *ChatGPT*.

I kler! I kler. I pa bann – e sa i annan en danze avek sa. I fer ou pa servi ou lespri. Pa analize. Pa fer resers. Ou war? Ou perdi ou otansite akòz ou pe zis met en lenformasyon. *Arh*, kas sa *Bill* an senk pour mwan lir konman entervansyon dan Lasanble. Sa i pe arive.

Lepep Seselwa ekout byen bann entervansyon ki pe ganny fer dan Lasanble Nasyonal, ou pou war poudir i annan en kantite entervansyon ki pe ganny fer ki baze lo *AI*.

E sa Gouvernman in dir zot pe al fer en *AI government*. E fodre nou al pli lwen ki en *AI* Manm Lasanble Nasyonal. Nou bezwen vin en Manm Lasanble Nasyonal osi ki servi

nou *Grey Matter*, nou lespri e nou lentelizans.

So i enportan mon bann frer ek ser koman en Lasanble Nasyonal, ler bann size enportan i vin devan nou, annou annan en konversasyon. Annou diskite. Annou koze. Si i bon nou siporte. Si i pa bon –

Mon'n demann *VP* kestyon la, konbyen i pou kout Gouvernman? Eski zot pou fer pli byen? Si i kapab donn nou en garanti i pou fer pli byen ki nou nou'n fer, *then* nou ava siporte.

Li menm i dir, oli ou deba? Annou fer deba. Annou koze. Annou koze mon bann frer ek ser. Pa zis vin ensilte, maltret kanmarad, kan bann topik sitan enportan i devan nou Lasanble. Avek sa 2 mo mon dir ou mersi Madanm Speaker.

(APPLAUSE)

MADAM SPEAKER

Mersi. Nou ava pran 2 dernyen entervenan. Onorab Grandcourt apre Onorab Lemiel.

HON ALVIN GRANDCOURT

Mersi Madanm Speaker. Bonn apre midi Vis-Prezidan ek ou *panel*. Tou Manm Onorab e tou dimoun ki a lekout.

Ozordi apre midi i vreman enteresan. Mwan

premye fwa mon'n war perdan pe sey dir ganyan ki mannier i pou fer. Sa i en keksoz ki enkrwayab.

Mon annan en zanmi La Digue Hensley Constance. Mon krwar en bon pe i konn zot. Plizyer fwa in dir mwan sa parol. Selman ozordi mon war son relevans. Lipokrizi osi enkrwayab. Nou pa vin fer politik. Eksetera, eksetera. Selman apre nou vire nou fer menm keksoz ki nou dir nou pa pe fer.

Ler mon ekout serten entervenans, parfwa i fer mon krwar poudir avan sa dernyen ladministrasyon, Sesel ti dan en fernwar. Ti napa naryen. Ti napa inovasyon. Ti napa okenn devlopman.

Konmsi ler mon ekoute, i sagrinan. I sagrinan ki i ankor annan serten endividi Sesel ki zot krwar – senserman krwar ki Seselwa pa war kler. Zot sitan pa konekte ek sa pep. Ok. I enkrwayab. Mon ti a voudre annandler ki nou ti a kapab aksepte. Ou konpran?

Akoz dezapwentman la. Dezapwentman i en keksoz ki difisil pour en imen kapab annandler anvale. Ou konpran mwan? 397. E apre sa ki nou deside *humble* nou lekor e sanz nou konotasyon lavwa dan sa Lasanble.

(APPLAUSE)

HON ALVIN GRANDCOURT

397 *vote* ti pran pour ou kapab konpran sa! Enkrwayab. Mon kontan mon'n kapab fer en fav ek en diferans. Vreman en loportinite i prezant son lekor.

Be loportinite lontan ti la. Loportinite ti la! En pouvwar absoli. En Lasanble avek lamazorite. Ki zot ti fer? Naryen. Zot ti rap nou! En. Sa ti *ok* sa.

La ozordi zot asiz lo sa kote latab laba, en. La ki zot krwar zot pou vin dir nou mannier nou, nou pou fer! Be senserman. Annandler ou le reste trankil dan sa Lasanble, me manrten ourten leren. En.

Mon pa kapab krwar. Annandler mon le krwar. Me selman en laverite enkrwayab. En. Pa vin fer politik. En. *Texto, texto*. Be pa sa ki la lo sa latab. Sa ki lo sa latab la ozordi se en Lalwa ki pou benefisye pep Seselwa. *Ok*.

En keksoz ki depi lontan ti'n ganny fer. Ti'n merit ganny fer. La aprezan a vin dir nou poudir ti pou fer, pa ti pou fer. Ti annan isi, ti annan laba. Eksetera, eksetera.

Me non. En fwa pour tou, in ler pou konpran. Nou pa vin fer politik. *Fair enough*. Tou dimoun la anndan i politisyen. Me selman pa vin fer krwar poudir nou pe donn respe, kan nou pe zis rod *mileage*. Seselwa pa pou bliye. Seselwa pa pou zanmen bliye.

Sa dernyen letan zot in pran zot en desizyon. Alors in ler pour tou dimoun aksepte *the decision, get on with business* e fer avanse sa pei.

Si zot enterese pou fer Sesel avanse, nou travay ansanm, nou pa vin fer sa bann kalite demagozi. Sa i enportan.

Ki mannyer zot anvi sa pep Seselwa i mazin sa 8enm Lasanble? *Ok*. Ki mannyer *going forward* nou le war sa pei avanse? Eski nou le war li avanse? Oubyen nou le fer krwar nou'n re war li avanse, me selman nou kontinyen *abstain*, nou kontinyen pa siporte. E nou kontinyen fer krwar ti annan se isi, ti annan se la, eksetera.

Mwan mon krwar enn fwa pour tou, *we put an end to it*. Nou travay parey nou devret travay *and then* nou kapab war rezilta. *Ok*.

Sa *Bill* ki devan nou plizyer entervenans in koz lo la e mon pa pou gat letan Lasanble avek plis ki sa lo la. Mwan mon santi poudir *it comes at the right time*. I en moman apropiye pour nou envestir dan lavenir teknolozi nou pei.

Depans pour touzour annan depans. Me selman fodre nou kalkil li avek rekonpans. Sa *Bill* i annan en kantite rekonpans. I pou ed Sesel avans devan. *It will*

create us and make us become a hub dan teknolozi.

Si Moris in ganny fer depi sepa 30an pase e nou'n vini nou'n war poudir ti annan. Akoz 4an pase pa ti'n ganny fer? *Ok*.

Alors *this is the opportunity* pour nou bouz devan, pour nou develop sa lendistri, pour nou a lavenir vin en nasyon ki osi kapab debout o bor bann pli gro nasyon kot teknolozi i konsernen.

Alors mwan mon siport sa *Bill* e mon demann tou dimoun pou osi fer parey e siport sa *Bill* akoz se lavenir nou pei ki nou pe mazin lo la. *Ok*. Mersi Madanm Speaker.

(APPLAUSE)

MADAM SPEAKER

Onorab Lemiel.

HON SYLVANNE LEMIEL

Madanm Speaker. Manm Onorab. Vis-Prezidan avek ou delegasyon. Tou dimoun a lekout, bonn apre midi.

Madanm Speaker, ozordi apre midi nou pe diskit en propozisyon Lalwa ki pe rod etablisman oubyen pe rode pou etabli lenstiti nasyonal lasyans, teknolozi e inovasyon koman en lorganizasyon nasyonal pou donn direksyon, kordinasyon ek gidans dan

domenn lasyans, teknolozi ek inovasyon isi Sesel.

Lenstiti pou servi konman en *platform* santral pou ankouraz resers, kordin bann program, resers nasyonal e ranforsi korperasyon ant syantis, reserser, inovater, lenstitisyon ledikasyonnel oubyen lenstitisyon ledikasyon, lendistri ek Gouvernman.

I pou osi soutenir devlopman konsey syantifik pour bann ki fer Polisi pou kapab fer zot vin avek bann pli bon desizyon, promot e ankouraz inovasyon dan ledikasyon ek lendistri.

E ankouraz adopsyon nouvo teknolozi ki pe sorti oubyen bann *emerging technologies*. Enkli lentelizans artifisyel. E sa ki nou dir petet bann *digital tools*. Oubyen petet nou ava apel li bann zouti nimerik.

Madanm Speaker, ozordi resers inovasyon ek bann linisyativ teknolozi i egziste dan diferan lenstitisyon ek sekter. Be souvandfwa, *operate* an izolasyon nou kapab dir, avek kanmarad.

Sa ki sa Lalwa oubyen sa propozisyon Lalwa pe demande la, se pa pou ranplas bann zefor. Me pou anmenn en koerans oubyen en larmonizasyon, kordinasyon e en direksyon stratezik.

I pou etabli en lenstiti ki pou gid bann priyorite nasyonal, soutenir kolaborasyon e asire ki lasyans ek inovasyon i anmenn kontribisyon vital e ki nou kapab dir *meaningful* pour devlopman pei.

Madanm Speaker, i enportan pou note ki sa propozisyon Lalwa i adopte en lapros ki byen mezire e realizab. I pa pe rod fer lenstiti vin en antite komersyal oubyen en devloper inovasyon a sa staz.

Olye sa, i pe konsantre lo kordinasyon, Polisi *leadership*, re anforsi kapasite ek sipervizyon stratezik. Sa i reflekte kapasite aktyel pei e asire ki rol lenstiti i kler, byen definir e fasil pou zere depi komansman.

Propozisyon Lalwa pe osi met an plas mezir administratif e finansyel apropiye. I fer provizyon pour *professional management*, *public accountability* atraver bann kont ki pou ganny odite e raport avek nou Lasanble Nasyonal parey seksyon 12 (4) i edike.

Sa i pou asire ki resours piblik ki ganny *allocate* pour lasyans, teknolozi ek inovasyon i ganny zere dan en fason responsab e transparan.

Madanm Speaker, lenportans sa propozisyon Lalwa pe prepar nou pour

lavenir. Lasyans ek teknolozi nepli en zouti opsyonnel dan devlopman. Zot tre enportan e pivotal pour rezilyans ekonomik, konpetitivite ek progre sosyal.

Pour en pti Pei Leta Zil parey nou isi Sesel, inovasyon, konesans ek konpetans i parmi nou bann pli gran larises. Par etablisman sa lenstiti, nou pe asire ki nou lapros ver lasyans ek inovasyon i byen kordinen, pe get ver lavenir e anliny avek bann priyorite nasyonal.

Nou pe kree bann kondisyon pou fer Polisi baze lo levidans pou fer linovasyon fleri e pour nou pep. Espesyalman nou bann zenn. E osi vwar lasyans ek teknolozi koman moter pour loportinite e progre nasyonal.

Sa propozisyon Lalwa alors i pa konsern kompleksite oubyen ekspansyon zis pour nou dir nou pe fer li. I konsern striktir, vizyon e responsabilite. I etabli en fondasyon enstitisyonnel solid lo ki bann fitir desizyon, swa Polisi i kapab ganny batir kan e ler pei i pare.

Madanm Speaker, alors, mon pou demann tou mon bann koleg Manm Onorab pour zot aport zot sipor a sa *Bill* ki nou pe diskite ozordi. Mersi.

(APPLAUSE)

MADAM SPEAKER

Mersi. Nou ava aprezan pran en *break* ziska 4er edmi. Letan nou retournen, Minis ava fer son *summing up*.

(BREAK)

MADAM SPEAKER

Bon. Mon ava demann Vis-Prezidan pou fer son *right of reply*.

**VICE-PRESIDENT
SEBASTIEN PILLAY**

Mersi Madanm Speaker. Ankor enn fwa bonswar tou dimoun. Bonswar *Leader* Lopoziyon, *Leader* Zafer Gouvernman, e tou Manm Onorab, e tou dimoun ki a lekout pe swiv deba lo sa Prozedlwa. Madanm Speaker in annan en deba lo sa Prozedlwa a zis rol Lasanble Nasyonal e bann Manm eksprim zot lekor dan diferan fason.

E bann Manm in eksprim zot bann swa sipor ouswa rezervasyon ouswa konsern lo bann provizyon sa Lalwa. E mon pou remersi tou bann Manm ki'n entervenir lo sa Prozedlwa, aköz mon krwar i enportan ki koman en Lasanble zot kontinyen partisipe dan bann dan deba ki pe pase lo bann size ki vin devan Lasanble Nasyonal.

E byensir pa tou keksoz ki nou tou nou pou tonm dakor lo la. Me apre ki nou'n fer tou keksoz i pou bezwen annan en desizyon ki pou ganny pran pou nou kapab *move on*. Apre tou Lepep Seselwa pe egzize ki nou koman en Gouvernman ki zot form par koman enn bann brans sa Gouvernman ki keksoz i marse dan nou pei.

Avek sa Madanm Speaker, ou ava permet mwan pou pas en pti pe lo bann diferan lentervansyon ki'n ganny fer. E bann diferan keksoz ki'n ganny dir par bann Manm. E serten kestyon ki'n ganny souleve par bann Manm lo zot bann konsern ki zot annan. E mon a sey mon mye pou reponn sa bann kestyon.

Serten Manm ki'n *raise* serten kestyon politik, mon pa oule dezapwent zot. Mon pou prefere pou ap reponn zot bann kestyon plito politik, aköz mon pa krwar poudir sa i danze sa *Bill*. Sa Prozedlwa i vize ver kreasyon en lenstiti ki dan langaz paran si nou kapab osi apel li en lazans.

E ki son rol in ganny definir anba sa Prozedlwa. Alors, mon ava reste *focus* lo bann sizesyon oubyen bann konsern ki zot annan. Premyerman Madanm Speaker, Onorab Claudette Louise Manm Elekte pou Distrik Plaisance mersi pou ou

lentervansyon. E ou'n koz lo sa rol ki sa lasyans, sa *Science and Technology Hub* pou annan. E an kolaborasyon avek lezot pei.

Mon krwar Onorab enn bann keksoz ki nou oule travay lo la, ler nou regard sa ki'n arive. E byensir nou tou nou bezwen admet ki pou annan bann bon keksoz ki'n ganny fer dan lepase. Me pou osi annan bann keksoz ki pa neseserman bon. Me toultan ler nou regard keksoz dan en fason ki bon oubyen pa bon i toultan depan lo perspektiv e kote ou pe debout.

Sa ki nou kapab dir se ki *going forward*, sa ki nou bezwen fer se ki nou bezwen rod sa partenarya e sa korperasyon. Aköz? I deza egziste bann lezot lenstiti Nasyonal pou lasyans ek teknolozi dan lemonn. E souvandfwa dan serten ka i pou annan bann ki sitye dan bann pei kot zot annan bokou plis resours.

E zot kapab ede dan sa konteks pou ed nou osi si oule ranforsi nou kad legal e osi nou kad striktirel ki nou annan o tour lenstiti ki nou pe kree Sesel. Alors, ou sizesyon dan sa konteks i enn ki enportan. E byensir i enn ki nou pou sey fer nou mye pou nou enkorpore anba sa Lalwa.

Onorab John Hoareau, ou'n koz lo size *Research and*

Development R and D. E ou'n osi koz lo rol ki *NISTI* in bezwen zwe oubyen pa'n zwe dan lefase. Sa ki mon kapab fer Onorab, se mon kapab toultan a tou moman vir en pas *and then* koz lo sa ki'n arive. Me si nou reste fokalize lo sa ki'n arive, mon pa pou bouz devan.

Alors, sa ki mon kapab dir ou Onorab, se ki annou regard li dan sa konteks. Koman en ansyen ansennyan mon krwar ou ava apresye lefe ki toultan ler ou nivo teknolozi i vini, nouvo fason fer i vini ou adapte e ou bouze pou ou kapab servi sa nouvo fason fer dan en fason pozitiv pou li anmenn en lenpak pozitiv lo lasosyete.

I pou toultan annan *research and development* across tou sekter. E i normal pou ki i annan bann lantrepriz oubyen bann lendistri ki envestir dan *research and development*.

Nou'n vwar sa bokou dan lezot pei, malgre ki Sesel pou nou volim e konteks ki nou ladan pa permet nou pou fer li dan lo sa oter.

I annan bann konpannyen lokal ki envestir ladan. E i annan bann lakonpannyen lokal ki fer prodiksyon *manufacturing* ki nou konnen i envestir ladan aköz sa i form parti zot *improvement of zot product*

base ki then zot pou vann avek piblik.

Byensir i pou bezwen annan en kolaborasyon ant sa lazans, ant sa bann lenstitisyon oubyen lorganizasyon oubyen lendistri.

I fer sans pou annan sa, aköz si ou pa servi bann keksoz ki *available* avek ou, *then* ou pe les en resours ki kapab potansyel man ed ou akonplir plis ale, dan plas servi li dan en fason ki kapab perform e fer marse bann keksoz ki ou met an plas pli byen.

Lo sa pwen *certification and standardization*, mon konpran pou largiman e petet ou ti a'n kapab sitye ou largiman plito lo rol ki nou Biro Nasyonal Standar i bezwen zwe.

Parey ou konnen tou prodwir i bezwen *meet* en serten standar. Me i pa neseserman rol en lazans pou teknolozi pou li dil avek standar, me plito rol nou Biro Standar.

E sa ki nou pe vwar se ki nou pe vwar poudir malgre pete nou ava krwar en lot fason, nou Biro Standar i Biro Standar ki'n fer bokou travay. E si pandan tou sa lannen nou'n vwar poudir i annan plizyer prodwir lokal ki'n pas standar e in ariv lo marse, i

akoz nou annan en striktir an plas.

E sa striktir pe marse, sa striktir i la pandan bokou lannen. E toultan nou bezwen rod fason pou amelyor bann striktir ki la. Enn bann *areas* ki nou toultan pe fokaliz lo la byensir i konsern nou bann *mainstay* dan nou lendistri, par egzanp dan lendistri lapas e leksportasyon pwason.

Me parey ou'n dir i annan lezot keksoz ki kapab vini. Me toultan sa ki enportan pou Sesel. E la petet nou pe divers en pti gin. Se ki nou annan sa baz prodiksyon pou nou kapab fer leksportasyon lo sa nivo ki anmenn nou pou al *reach* bann marse aletranze? Byensir anba *IOT* i annan posibilite.

I annan lezot ki nou fer, me i pa lo sa gran lesel parey nou ti a voudre vwar. Alors, eski i model pou Sesel? Se vin en model *manufacturing* oubyen en model pou Sesel, se vin en model inovasyon.

E se sa ki nou bezwen balanse dan lafason ki nou regard keksoz, aköz si nou krwar poudir nou kapab vin en model pou *manufacturing then* nou bezwen fer fas avek lezot konsern.

Par egzanp mendev i enn. Kou prodiksyon 2. E byensir apre sa kou eksportasyon. Alors, se pou sa rezon ki nou bezwen balans en pti, balans

byen tou bann keksoz ki nou pe rode atraver rol ki sa lenstiti pou zwe.

Zot konnen i pa pou posib ou sa lenstiti koman nou fini pas sa Prozedlwa dan lasanble dir mwan dir nou demen poudir tou bann zenn ki la deor i kapab fer *programming*, i kapab fer en *digital wallet*.

Tou bann zenn ki la deor i kapab fer bann program ki pou fer isi, ki pou fer laba. I pou en *step in the right direction*, aköz nou pe re konsolid li, e nou pe remet li an plas. Kot mon ava donn mon lopinyon. Sa i lopinyon Sebastien Pillay. Mon krwar ki poudir ler nou'n ferm sa lazans, e nou'n met li ansanm avek sa Minister.

Sa Minister in annan lezot konsiderasyon primordyal ki'n pran priyorite lo rol ki petet sa kote ti pou zwe. Par egzanp nou ti konnen ki sa Minister se pou dil avek bann later endistriyel par egzanp.

E avek bann proze devlopman dan lendistri. E konnen poudir sa i anmenn en kantite, i demann en kantite volim travay pou realiz sa bann keksoz.

E sa i fer ki petet sa regar ki sipoze ganny mete lo *NISTI* pa'n arive. Mon pa la pou mwan blanm okenn dimoun ki'n dan zot fonksyon

oparavan. Tou dimoun in vini in fer li avek son bonn volonte.

E sa ki reste pou nou fer prezan dan mon ka se fer pli byen ki sa ki'n pase o paravan. E sey delivre pli byen lo sa ki'n arrive o paravan.

An sa ki konsern Onorab Trevor Louise, ou'n *raise* serten konsern. Mon krwar koman en zenn Onorab, ou annan loportinite la pou ou enterakte pli pre avek rol ki sa lazans i annan pou zwe.

E servi sa pozisyon ki ou, ou annan ki en pozisyon ekstrememan enportan sa tit ki ou annan ki en tit vreman enportan pou ou angaz ou pou vwar ki mannyer ou, ou kapab vin enn bann pionye oubyen bann anbasader sa ki sa lazans i annan pou fer.

E sa i en keksoz ki pou byen pou bann zenn dan ou distrik. Pa zis dan ou distrik, me pou bann lezot zenn ki pe vwar lentere pa zis antre dan politik.

Me lentere enterakte avek rol ki bann lazans nasyonal i annan pou zwe, bann lenstitisyon nasyonal i annan pou zwe ki ava permet nou vwar en lot nivo langazman lo lapar en nouvo zenerasyon an sa ki konsern gouvènan, an sa ki konsern devlopman. E an sa ki konsern linovasyon e teknolozi dan nou pei.

Onorab Egbert Aglae, Deputy Speaker mon apresye serten komanter ki ou'n fer. Me en keksoz ki ou'n dir se ki zenn zenerasyon ki pe monte pa ganny kit deryer. Sa i en *statement* ki ou'n fer, e mon sit ou parol la. Se sa ki mwan atraver Lasanble ozordi mon pe koz lo la. E ki mon Prezidan in anmennen.

Fitir Sesel i dan nouvo zenerasyon. E nou'n vwar ki nouvo zenerasyon pe fer fas avek plizyer sekous enportan. E plizyer keksoz ki pe derout oubyen afekte zot *focus* pou al ver en fitir pli briyan. E enn bann keksoz ki nou konnen i la otour nou se sa size adiksyon. Me i osi annan lezot tandans ki pe fer ki bann zenn pa pe realiz zot potansyel oubyen pa pe apresye loportinite ki zot pe gannnen.

Me par kont i annan plizyer zenn ki pe demontre zot kapasite, zot kapabilite e ki pa pe ganny sa lankourazman neser pou pous zot pli devan. So, i enportan prezan pou pei rod sa balans, kan mon ed sa bann ki pe ganny sa bann difikilte atraver bann lazans parey *Mental Health Agency*, e byensir *Prevention for Drug Abuse and Rehabilitation Agency* ki'n pase devan Lasanble. Mersi dayer.

Me lo lot kote, osi kre en lazans pou Lasyans Teknolozi

Inovasyon pou donn sa bann ki pe war ki pe regard ki annan en *positive outlook* ki pe rod fason pou partisipe, en keksoz pou avans pli devan avek. E se sa ki nou pe rode.

Onorab Georges *LGB*, mon'n *enjoy* preferans avek *sorry* Onorab Georges *Leader* Lopoziyon. Mon'n *enjoy* referans avek *Hitchhiker's guide to the Galaxy*. Mwan mon rapel ti annan en *TV Show* ki ti vin avan sa liv, e ki ti enteresan akòz bokou dimoun in kontan koz lo la.

Me selman ozordi apre midi petet mon pou demann ou koman en dimoun ki'n travay akote ou pandan plizyer lannen, mon apresye ou deksterite lespri si mon kapab servi sa term. Se ki petet ozordi, pa *feel* pou realiz lenportans ki koman Lezislater ou annan a tou moman kot i annan en keksoz ou kapab kontribye.

E ler mwan mon'n tann ou dir pou dir be ou annan bann fot ki ou'n war, e ou pa pou koz lo la. Mon santi poudir mwan koman *Leader* Lopoziyon a out moman kontrè lo zot kote ler mon ti dan Lopoziyon zot ti dir mwan arete demann kestyon, arete propoz lamannman, aret sanze, arete sa.

So, petet mannyer mon pe get li se ki ozordi ou kapab swazir pou fer 2 keksoz. Nou

tou nou kapab swazir pou fer keksoz, parey nou'n fer li toultan e ekspekte en diferan rezilta or nou kapab swazir pou fer li diferaman. E la nou ava ekspekte en diferan rezilta. Mon ava les sa avek tou Manm Lasanble pou zot deside lekel ki zot pou swazir pou zot fer.

Onorab Loze. Onorab Loze, mon konnen ki ou en dimoun ki kontan teknolozi e ou kontan inovasyon. E ou en dimoun ki'n koz lo la pandan plizyer lannen. E mon'n kontan sa lesanz ki ou'n annan avek Onorab Georges zot de lo en lesanz akademik lo *Hitchhiker's Guide* otour *galaxy*. E bann leson ekriven.

Sa ki mon kapab dir se ki Onorab pa perdi ou sans limour, me osi pa perdi ou sans inovasyon ki ou devret kontinyen koz lo bann size inovasyon parey ou fer avek pasyon ki ou fer.

E i kapab annan dimoun ki pa kontan sa ki ou dir, tousala par egzanp i en pwen perspektiv kote ou asize, ou kapab kontan sa ki en dimoun pe dir, ou pa kontan sa ki en dimoun pe dir.

Me selman sa ki nou pa devret aret fer se fer en deba otour lenportans teknolozi e akòz teknolozi i kapab anmenn nou pli devan. Sa lenstiti i en keksoz ki bon. Son kreasyon i en keksoz ki bon.

Prezidan i son patron, i en keksoz ki bon. Onorab Georges in dir pou dir nou'n ekout li, mon kontan.

E menm ler mon'n ekout ou, ou pa dir man si ou pou siport mon Prozedlwa. Byensir parey mon'n dir ou taler mon a swazir lekel sa 2 keksoz ki nou oule fer.

Me selman nou'n santi poudir i nesaser pou donn en lanvergir nasyonal, akòz as Prezidan Dokter Herminie i ganny sans rankontre plizyer dimoun, plizyer endividi e plizyer Sefdet.

E atraver li nou a kapab ganny en *buy in* lo en pwennvi bi lateral e miltilateral lo ki mannyer nou kapab avans nou proses pou devlop inovasyon dan Lasyans ek Teknolozi. E se sa ki mon oule met devan Lasanble ozordi.

Onorab Woodcock, ou'n koz lo sak Gouvernman in fer son bout pou anmenn son pei pli lwen. Sa ki mon ava kosyon Lasanble lo la, ou konnen i annan bokou keksoz ki nou, ki zot dir.

E i enteresan ki ozordi mon asiz la, e pe ekout sa deba. Me mwan si mon ti kapab pe asiz la ekout mon lekor kot mon pe koze, petet mon ti ava annan osi en lot *outlook*.

Selman en keksoz ki mon krwar i primordyal dan tou sa ki nou fer, se ki Sesel i bezwen

premye e Seselwa i bezwen premye. Ozordi apre midi sa ki mon pe fer se met Seselwa e Sesel premye.

Koman en zabitan ki sorti lo enn nou bann zil prensipal, enn bann keksoz ki nou vwar lo par egzant lo Praslin se ki wi i annan bokou lavansman dan devlopman.

Me devlopman i striktire otour en lendistri, e sa se tourizm. E mon krwar petet *given* ki Praslin i annan sa kapasite nou devret pe rod bann loportinite pou kapab anmenn en lot kalite nivo lepanouisman lo sa zil. E byensir lo lot zil, se La Digue.

Alors, petet sa ki mon ava angaz ou pou konsidere se non pa konsiderasyon lekel ki'n dir *Alien* oubyen pa *Alien*. Me petet konsiderasyon ki mannyer koman en zenn dirizan, ou kapab angaze avek zenerasyon fitir pou fer ki ou kontribisyon i ede pou ed zot avans pli devan.

E mwan mon pe dir ek ou senserman ki en sipor pou sa Prozedlwa oubyen en *buy in* ki sa Prozedlwa pe anmenn i dan lavantaz bann zenn antreprenner li Praslin. I dan lavantaz bann zenn antreprenner dan Sesel en pe partou. E mon krwar petet sa i en keksoz ki nou devret regard li *from* sa perspektiv.

Onorab Grandcourt ou'n koz fortman lo akòz ou pe

siport sa Prozedlwa. E aköz ou *believe* dan program Gouvernman e dan sa proses *trust the process*.

I enportan pou nou konpran ki tou Gouvernman pou vin avek son *outlook of things* ki mannyer nou oule ale. E sa ki enteresan pou nou se ki nou tou nou bezwen köz avek konviksyon lo sa ki nou krwar ladan.

Ou konviksyon i anmenn ou pou siport sa Prozedlwa, e mon konpran sa. E mon donn ou en garanti poudir langazman ki Gouvernman pe donner se ki i en langazman pa zis pou met en lenstiti an plas.

Me en langazman pou fer en lenstiti marse. Se sa problem parfwa avek Sesel. E bokou dimoun i a dakor avek mwan ler mon pe dir se ki nou pou annan bann bon Lalwa, nou annan bann bon konfigirasyon.

E souvandfwa son lenplimantasyon i les bokou a dezire. Se pou sa rezon ki nou bezwen travay lo son lenplimantasyon pou nou kapab fer li marse.

E fer li delivre dan sa konteks ki bezwen delivre. Onorab *LGB*, mon krwar ou'n fer en ekselan lentervansyon. E i köz lo en keksoz ki konsern *operate* dan izolasyon. Me osi inovasyon, konesans e konpetans enn bann pli gro

baryer ki ou'n köz lo la ki nou bezwen travay lo la.

Ou konnen sa *statement* inovasyon, konesans e konpetans sa trwa mo, i trwa mo kle dan tou sa ki nou bezwen fer dan nou pei ozordi. inovasyon aköz nou bezwen sanz konteks lafason ki nou pe fer, i pa zis inovasyon dan teknolozi. I inovasyon dan nou fason panse, inovasyon dan nou fason enterakte, inovasyon dan nou fason reazir.

Konesans annou pran letan pou nou fer sa ki nou fer pli byen koman Seselwa. Nou kire par natir, e nou kapab servi nou natir koman en pozitiv pou nou aprann bokou plis keksoz sa ki pe pase otour nou. Bokou bann Manm Onorab ki'n travel isi zot ava realize poudir dan serten gran pei, zot ale zot nonm Sesel bokou dimoun i demann zot kote sa i ete.

Me par kont lamazorite Seselwa i kapab konn sa pli pti pei ki kapab obskir, aköz lamazorite Seselwa i kontan bann zenn i kontan zwe sa zwe lontan ki apel *Name, Place, Animal, Think, Total* mon pa konnen si zot rapel sa. Ki ou donn bann non sakenn i donn non en pei eksetera sa bann zwe koumsa.

So, montre poudir nou annan en baz pou nou fer inovasyon. Nou annan en baz

pou nou kre konesans. Trwazyenm mo Onorab Lemiel se sa mo konpetans. E se la kot nou bezwen fokalize. Fodre pa ki nou fer sa fot pou krwar poudir si en dimoun pa pe fer en travay ki byen, e i pa pe demontre konpetans nou pa devret enstrir li or bouz keksoz devan.

Nou pa devret sey anmenn en lot fason fer pou delivre. E konpetans i nesaser aköz koman en pti pei avek limit resours, sak resours ki nou met dan en keksoz fodre nou konpetan dan lafason ki nou servi li. Aköz lesansyel pou nou demen si nou pa konpetan dan lafason ki nou servi li, sa pti gin resours i kit nou e demen kout nou pli ser pou nou remet lenvestisman ladan.

Alors, Madanm Speaker, mon krwar bann Manm zot in eksprim zot lekör koman politisyen. E zot in eksprim zot lekör osi koman bann reprezantan zot bann *constituents*. E sa ki zot in fer kler se ki zot annan en lopinyon lo sa Prozedlwa. Se sa ki nou pe rode, tou dimoun i bezwen annan en lopinyon.

Prezan i ava travay Gouvernman pou fer ki bann ki lopinyon i lo kote ou pa krwar ki sa lazans pou fonksyonnen oubyen war en diferan avek, pou anmenn ou pou zwenn avek nou pou nou

zwenn avek nou pou nou bouz ver lavan pou vwar ki mannier sa Lalwa sa lenstiti i kapab zwe sa rol ki i zwe. E kapab fer sa fonksyon ki ou definir anba son Lalwa.

Lo en lot kote pou bann Manm ki pe siport sa Prozedlwa i pou enportan prezan pou Gouvernman montre son konviksyon pou realiz bann keksoz ki zot anvi war atraver sa prozedlwa. So, Gouvernman li son rol se fer sir Egzekitiv son rol se fer sir se delivre lo lentansyon ki sa Lasanble i annan. Pe enport ou pour, pe enport ou kont.

Alors, Madanm Speaker, apre midi pou mwan lesansyel se ki nou'n nobou anmenn en Prozedlwa ki malgre i annan en bon pe konponan sa Prozedlwa ki sorti dan lannen 2014.

Sa ki nou bezwen dir, mon pa pou argimant lopinyon en dimoun. Me sa ki mon bezwen dir se ki si i annan en keksoz ki bon, i pou reste bon malgre lannen ale, lannen vini.

E si i en keksoz ki bon ou bezwen replas li dan en lafason ki apre ou kapab fer li marse. Nou bezwen admet osi ki nou koman en Gouvernman, nou'n aprann lesan lo lafason ki keksoz ti ep fonksyonnen dan leparse.

E nou bezwen pa repet bann fot ki'n ganny fer dan

lepase. Si non, nou pa pou onor langazman ki nou pou'n donn Seselwa atraver sa sipor ki nou'n demann zot pou donn mwan.

Sa i kardinal. Sa i en pwen enkontrolab. Alors, Madanm Speaker, mon pou soumet sa Prozedlwa devan Lasanble apre sa deba e mon swete ki mon ava ganny sipor tou Manm Lasanble an sa ki konsern son merit pou sa Prozedlwa aköz i annan merit. I annan en rezon det pou annan sa Prozedlwa.

E mon swete ki Lasanble antye i a kapab donn mwan zot sipor lo la. Zis an terminan Madanm Speaker, mon bezwen termin lo sa note. E mon pa'n ganny sans fer lis a 2 zour ki mon'n vin Lasanble.

Madanm Speaker, ou ava permet mwan, pou mwan eksprim mon senser kondoleans avek lafanmir ansyen Onorab Stephen Pillay ki'n en kolek akote mwan dan Lasanble.

Ki nou'n form par bann Komite ki nou'n al bann vizit ansanm. Nou pou mank son limour, nou pou mank son lardyes laparol. E mon swete ki zot trouv rekonfor dan bann memwar ki zot ti'n pase avek li. E byensir ki nou gard zot dan nou lapriyer. Mersi Madanm Speaker.

MADAM SPEAKER

Mersi Vis-Prezidan. In ariv ler prezan pou nou pran en vot lo merit *Bill*. Tou bann Manm ki annakor? Mersi. Okenn Manm ki kont? Mersi. Vot lo merit *Bill*, 16 Manm in vot pour e 11 in *abstain*. Mon ava demann *Deputy Clerk* pou fer *Second Reading Please*.

MADAM DEPUTY CLERK

Mersi Madanm Speaker. A *Bill for an Act to provide for the establishment of the National Institute of Science, Technology and Innovation, to provide for its composition, functions and powers which shall serve as an umbrella body providing leadership and coordination for Research in Science, Technology and Innovation and for matters connected therewith or incidental thereto*. Mersi.

MADAM SPEAKER

Mersi Deputy Clerk. Nou pou aprezan al dan *Committee Stage*, pou nou konsider bann *clauses Bill*. Sof pou bann pti lamannman ki Onorab Georges in mansyonnen oparavan. Mon pa'n vwar okenn lamannman ki'n ganny etabli sorti kot *Bills Committee* oubyen okenn lezot Manm.

Alors, nou ava pran *each part* avek bann *clauses*. *Part 1; Preliminary* ki konpri *clause 1* avek *2*. E *Part 2 The*

National Institute of Science, Technology and Innovation ki konpri clause 3, 4 and 5. Vi ki nou napa okenn lamannman, okenn komanter oubyen kestyon?

Nou ava pran en vot *that Part 1, clause 1 and 2. Part 2, clause 3,4 and 5 form part of this Bill.* Tou bann Manm ki annakor? Mersi. Okenn Manm ki kont? *On question that part I and part II clauses 1 to 5 form part of the Bill,* 16 Manm in vot pour e 11 in abstain.

Nou ava aprezan pran *Part III* avek *Part IV; Part III, Patron, Chief Executive Officer and Staff of Institute* ki konpri clause 6, 7, 8 and 9 and part IV; *Financial Provisions* ki konpri clause 10, 11, 12. Si nou napa okenn comments oubyen *minor amendments,* nou ava pran en vote *that Part III, clause 6 to 9 and Part IV clause 10 to 12 form part of the Bill.* Tou Manm ki annakor? Mersi. Okenn Manm ki kont? *Thank you.*

That Part III and Part IV, clauses 6 to 12 form part of the Bill. 16 Manm in vot pour e 11 in abstain. Nou ava pran dernyen part, *which is Part V; miscellaneous that comprises clause 13, 14,15, 16, 17 and 18. No amendments or any comments.* So, *on the questions that Part V clauses 13 to 18 form part of the Bill.*

Tou bann Manm ki annakor? Mersi. Okenn Manm ki kont?

On the question that Part 5, clauses 13 to 18 form part of the Bill. 16 Manm in vot pour e 11 in abstain. Nou ava aprezan retourn dan Assembly. Nou ava ganny en *Motion for Third Reading* silvouple. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, anba Order 76(1) mon move ki *National Institute of Science, Technology and Innovation Bill, 2025* i ganny lir pou en Trwazyenm Fwa. Mersi.

MADAM SPEAKER

Onorab Gill.

HON CHURCHILL GILL

Mersi Madam Speaker. *Motion seconded.*

MADAM SPEAKER

Nou ava pran en vot on *Third Reading.* Tou bann Manm ki annakor? Mersi. *Thank you.* Okenn Manm ki kont? Mersi.

That the Bill be read a Third Time. 16 Manm in vot pour e 11 in abstain. Nou ava demann Deputy Clerk pou fer *Third Reading* silvouple.

MADAM DEPUTY CLERK

Mersi Madanm Speaker. *This Act may be cited as the National Institute of Science,*

Technology and Innovation Act, 2025 and shall come into operation on such date as the Minister may, by Notice published in the Gazette, appoint. Mersi.

MADAM SPEAKER

Mersi. Se alor ki *Bill National Institute of Science, Technology and Innovation Bill, 2025* in pase. Mon ava remersye tou Manm pou avek nou ozordi, espesyalman Vis-Prezidan avek son tim la apre midi. Nou pou aprezan *adjourn* ziska demen bomaten 9er.

(ADJOURNMENT)